

左文襄公奏疏

第一函
第十冊

左文襄公奏疏初編目錄

卷十二

奏報截剿竄浙逆匪收復四縣迭勝情形摺

覆陳入皖浙軍應調回進剿及籌兼顧情形片

攻剿杭州餘杭踞逆迭勝擊斃首逆情形片

覆陳杭嘉湖減漕情形摺

陳明劉臬司丁憂回籍治喪情形片

陳請紹屬四縣本年應徵錢糧分別緩徵片

請議卹餘姚縣殉難之紳士片

攻剿餘杭踞逆大獲勝仗情形摺

撈剿江皖出力人員請獎摺

覆陳孫侍讀揆嫌參奏不實情形摺

覆陳籌辦軍事情形片

左文襄公奏疏初編卷十二

奏報截剿竄浙逆匪收復四縣迭勝情形摺

同治二年十二月二十一日

奏爲官軍截剿竄浙逆匪疊獲勝仗現籌辦理情形恭摺奏祈

聖鑒事竊劉典一軍移駐績溪後僞

金王僞平東王僞根王等數大股不能上犯徽歙遂由甯國縣千秋關竄入浙境蔓延昌化於潛一帶擄掠直至清安分水邊界希圖擾我腹地以牽動杭州餘杭官軍之勢九月十九日派防水遊擊黃大玉參將馬復震出隊至蘇車埠截剿略有斬馘劉典聞賊竄昌化之信卽飭記名總兵黃少春留浙補用知府李耀南副將黃有功候補知縣楊詠春等率所部各營五成隊於十八日自績溪起行各持七日糧由昱嶺關赴昌化進剿並派張聲恆所部千人回扼清安而自駐績溪縣臨溪地方以防旌德之賊上犯二十日黃少春等行抵冷水鋪賊尙未知也二十一日黎明黃少春與黃有功率所部由左路進派參將周紹濂遊擊李良平都司劉昌選所部由中路進李耀南楊詠春所部由右路進行至株柳地方遇先鋒悍賊百餘人盡殲之乘勢撲水穿司賊巢該逆猝不及防殺賊數百名正俘斬間後面賊隊突至憑河抗拒周紹濂李良平梟水過河直衝賊陣周紹濂手刃騎馬賊目二名李耀南揮兵繼進賊勢不支紛紛敗竄我軍跟蹤緊追至白牛橋忽僞金王根王等大隊蜂擁來援勢甚兇悍李良平扼橋力堵各營復整隊排列鎗礮連施鏖戰約一時許十二都之賊又從左手山谷小路飛奔而來幸黃少春黃有功等先已派隊

伏於叢莽中賊至伏發復斃賊百餘名李耀南李良平等俟黃少春抄出賊後亦奪橋而進右路之賊從下游涉水來者楊詠春又由山邊橫出截之賊大驚潰我軍三面合追該逆奪路狂奔沿途斃賊又數百名溺死者無數可紀生擒二百餘名解散甚多立將昌化縣城收復計是役共斃賊二千餘名奪獲偽印百餘顆騾馬二百餘匹牛數十頭穀米雜糧千餘石拔出難民數千名我勇受傷十餘名陣亡二名餘黨向甯國縣界竄去是夜於潛大陽埠錫口等處之賊亦聞風潛遁二十二日黃少春等督隊冒雨追之不及遂收隊還二十八日仍折回安徽績溪老營該逆後起復由甯國竄至孝豐與前由廣德竄來各股合隊衆尙數萬本月初三四等日分兩股一竄臨安西鄉一竄臨安北鄉去餘杭青山官軍營盤均不甚遠臣比飛飭駐新城副將劉明燈參將張完元張人和等各派七成隊迅速進剿飭駐桐廬之副將劉明珍等率所部助之並令溫處道魏喻義派隊就近夾擊蔣益澧亦飭遊擊徐文秀率所部五營赴亭子頭會剿初八日各營進剿臨安北路賊見官軍至卽倉皇奔逃僅追斬數十名初九日黎明劉明燈劉明珍等分攻西路直抵橫路禮畝舉足里高村峯嶺各賊巢賊猶未覺我軍一鼓齊進喊殺震天該逆紛紛驚竄各勇圍殺斃賊七八百名生擒三百餘名奪獲騾馬八十餘匹旗幟三百餘件陣斬僞倂天豫謹天豫各逆目而奪其印餘賊翻山望北逃竄拔出難民約數千計各營追至朗嶺乃收隊還此前月二十一二月本月初八九等日我軍截剿竄浙各股逆匪連獲大勝之實在情形也現在杭州餘杭兩城踞逆堅守如故

各軍方勦摻賊勢難合圍應俟援皖各營回浙乃數分布臣前以皖賊紛紛竄浙上游喫緊石太旌德未復徽防不可稍鬆王開琳留防黟縣劉典移軍績溪均難遽撤不得不暫屯嚴州以期上下兼顧業經陳明在案頃據報皖南軍情石埭古逆率黨獻城投降太平江逆旌德盧逆或降或走三城均已收復徽池一律肅清餘眾竄踞甯國廣德孝豐之間勢甚渙散臣擬令劉典所部各營由昌化於潛趨臨安進勦孝豐爲規取湖州之地王開琳一軍現當徽防無事亦可調歸以備策應臣軍後路穩固拜摺後亦即日移紮富陽督飭各軍先將餘杭攻克然後悉力杭州分規湖郡仍與皖南各軍聯絡一氣互相應援斷不稍分畛域致誤大局而煩 廑念所有各軍截勦竄浙賊匪疊獲勝仗情形恭摺由驛六百里馳奏伏乞 皇上聖鑒訓示施行謹 奏

議政王軍機大臣奉 旨另有旨欽此

覆陳入皖浙軍應調回進剿及籌兼顧情形片 同治二年十二月二十一日

再十月十一日臣在嚴州軍營欽奉 寄諭青陽雖已解圍而太平石埭旌德甯國四縣尙爲賊踞徽

郡防務未可稍鬆左宗棠現在駐軍富陽距徽防稍遠但係浙師後路亟須兼籌妥顧仍著左宗棠隨時策應與皖南諸軍聯絡聲勢迅掃妖氛毋稍大意欽此跪誦之餘敬仰我 皇上垂念皖疆軍務關繫

全局地勢戎機洞若觀火下懷欽佩曷可言宣竊維制賊之要在避長圍防後路竊憂元年正月遵

有覆奏摺內已詳陳之上年十一月調道員王文瑞入皖今年二月調臬司劉典入皖合共一萬餘人均於無可抽調時勉爲抽調亦嚴防後路之意也昨因青陽圍解逆首僞金王鍾逆僞平東王何逆等各率

黨夥東竄

臣

卽飛飭劉典王開琳漸次移軍東向扼其由皖竄浙之路於時曾國藩有調浙軍過嶺會剿

之咨

臣

未敢應蓋清陽之圍旣解石太賊勢已孤野無可掠自無久踞之理又江忠義等旣軍其西鮑超

一軍復逼其東勢必逼賊南趨南趨卽入浙境入浙未復之區猶之可也若由歙境竄淳安遂安則出

軍之後若由績溪甯國竄昌化於潛則出杭州餘杭各軍之後殘黎難堪再擾而浙江大局亦將被其牽

綴

臣

所以尅期進駐富陽旋復中止者此也浙軍援皖自應兼顧浙境豈有坐視皖賊入浙之理浙軍嚴

防後路自應先其近者豈有舍近圖遠之理

臣

所以檄劉典等軍漸次東向遏賊竄浙之路劉典所以駐

軍臨溪一聞逆賊繞由甯國縣境折竄昌化卽派隊馳援者此也幸而竄入昌化之賊經總兵黃少春等

由績溪入昱嶺關回援一戰破之若已出嶺會剿則前拒虎而後進狼誠恐於皖未必有功於浙則必有

害耳昌化肅清後劉典所派之黃少春等於前月二十八日收隊回皖仍駐臨溪老營曾國藩所奏

臣軍

回浙或卽指此現在石埭太平旌德之賊業已肅清甯國縣城亦已無賊而湖州孝豐一帶竄來之賊甚

多天目山麓時有大股賊蹤出沒以局勢論之則皖緩而浙急也明矣

臣

軍之入皖者應調回浙省以備

進剿至妥籌兼顧則固

臣

之本謀豈敢稍涉疎虞仰煩

聖鑒謹據實覆陳伏乞

皇上聖鑒訓示

謹奏

議政王軍機大臣奉 旨另有旨欽此

議政王軍機大臣 字寄同治二年十一月初六日奉 上諭左宗棠奏截剿竄浙逆匪疊勝現在籌

辦情形入皖浙軍應調回進剿各摺片逆首僞金王等由甯國縣竄入浙境蔓延昌化於潛一帶經劉典自績溪飭派總兵黃少春等回浙進剿斃賊二千餘名立將昌化縣城收復該逆後股復由甯國竄至孝豐分擾臨安雖經官軍擊敗而湖州孝豐一帶竄賊甚多天目山麓時有大股賊蹤出沒浙省援皖之軍自應調回迅籌進剿現在皖南軍事大定昨據曾國藩等奏到東壩甯國高淳溧水各城次第俱下惟廣德尙爲賊踞皖軍得手逆賊南趨浙境必然之勢昨已諭令曾國藩速調勁旅進克廣德堅城與浙軍互相聯絡左宗棠現檄劉典所部由昌化於潛趨臨安進剿孝豐並將王開琳一軍調回策應卽著飭劉典等迅速進兵收復孝豐爲規取湖州之計並與皖南進攻廣德之師互爲聲援使皖浙諸軍聯爲一氣以期得手杭州餘杭賊勢如故該督現擬卽日移軍富陽督軍先克餘杭然後悉力杭州諒不難次第掃蕩現在蘇州省垣業已克復皖城亦漸就廓清各路軍情同時得手金陵杭州兩處各軍已薄城下立盼捷音該督其迅奏膚功同膺懋賞有厚望焉將此由六百里諭令知之欽此

攻剿杭州餘杭踞逆迭勝擊斃首逆情形摺 同治二年十一月初四日

奏爲官軍攻剽杭州餘杭踞逆迭獲大勝擊斃首逆現籌辦情形恭摺馳奏仰祈 聖鑒事竊杭州

餘杭兩處賊匪經官軍迭次痛剿復於餘杭東門至杭州之倉前長橋女兒橋等處糾添悍黨欲由何母橋繞截餘杭各軍後路均經官軍擊退蔣益澧因何母橋太平橋一帶港汊紛歧賊情詭譎每圖乘隙內竄十月十六日派副將周廷瑞都司王東林於天水橋扼紮一壘參將鄧受福於護國橋扼紮一壘康國器亦派參將古捷芳帶勇會剿賊伏不出鄧受福率親兵前往窺賊動靜突遇賊二千餘分路來撲鄧受福督隊奮擊斃賊數十名因衆寡不敵中傷親兵數名鄧受福回救手刃數賊右脇忽被賊槍洞穿而殞周廷瑞王東林帶隊馳至賊始潰竄十七日蔣益澧飭劉樹元曹魁甲徐文秀出隊至何母橋並於方家橋太平橋添築二壘十八日長橋女兒橋之賊來犯經官軍擊走其杭城踞逆因嘉興等處新來悍賊數萬亦於十八日卯刻乘大霧迷漫分路由萬松嶺直撲副湘左營營壘都司張志公憑濠放槍迎擊該逆愈逼愈近丁賢發率副湘後營從山巔馳下協力助守約一時許高連陞督同余朝貴張正順等所部馳至張志公丁賢發出壘奮擊賊勢稍却時洋將德克碑亦帶花勇前來助剿並令淺水輪船點放開花大礮轟斃數賊楊政謨劉連陞羅啟勇各率舢板師船將沿河之賊擊退登岸衝殺該逆見水陸各軍大隊齊至分投迎拒酣戰兩時斃賊數百賊大敗其由清波門所出之賊被王月亮督同閩字中營截殺潰退回城各軍乘勢追剿又斃賊多名此十月十六十八等日攻剿獲勝之情形也嗣康國器一軍於十一月

初五初七等日攻剽餘杭東門隸賊壘亦迭有斬獲臣馳抵富陽後卽於十一月初十日率輕騎赴餘杭
察看形勢見該處依山帶水地勢遼闊東路南直達杭州北可通武康德清西可通孝豐安吉官軍僅扼
其東南兩面杭湖等處之賊仍可往來自如當調駐紮富陽之朱明亮劉琰楊和貴余佩玉等五營駐紮
分水張聲恆等四營齊至餘杭會剿一面飭副將劉名珍率駐嚴州兩營淳安兩營填紮分水由皖調回
記名總兵黃少春所部克勇一軍亦檄其由分水新城以出餘杭進紮西北一路十二日令羅大春簡桂
林劉榮合賴錫光等四營由青山進紮丁橋十七日令劉琰朱明亮余佩玉等進紮石門橋臣當飭魏喻
義徐文秀各營列隊南門康國器所部各營列隊東門以掣賊勢羅大春三營由丁橋出西門大路楊昌
潛率親兵及楊和貴新右營由丁橋小路李耀南黃有功張福齊率所部繞出西北隅辰刻城賊壘賊及
東北門外之賊悉衆來撲官軍分路接仗徐文秀朱明亮與蔣益澧派來馬步各營見西路賊勢較重馳
往夾擊鏖戰逾時賊忽分股由左路搶上山梁勢極兇悍賴錫光一營稍却楊昌潛白冠玉等從北路山
峽中突起衝殺賊始駭奔官軍截之殺悍賊百餘名生擒黃衣白衣賊目十餘名追近城邊賊爲水阻各
軍逼之戮斃溺斃無算其村內黃衣悍賊衝出拒戰適李耀南等從左路馳至羅大春等出右路抄擊遂
大敗各軍乘勢痛擊斃賊數百名奪獲洋鎗六十餘桿抬馬鎗百數十件旗幟刀矛無算其東門外之賊
亦經康國器派隊擊殺多名二十四日令張聲恆齊蘭禮劉端冕楊松林進紮餘城西北隅蔣益澧率馬

部九營從石門橋出西路劉琰等四營繼之黃少春楊詠春率馬步十三營由丁橋出北路楊昌濬率劉榮合賴錫光楊和貴繞出西北一帶官軍排列甫定該逆挑悍黨萬餘由北路前來拒戰西門之賊亦皆出隊負城壘而陣黃少春率各營從左路先進擊斃先鋒悍賊數十蔣益澧楊昌濬各率所部衝入賊陣斃悍賊數十賊分數大支拚死抗拒官軍三面感之裏賊中央節節逼壓而進且堵且衝愈戰愈奮賊敗至城北沿途鮮血淋漓屍骸枕藉僞歸王鄧光明僞朝將汪海洋猶磨其死黨苦相搯格蔣益澧策馬陷陣各軍乘之首逆鄧光明經官軍擡礮轟穿左脇立斃陣前餘賊搶護入城時已酉正官軍乃收隊而還是日自辰至酉鏖戰數十合斬大小賊目百數十級黃衣白衣青衣悍賊約共五百餘奪獲賊馬二十餘洋鎗旗械無算賊之被鎗礮轟斃曳屍入城者殆千數百計其東路康國器一軍吳光亮熊飛林珠丁應龍等亦攻破柯埭賊卡乘勢進攻牛畝太平橋賊壘踰濠破柵而進擊斃黃衣賊目一名並分支截擊倉前援賊斬馘亦多此十一月十七二十四等日官軍猛攻餘杭縣城殲斃首逆克獲全勝之實在情形也賊敗後兇饑頓衰於餘城西北門外連夜修濬長濠北門外添築三壘官軍日夜擣戰賊鼠伏不出而東北瓶窰鎮倉前林清營何家陡門一帶添築賊壘甚多揚言齊隊來撲官軍營壘然膽縮不敢前也臣於戰後與蔣益澧楊昌濬黃少春等商議由北路築壘分軍襲取瓶窰絕其糧路蔣益澧暫回留下鎮老營布置防守臣出營已十五日須回富陽大營清理積牘然後拔營進駐東西兩路適中之橫溪頭以便

督勦蔣益澧抵老營正布置杭州一路戰守機宜登山遙瞰杭城知賊因官軍急攻餘杭各路援賊均趨重杭州西北餘杭東北一帶凡自賊中逃出者均言鄧逆授首羣賊洵懼之狀甚悉蔣益澧擬先攻杭州城外各壘以愾之十二月初一日令記名提督高連陞洋將德克碑等會同水路各營進攻鳳山門外各壘親督馬步各營列隊錢塘門外秦亭山棲霞嶺一帶牽制城賊高連陞等數路齊進各壘之賊紛紛揚旗而出高連陞乘其尚未成列猛撲之水師營官楊政謨劉連陞等率各師船沿江轟擊高連陞德克碑等大呼陷陣賊勢披靡縮退石壘希圖抗拒官軍躡蹤追入破賊一壘盡殲之復分攻各壘各壘之賊望風逃竄不敢據壘自固自辰至午九壘次第俱破高連陞等追賊直抵城隍山脚楊政謨劉連陞等師船排礮轟攻江邊石壘亦破之計共斃賊二千有奇奪獲旗幟礮械不可勝紀現在杭州城外只餘古塘賊壘及近城兩壘未破蔣益澧卽令高連陞分所部五營駐賊五壘德克碑所部駐賊二壘逼之此十二月初一日水陸官軍攻破杭州城外賊壘克獲全勝之實在情形也臣維杭州形勢所恃爲屏蔽者餘杭一城賊據之可以通嘉湖糧路而拒官軍官軍得之可以扼嘉湖之吭而制杭賊之命悍會鄧光明汪海洋所爲拚死力爭者此也今鄧光明業已伏誅而杭州城外各壘掃除幾盡餘杭之賊自不能不回顧杭城老巢旦夕必有可乘之機如兩城有一先下則浙西三郡大局可冀以次漸定蔣益澧擬卽移紮餓頭山雷峯塔秦亭山並調橫溪頭各營猛攻古塘堅壘臣函飭楊昌溶嚴密偵探如餘杭賊勢變動卽相機

截之令其首尾不能相顧復檄署衢州鎮總兵劉培元統各營水師下剿以重錢江之險而助陸路聲威
臣拜摺後仍卽拔營進駐餘杭之橫溪頭以便相機督剿兩城之賊務當妥爲籌策以冀稍紓 聖慮

所有此次力戰陣亡之副將扈照乾副將銜留浙補用參將鄧受福王洪熙遊擊陳宗說都司周富棠都
司銜藍翎守備吳葆光千總徐再發千總銜把總尹其順藍翎把總黃連陞均請 飭部照例從優議

卹以慰忠魂其初一日亡傷各將弁尙未據蔣益澧稟報前來容俟查明伏乞 恩施謹將戰勝情形

據實馳奏伏乞 皇上聖鑒訓示施行謹 奏

議政王軍機大臣奉 旨另有旨欽此

覆陳杭嘉湖減漕情形摺 同治二年十二月初四日

奏爲遵 旨覆查杭嘉湖三屬徵收漕糧情形並浙東各屬地丁亦應核減温州府屬已經減定恭摺

具奏仰祈 聖鑒事竊 臣欽奉同治二年六月初三日 上諭浙省疊遭兵燹小民流離失所殊堪

軫念自應將該省漕糧量予減免以示公溥之仁著左宗棠通飭杭嘉湖三屬將實在應徵漕糧稅則詳
細確查各按輕重分成量減奏明辦理欽此仰見我 皇上惠愛黎元痼瘼在抱值此度支匱乏猶議

減賦薄征厚澤深仁實前代所未有跪誦之下欽服難名惟查杭嘉湖三屬額征漕米一百零三萬數千

石內實起運米八十六萬四千二百餘石白糧粳糯正耗米四萬四千三百餘石改白征漕米四萬九千

八百餘石較之江蘇常鎮兩府爲尤重向年開征杭湖各屬皆先本後折嘉興七屬皆先折後本其交折色者初收每石已在六千餘文嗣後逐漸加增折收一石照時價約合兩石有奇其交本色者每石有加六七斗至八九斗不等竭小民終歲之力徒爲吏胥中飽衿棍分肥之資所以嘉湖各屬時有鬪漕之案也是欲剔除宿弊必先逐縣清查現在杭嘉湖均未克復戶口半多流亡三府征冊亦俱燬失勢難核實勾稽應俟地方一律肅清遴派官紳查明向來額徵若干浮收若干各就各縣情形分別裁減明定徵數頒示勒石庶實惠得以均霑民困可期稍復此杭嘉湖三屬漕糧刻下尙未能查辦之情形也其浙東各屬地丁南米浮收之數雖不及杭嘉湖之甚弊端亦在所不免除新復各郡縣田畝未墾莊冊未全者應俟查明辦理外其温州一府稍稱完善當飭該管道府確查詳辦茲據兼署溫處道温州府知府周開錫稟稱將道府衙署一切陋規全行裁革按照歷年官收民納實數酌中核減計温州一廳五縣一衛三場額徵銀十六萬六千零五十九兩七錢三分七釐穀三萬五千五百六十九石零一斗一合米三萬七千八百二十七石六斗七升六合此次除正額仍照常征解外其餘浮費共減去錢四萬零五百餘千米三百餘石本年卽照核減之數征收此浙東各屬錢糧亦應核減而温州府屬已經減定之情形也竊維東南數省財賦之重以江蘇之蘇松常鎮太四府一州浙江之杭嘉湖三府爲最查杭嘉湖額征漕糧一百零三萬數千石而州縣浮收又不啻倍蓰在州縣宜有餘矣乃近來虧空更鉅者則以包戶日多幫費日

重攤捐之名目愈繁往來之供應彌盛以致乙年之漕甲年已經挪用損國病民莫此爲甚咸豐七

年湖南省核減漕糧時臣正在升任四川總督前湖南巡撫駱秉章幕中見其所定章程最爲允協嗣後

湖北江西仿照行之官民稱便將來清釐杭嘉湖三屬漕糧自應查照辦理而今日之急務尤在守令得

人斯立法可期久遠未有吏治不清閭閻得以無擾民生未遂府庫顧能獨充者也所有遵旨覆查

杭嘉湖三屬漕糧及浙江各屬地丁温州府屬已經減定各緣由理合恭摺具奏伏乞皇上聖鑒訓

示謹奏

議政王軍機大臣奉旨另有旨欽此

陳明劉臬司丁憂回籍治喪情形片同治二年十二月初四日

再浙江臬司劉典在營聞訃丁憂因皖浙攻剿正當喫緊經臣奏明可否改爲署任俟軍務稍定准其回

籍治喪請旨遵辦一摺於十一月初四日欽奉同治二年十月十七日上諭劉典著改爲署任

浙江按察使俟軍務稍定再行回籍治喪事畢卽行赴浙統帶原部剿賊欽此臣伏查皖南境內自石埭

太平旌德三城收復徽甯次第肅清鮑超一軍復進克東壩建平局勢已臻穩固劉典於十月二十一日

來嚴謁見泣請回籍治喪情詞極爲懇切臣觀其形神憔悴未忍強留而現在軍務稍定該臬司回籍治

喪於事勢尙無不可當令其卽日起程一俟治喪事畢速卽遵旨來浙剿賊仰答天恩除臬司

事務仍委衢州府知府林聰彝代辦外其所部各勇查有記名總兵黃少春戰功卓著眾望素孚堪以接帶合併陳明伏乞 聖鑒謹 奏

議政王軍機大臣奉 旨另有旨欽此

陳請紹屬四縣本年應征錢糧分別緩征片 同治二年十二月初四日

再紹興府屬之餘姚上虞新昌嵊縣等縣均係上年克復應征本年錢糧不在新復蠲免之列據代理紹興府知府楊叔懌因時屆下忙應征之際飭據該四縣稟覆地方被擾較重夏間雨澤愆期田禾受傷小民未復瘡痍又遭歉歲若令按額全完民力實有未逮又據石堰場大使稟稱所轄靈地坐落餘姚縣境事同一律應請附入分別緩征當飭代辦藩司蘇式敬核議茲據詳稱細加察訪委係實在情形所有餘上新嵊四縣應征本年錢糧石堰場應征電課應請按額征完五成緩征五成等情前來 臣覆核無異可否簡懇 天恩俯准將餘姚上虞新昌嵊縣四縣應征同治二年新賦石堰場應征電課按額征完五成緩征五成其緩征銀數俟同治三年察看情形分別帶征庶民力稍可展紓而額賦亦不致虛懸理合附片具陳伏乞 聖鑒訓示謹 奏

議政王軍機大臣奉 旨另有旨欽此

同治二年十二月二十四日內閣奉 上諭左宗棠奏請將餘姚等縣上忙錢糧及石堰場應征電課

緩征等語浙江紹興府餘姚等縣地方被擾最重本年夏間雨澤愆期田禾受傷若仍將應征錢糧按額全完民力實有未逮石堰場竈地坐落餘姚縣境事同一律加恩著照所請所有餘姚上虞新昌嵊縣應征同治二年新賦石堰場應征錢課均著按額征完五成緩征五成其緩征銀數俟同治三年察看情形分別帶征以紓民力該督撫卽刊刻謄黃遍行曉諭務使實惠均霑毋任吏胥舞弊以副軫念災區至意該部知道欽此

同治二年十二月二十四日內閣奉

上諭左宗棠奏官軍攻剿杭州餘杭殲斃首逆迭獲大勝各摺

杭州餘杭之賊屢經官軍痛剿又於長橋女兒橋等處糾添悍黨迭次來犯均經官軍擊退其杭城踞賊乘霧直撲官軍營壘經水陸各軍分投剿擊鏖戰兩時賊大敗潰左宗棠於馳抵富陽後分飭各軍進剿餘杭踞逆悉眾來撲官軍斃其悍賊數百名逼水淹斃者無算城賊拚死抵拒蔣益澧等軍三面感之賊屍枕藉僞歸王鄧光明被礮轟穿左脇立斃陣前計斬黃衣等悍賊五百餘名轟斃之賊約千數百計杭城逆匪聞風洶懼蔣益澧派令記名提督高連陞洋將德克碑等會同水陸各營進攻鳳山門外破賊九壘逐北直抵城隍山腳斃賊二千有奇剿辦甚爲得手仍著左宗棠督飭各軍迅將杭州餘杭兩城迅圖克復立奏膚功所有此次力戰陣亡之副將卮照乾副將銜留於浙江補用參將鄧受福王洪熙遊擊陳宗說都司周富棠都司銜藍翎守備吳葆光千總銜把總尹其順藍翎把總黃連陞均著交部照例從優

議卹以慰忠魂欽此

議政王軍機大臣 字寄同治二年十二月二十四日奉 上諭左宗棠奏官軍攻剿杭州餘杭踞逆疊獲大勝轟斃逆首遵覆杭嘉湖減漕情形及臬司劉典回籍治喪各摺片本日已明降諭旨將獲勝情形宣示陣亡副將扈照乾等照請優卹矣此次官軍猛攻餘杭陣斃僞王鄧光明克獲全勝杭城外踞賊又被官軍破其九壘僅餘古塘賊壘及近城兩壘未下攻剿甚爲得手現在杭州之賊聞風洶懼餘杭賊勢亦將回顧杭城老巢均有可乘之機左宗棠卽日拔營進紮餘杭之橫溪頭相機督剿蔣益澧進攻古塘堅壘復飭楊昌溶偵探餘杭賊勢相機截擊所籌均極周妥卽著督飭各軍乘勝進取力圖恢復兩城迅奏捷音以紓殷盼昨據李鴻章奏滬軍收復嘉善縣城已諭令該撫進規嘉興以擊杭湖各賊之勢左宗棠前奏亦已分兵進規湖州杭賊向賴嘉湖援賊接濟糧運此時各軍同時並舉該逆實有兼顧不遑之勢如杭餘兩城一處得手則浙西三郡可期功收破竹漸次底定卽著該督妥爲籌策用副馳塵洋將德克碑此次會攻杭城賊壘甚爲出力著左宗棠仍飭令勉籌會剿迅奏膚功署浙江臬司劉典丁憂懇請回籍治喪情詞極爲迫切已由左宗棠飭令起程惟現在浙西軍務攻剿正形喫緊該臬司帶兵甚爲得力著左宗棠飭令趕緊料理一俟治喪事竣卽行赴浙剿賊以副委任杭嘉湖三屬向徵漕糧浮收過重該督擬俟地方收復再行分別議減浙東各屬地丁積弊亦甚均應查明辦理現在温州尙稱完善該

督已督飭該管道府將一切陋規裁革除正額照常徵解外其餘浮費減去錢四萬五百餘千米三百餘石足見體恤民瘼實心任事其浙東各屬並著一律辦理將來杭嘉湖克復後卽著該督慎選賢明守令剔除積弊將徵數妥立章程分別議減期於永遠遵守以副朝廷軫念窮黎之意另片奏餘姚等縣請緩徵等語本日已明降諭旨照准矣將此由六百里諭令知之欽此

請議卹餘姚縣殉難之紳士片

同治二年十二月初四日

再餘姚縣紳士候選員外郎謝敬死事情形奉

旨交

臣查明具奏

臣當飭紹興善後總局補用知府

許瑤光代理紹興府知府楊叔懌等就近確查茲據許瑤光等稟稱該員謝敬向在本籍辦團同治元年七月帶勇駐紮四門鎮與縣城相爲犄角自七月十九日至閏八月二十八日逆匪屢次圍攻大小二十餘戰殺賊數千名九月初七日移營馬渚正擬乘勝進取詎料上虞賊匪分黨數萬一至陡疊一至馬渚合圍已革護提督陳世章派兵馳援逆匪已衝入營盤各勇潰散謝敬手刃數賊眾寡不敵與附生呂受豫俱陷賊中本年五月始據其兄謝端稟有逃出常勝軍勇丁鍾桂堂報稱上年九月十三日與謝敬同時力竭被擄關禁一處逆賊始則多方逼脅繼則婉言勸慰謝敬義不肯屈及官軍克復上虞縣城逆賊逃竄欲帶謝敬過江謝敬罵不絕口被黃衣賊目用刀殺傷推落江水身死至呂受豫當日業已陣亡等語並將隨同陣亡各弁勇開單呈請轉詳請卹等情前來

臣查謝敬以在籍紳士帶勇殺賊雖力竭被執

仍能罵賊捐軀大節凜然深堪嘉憫該員於咸豐十一年間隨同官軍擒捕土匪王春生等出力經前團練大臣王履謙奏請 賞加道銜尚未接准部覆應請 旨將候選員外郎謝敬照道員例從優議

卹以慰忠魂其隨同陣亡之州同銜附生李立夫附生呂受豫監生謝薌芸謝嗣達五品翎頂儘先把總

黃明耀並請 飭部照例議卹理合附片具奏伏乞 聖鑒施行謹 奏

議政王軍機大臣奉 旨謝敬著照道員例從優議卹李立夫等均著照例議卹該部知道欽此

攻剿餘杭踞逆大獲勝仗情形摺

同治二年十二月十三日

奏爲官軍攻剿餘杭踞逆大獲勝仗現籌辦理情形恭摺馳奏仰祈 聖鑒事竊餘杭踞逆經官軍於

十一月十七二十四等日擊敗後復於西北門外連夜修築濠壘與城賊相爲犄角十二月初三日各軍

分三路進剿該逆由北門出悍賊千餘東北門外村房內出賊數千分投迎拒黃少春率各營由左路先

進揮兵猛擊賊敗走乘勢將港邊賊壘焚燬并破賊卡二重斬悍賊數十名副將劉明燈等三營亦由三

里鋪直攻賊壘噴筒火箭迸射壘中須臾火起賊棄壘而遁其張聲恆魏喻義各營由中路進者力戰逾

時該逆死拒不退適劉明燈等馳至左路各營復從樹林中橫截而出賊始奪路竄走各軍追近北門港

邊突有黃帽紅衣騎馬賊目數人率悍黨迎頭抗拒羣賊拚命回鬪左路敗黨亦紛紛來撲賊勢兇悍各

軍整隊迎敵楊昌濬督親兵及羅大春簡桂林所部更番鏖戰數時賊勢復却其劉璣等各營由右路進

攻西北角城壘直逼卡門奮力攻撲壘已垂破賊忽分投從旁抄出截我後路朱明亮余佩玉督勇馳擊賊仍縮退壘中各軍因苦戰竟日時已申刻乃收隊還計共破賊三大壘擊斃悍賊數百名生擒二十餘名奪獲旗幟洋槍各械無算此餘杭西北一路破壘獲勝之情形也其東路倉前等處爲通杭州要路賊於太平橋牛畝姚家埭王家廟閔竺堰等處修築堅壘以與倉前之賊聯絡一氣康國器於初三日派吳光亮康熊飛古捷芳林珠林本丁應龍等將姚家埭王家廟閔竺堰等處賊壘四座攻克殺賊數百名乘勢進攻牛畝賊壘首逆汪海洋率倉前林清堰太平橋等處賊黨來援復經吳光亮古捷芳康熊飛等截殺斃賊六七百名奪獲槍礮旂幟數百件此餘杭東路破壘獲勝之情形也該逆自此次擊敗後勢愈窮蹙晝夜鼠伏濠內在我百計誘戰堅匿不出我軍若乘勢逼攻往往爲鎗礮所傷非取遠勢包圍絕其糧道不足制賊死命臣卽日進駐餘杭之橫溪頭當相機督剿以期迅拔堅城其蔣益澧攻杭一軍十二月初一日獲勝後僅餘古塘賊壘三座未破初二日復率各營力攻該逆踞守甚堅未能卽拔蔣益澧已飭各營分紮錢塘湧金鳳山清波等門裏賊中央自難竄逸初六夜逆賊偷撲錢塘門外羅三綱營壘經羅三綱擊退惟地勢延紮太寬兵力尙不敷分布臣已將徐文秀駐紮橫溪頭五營調歸蔣益澧一處併力規杭其水師劉連陞楊政謨羅啟勇梁雲山彭大光等營於初五日進攻清泰門外觀音堂賊壘分兵將附城房屋燒毀賊來撲劉連陞楊政謨等督隊奮擊斃賊數十名賊敗退劉培元復因西湖一帶港汊

紛歧飭蔣榮彩劉仁和等擡水師舢板戰船十號由錢江入西湖初八日蔣榮彩劉仁和等奪獲礮船三號小划船十餘號斃賊百餘名現據各路稟報平湖乍浦海鹽之賊俱已投誠經各鄉團收復海甯州城賊會亦有獻城之說蔣益澧委署杭州府知府陳思燾前往辦理如杭州各屬以次收復漸漸移軍西向則杭賊勢孤自亦無能久踞而現在杭州餘杭兩城必須有一先下則全局皆活嘉湖兩郡乃可次第肅清旨臣惟當督飭各軍慎以圖之以冀仰紓宸廑所有攻剿餘杭獲勝及現籌布置情形理合據實馳奏伏乞 皇上聖鑒訓示施行謹 奏

議政王軍機大臣奉 旨另有旨欽此

援剿江皖出力人員請獎摺 同治二年十二月十三日

奏為查明浙師援皖援江在事出力人員兵勇請 旨獎敘以勵戎行事竊臬司劉典一軍於二月赴

援徽郡擊敗大股逆賊肅清休甯祁門克復黟縣除劉典等已隨摺奏獎外其餘出力員弁奉 旨交

臣擇尤保奏在案嗣因逆賊竄擾江西景鎮戒嚴劉典復率所部馳援大小數十戰浮梁鄱陽彭澤等處

之賊悉數驅除江境肅清大局穩固該將士等迅赴戎機所向克捷實屬異常出力經 臣飭令劉典將出

力各員覈實查明附入克復黟縣案內一併奏乞 恩施茲據劉典開單具詳前來 臣覆覈無異除出

力稍次者咨部註冊外其應行奏保各員謹繕列清單恭呈 御覽又在營病故之副將銜參將熊正

坤等五員應併請 飭部照軍營立功後病故例議卹理合恭摺附驛具奏伏乞 皇上聖鑒施行

謹 奏

議政王軍機大臣奉 旨另有旨欽此

覆陳籌辦軍事情形片 同治二年十一月十二日

再本月初九日欽奉十一月十四日 寄諭李鴻章奏官軍克復無錫金匱縣城一摺暨陳近日賊情

籌辦大略情形一片所稱忠逆李秀成自十年春間疊陷蘇杭各處盡得東南財賦之區日益強悍至去歲賊勢屢挫精銳散亡洪逆驚惶失措猶賴忠逆回援主持守局該逆以蘇州爲分地其部衆逆首尤以譚紹光鄧雲官陳炳文鄧光明黃子澂等爲尤衆且悍此次蘇錫兩城之克勦除逆酋殆盡解散逆衆均各數逾億萬李秀成之巢穴旣失黨羽亦孤該撫據獲賊供稱該逆踉蹌西走隨行僅止兩萬餘人將赴金陵設法解圍計不得施則挾洪逆併其母妻眷屬由浙皖交界竄走江閩以尋回粵之路李鴻章自入蘇城徧察賊中規畫守禦頗饒賊智深以此會逸出江閩恐仍蔓延爲害其常州護逆陳坤書不甚耐戰杭州之陳炳文鄧光明聞忠逆勢敗思歸多不願從惟溧陽侍逆李世賢戰守俱悍且與忠逆同惡相結而陳鄧等逆曾以嘉湖蓄糧甚多必須死守幸而官軍各路布局皆穩金陵杭州再有一處得手賊更瓦解該撫擬於卽日馳赴錫城籌布進取令程學啟會同李朝斌劉秉章潘鼎新水陸各軍由平望太湖乍

浦兜剿而來冀與左宗棠蔣益澧一軍前後夾擊李鴻章劉銘傳各軍進圍常州宜興兜剿蘇境之賊冀與曾國荃鮑超之軍前後夾擊以分各路賊勢而固蘇滬藩籬所籌均極周至卽著曾國藩飭令曾國荃與左宗棠聯絡進止督率各路將領與李鴻章部勒諸軍相爲策應相機進取如賊欲由浙皖毗境竄出江閩各路由乍浦海口登船逃逸並著曾國藩左宗棠豫籌堵截沈葆楨現已力疾視事其餘江省饒信等防經營有素此時尤當嚴密設防不可稍涉疏虞並與曾國藩左宗棠隨時函商布置所有江忠義席寶田等軍現在是否尙駐贛饒境內亟應妥籌調度以赴事機會國藩前奏鮑超及王可陞等軍分駐東瀾溧水高淳及皖南甯池等屬左宗棠前奏劉典王開琳各軍以次由孝豐等處進發兼顧皖防諒皆各有成算在胸與李鴻章所籌定相符合金陵漸已合圍杭湖亦已分軍進搗時勢均有可圖該督撫等務須聯絡一氣層層進逼萬不可稍涉遲延惟賊勢雖衰而人數尙衆總宜力求穩愜以保萬全縱或各城收復稍稽斷不可令李秀成潰圍逃逸務將此賊就地芟除絕其根株免致竄擾完善辦理更形費手方爲至善將此由六百里各諭令知之欽此跪誦之下欽佩莫名臣維逆賊起事各渠魁之最悍者均已次第殲除以現存悍賊而論惟李秀成與李世賢而李世賢自金華敗遁後所部悍黨僅有存者勢敵不逮李秀成而與之同惡相濟然則官軍所宜併力急圖者李秀成李世賢而已蘇州未復之先李秀成已遁回金陵聞有欲挈洪逆出走之說臣處相距稍遠未得確耗然當徽池肅清之時揣賊勢必以皖浙爲

逃竄之路十月十四日咨商會國藩皖軍由甯國縣進廣德以力扼東壩浙軍由昌化於潛進孝豐以規湖郡准會國藩十月二十九日咨復廣德撫局未成各軍分守城隘別無大枝勁旅可以進剿廣德不克與浙師聯絡相應臣以皖軍既未能進剿廣德則浙師由於潛昌化以進孝豐既有兩面受敵之虞且所苦者皖浙交界各縣久遭蹂躪民多流亡田土荒廢殆盡不但無米可買且轉運亦極艱難非先取餘杭則軍食無從轉饋孝豐安吉之賊既均以食盡自走所存賊卡寥寥官軍不難剿賊而難於久駐是浙師亦不克與皖軍聯絡相應不得已乃留王開琳一軍三千三百人仍駐徽州之屯溪鎮伺賊所向截之而令記名總兵黃少春代統劉典所部會攻餘杭俟餘杭攻克乃可規德清以通水運也賊如由湖入浙臣力或能制之惟王開琳老湘營全軍雖在皖屢立戰功究之力薄勢孤難當巨股悍寇如果李秀成挾洪逆以來能否邀擊得手實無把握疊接會國藩臆言布置皖南所屬貼近江西各城此外別無大枝遊擊之師臣已三次函商連防不如近勦請其注意廣德以現在局勢言之金陵賊勢甚感覓路逃竄本在意中縱洪逆戀其巢穴誓以死拒李秀成李世賢等未必肯束手就戮縱李秀成李世賢等肯束手就戮而夥黨尙眾亦必覓路紛逃況現在句容溧陽廣德一帶現尙爲悍賊所據賊之必由此路逃竄殆無可疑設由廣德州竄入皖南腹地雖無糧可掠無人可據然賊果晝夜疾馳不數日即可出險誠恐守城各將來弗擊去弗追終成不了之局也會國藩慮無大枝遊擊之師意或在此然臣竊有請者賊勢實已窮

感官軍合計兵力亦不爲單如果權其緩急應之自能有濟就現在局勢而言蘇州既克杭州之圍正急悍賊鄧光明既誅陳逆炳文汪逆海洋均在杭餘兩城自救不暇海鹽平湖又已收復其海甯嘉興之賊不足爲蘇州之患也是李鴻章所部可緩攻嘉興其踞常州之逆爲陳坤書李鴻章既言其不甚耐戰自無能爲暫舍此不攻金陵一破常州亦必應手而下是李鴻章所部可緩攻常州惟溧陽一縣爲各逆眷屬所在守賊李世賢又狡悍著聞賊如思竄必假塗於此李鴻章如暫緩嘉興常州不攻派得勝之師由無錫移軍急攻宜興溧陽西北與曾國藩溧水守軍互相聯絡縱溧陽未能卽拔而此路要可無虞賊縱由溧陽衝出與廣德之賊合夥李鴻章之軍猶可躡蹤猛追不令善脫較之空此一路任賊竄過自爲勝之曾國藩力持堅守之議現在布置皖南江西一帶防兵固爲老成之見然賊知我以堅守爲主必不攻各將以堅守爲事必不戰倘賊捨城不攻從間道疾馳而過恐調撥尾追亦有所不及何如厚集兵力扼廣德建平東壩總要數隘與李鴻章一軍互相聯絡之爲得乎至江西距賊稍遠爲饒廣計均宜以嚴扼昌江力保上游爲主如婺源祁門石門諸處是也苟兵力有餘則仍以遠防廣德州甯國縣爲要至乍浦海口盜船無多不能容載多人巨股或不致從此漏逸臣思慮所及不敢不畢獻其愚伏乞 皇上飭下曾國藩李鴻章沈葆楨酌議可否臣拜摺後亦卽抄稿咨送所有覆奏籌辦情形謹附片具陳敬祈

聖鑒訓示謹 奏

左文襄公奏疏

初編卷十一

十一

議政王軍機大臣奉 旨另有旨欽此

議政王軍機大臣 字寄同治三年正月初二日奉 上諭左宗棠奏攻勦餘杭踞賊獲勝及覆陳籌

辦大略情形李鴻章奏常州擊退援賊力解奔牛重圍等各摺片本日已將常軍力戰解圍焚奪輪船等情明降諭旨宣示並出力各員照李鴻章所請獎敘矣奔牛一鎮爲鎮常要衝李秀成李世賢等巨酋方以死力護金陵老巢後路糾集大股圍困唐殿魁等新營並用輪船炸礮力爭其地官軍以少禦衆勢頗危險竟能力解重圍焚其輪船所辦尙好李鴻章既據曾國荃函會李秀成由金陵出城向句容而去又獲賊供圍奔牛時李秀成亦在其內是此賊猶恃其狡悍必欲爭此要衝以爲竄走之路與左宗棠所奏賊必由句容溧陽廣德一帶圖竄等情正相符合李鴻章現飭李鶴章劉銘傳等相機圖攻常城並防忠逆回援著卽妥籌兼顧左宗棠所部黃少春等軍攻勦餘杭踞逆東西北路均破壘獲勝蔣益澧攻杭一軍分紮錢塘等門裏賊中央不容竄走復進攻清泰門之觀音堂賊壘水陸進逼杭屬平湖乍浦海鹽之賊俱已投誠海甯州賊亦有獻城之說杭賊勢必益孤左宗棠進駐橫溪頭督剿餘杭至蔣益澧攻杭之軍必當有一先下嘉湖乃可次第肅清卽著督令所部迅圖攻取該督以賊中狡悍惟李秀成李世賢同惡相濟所當併力急圖現在蘇州已克金陵杭州均圍攻緊急賊勢必以皖浙爲逃遁之路廣德撫局未成曾國藩所部不數分兵進剿左宗棠留王開琳一軍仍駐徽州之屯溪鎮究恐力薄勢單如李秀成果

挾洪逆由此路突出恐不足資扼截而現在句溧一帶賊踞甚堅溧陽更爲賊之眷屬輻重所在李秀成李世賢復併力於此官軍獨唐殿魁等各營僅守奔牛一鎮頗覺空虛曾國藩左宗棠等老謀均不急求巨夕之功而欲併力聚殲使賊不得鋌走所見本同卽李鴻章疊克蘇錫各城與力爭奔牛亦必能識此意惟常州攻搗勢在垂克恐未能令各軍捨而他圖常賊雖不耐戰而守亦頗堅若不速籌攻克保無別生枝節李鴻章諒有成竹在胸左宗棠此奏爲曾國藩急應分兵以取廣德力顧東壩與浙師聯絡李鴻章急應由無錫攻宜溧使賊不致由此路鋌走自屬確有所見著曾國藩左宗棠李鴻章沈寶楨悉心商酌謀出萬全以期合力同心膚功迅奏爲東南半壁一勞永逸之計左宗棠片內稱已將所奏各情抄稿咨送曾國藩等酌議原片卽可毋庸抄給閱看江省之防據左宗棠奏以嚴扼昌江力保上游爲主昌江係屬何處著沈寶楨嚴密布置與皖境浙師相爲策應並遵前旨將饒信兩防各軍妥爲調度豫籌堵截奔牛降人前據李鴻章奏係邵小雙此次所保之邵之倫請賞加遊擊銜業經照准是否卽係其人現在該處守禦緊要該降人等是否出力可靠著李鴻章查明具奏欽此

... 卷之...

...

...

...

...

...

...

...

...

...

...

左文襄公奏疏初編目錄

卷十三

敬陳閩浙提鎮司道府各官年終考語摺

攻剿餘杭踞逆兩勝一挫情形摺

奏報收復海甯州城摺

瀝陳分別剿撫相機辦理片

奏報賊由蘇皖突竄浙境截剿迭勝摺

請飭張臬司帶勇赴任劉臬司募勇助剿片

奏報收復桐鄉縣城摺

附陳近日軍情片

陳明酌擬頒賞洋將人等物件片



Blank lined page with horizontal ruling lines.

左文襄公奏疏初編卷十三

敬陳閩浙提鎮司道府各官年終考語摺

同治二年十二月二十一日

奏爲敬陳閩浙兩省提鎮司道府各官年終考語密繕清單恭呈

御覽事竊維提鎮司道府等官例

於年終出考密奏

臣奉

恩命補授閩浙總督兼署浙江巡撫駐軍浙江於閩省文武多未接見受事

之初密詢閩撫

臣

徐宗幹吏治軍務人材臧否得以略悉梗概復飭藩臬及各巡道密察各府縣飭各府

密察所屬丞倅牧令飭各縣密察所轄之教職佐雜以操守性情才具緝捕四條爲課令各詳其事實聲

名分註各條之下以資考證其不及知而待察者闕焉浙江則相距稍近耳目易周地方甫經收復官吏

皆從新易置較易整理惟兩省提鎮實任者皆由軍營立功奉

旨特擢現在未能履任越級委護多

不得人浙江營員應行查辦者過多其奏留補用者又皆現在軍中未能分署各缺卽越級委護亦苦難

得其選通計兩省營務非俟大局戡定漸次整理實難遽期成效

臣

謹就現在各員分別出具切實考語

密繕清單恭呈

御覽其實缺未經到任及雖係署任而爲

臣

所素知者亦一併附列伏乞

皇太

后 皇上聖鑒謹

奏

攻勦餘杭踞逆兩勝一挫情形摺

同治三年正月初五日

奏爲官軍攻勦餘杭踞逆兩勝一挫恭摺馳奏仰祈

聖鑒事竊餘杭踞逆經官軍迭次攻擊勢甚窮

左文襄公奏疏

初編卷十三

感_臣馳抵橫溪頭卽飭各軍分路進剿十二月二十五日楊昌溶等督各營進攻北門調劉清亮等馬步七營助之康國器率各營進攻東路黃少春率各營由北路繞越以攻瓶窰鎮賊壘魏喻義簡桂林劉榮合等列隊西北以掣賊勢黎明乘賊未覺康國器急令康熊飛古捷芳丁應龍吳光亮等越濠而進連破東路賊壘四座逆賊大股來援官軍分投接戰斃賊數百名賊分黨千餘從楊家橋抄我後路康熊飛林本匹馬陷陣手刃數賊各營乘之賊敗潰立將楊家橋賊卡焚燬北路官軍乘勢急進張聲恆等由右路攻三里鋪賊壘劉清亮等由中路攻北門港邊賊壘連施槍礮轟擊該逆拚死抵抗朱明亮谷香山劉墩等從左路五聖廟下陡門而進梟水過河磨兵猛擊立破何家陡門壘壘五座殺賊千餘溪流爲阻蓋羣賊見官軍由中右兩路奮擊併力拒守而不意朱明亮等之從旁突進也是日東北兩路殺賊二千有餘陣斬闕天義李有慶等賊目多名奪獲旗幟槍礮偽印無算其黃少春一軍進攻瓶窰鎮賊壘鏖戰數時因逆賊負山修砌石壘死守不出官軍仰攻輒爲其礮石所傷僅破賊卡五處焚其壘外房屋而還二十

六日楊昌溶康國器仍率各營分路齊進黃少春亦率五營馳赴北路助剿劉清亮率五營及聶邦光廖渭臣等扼其中路楊昌溶督朱明亮劉墩谷香山余佩玉劉明燈張定元張人和馬雲標等各營黃少春率王正德李耀南等各營仍由五聖廟分兩路而進越餘杭縣城而北直搗林清暉首逆汪海洋老巢期與康國器一軍夾擊汪海洋率悍黨數千憑壘拒戰官軍奮力衝突自辰至未擊斃悍賊六七百名追過

小港緊逼汪海洋老巢該逆拚死回鬪官軍往來衝擊又斃賊多名緣賊巢阻水自固接仗之處港汊縱橫深可滅頂官軍已逼賊壘其收隊之路長互五十六里雙港夾之兩岸桑竹翳蔽勢難列陣楊昌濬以地勢狹險傳令收隊甫過橫港壘中悍賊悉銳來撲朱明亮劉璈余佩玉等在後督隊堵之賊復分伏港邊竹林排開槍礮余佩玉中礮陣亡各營弁勇之殿後力戰傷亡者共三百餘名其南門出賊數百經余萃隆等擊退西門出賊數百經羅大春等擊退康國器東路一軍亦斃賊數十名此十二月二十五日進攻餘杭克獲大捷二十六日先勝後挫之實在情形也二十七日杭州城外古塘踞逆率眾撲犯錢塘門外官軍營壘經高連陞等擊退斃賊百餘名二十八日楊昌濬黃少春等復列隊五聖廟遣輕騎誘戰賊仍伏匿不出臣惟餘杭城垣並非堅峻惟地勢平衍溝洫最多而汪逆所踞之林清堰在城北十里又溪流環匯之所進攻之路能魚貫而不能雁行官軍收隊爲賊所乘實由臣未能詳察地勢趣戰過急之故非將士戰陣之不力也首逆汪海洋在諸賊中最爲狡悍必須速殲此股庶浙西三郡乃可次第肅清現仍激勵將士設法攻勦務期迅速蒞事以利戎機所有此次血戰捐軀之福建補用副將余佩玉副將銜浙江補用參將張明遠儘先補用參將劉質彬游擊銜補用都司唐得勝游擊銜儘先補用都司李陞德藍翎都司陳吉進花翎補用守備陳宗懿從征數年樸勇善戰二十六日均以殿後力戰隕命實堪痛惜之至應請 旨飭部從優議卹並入祀湖南昭忠祠以慰忠魂謹據實馳奏伏乞 皇上聖鑒訓示

施行謹 奏

議政王軍機大臣奉 旨另有旨欽此

奏報收復海甯州城摺 同治三年正月初五日

奏爲官軍收復海甯州城恭摺馳陳仰祈 聖鑒事竊海甯州城濱臨大海雄踞下游爲杭垣東北屏

蔽僞會王蔡元隆擁衆萬餘竄踞其間致攻杭之師未能北渡合圍浙東之防亦時形喫重嗣因杭州餘

杭等處迭獲大捷蔣益澧一軍進薄鳳山清波湧金錢塘等門賊勢日蹙蔡元隆遁通款於前署海甯營

都司王錫馴轉稟蔣益澧願率所部獻城乞降蔣益澧來營密商臣以蔡元隆於大軍未至之先望風款

附其情與勢感乞降者不同當令其妥籌招撫蔣益澧飭署杭州府知府陳思燭署海甯州知州廖安之

先往覘之而自率親兵及總兵銜副將劉樹元所部並水師各營於上年十二月十六日馳赴海甯州對

江之小泗渡駐紮一面令王錫馴廖安之及花翎都司蔣益賢入城曉以禍福蔡元隆隨同廖安之等渡

江來見泣訴衷曲謂自幼在家讀書粗知禮義同治四年賊陷岳州被賊裹脅年甫十六勢難自拔茲幸

覩大軍哀懇曲貸罪戾俾得復爲 盛世良民死且不朽蔣益澧察其情詞懇切卽宣布 朝廷恩

德爲更名元吉飭令回城將被脅夥黨一律薙髮呈繳器械及僞印各件二十七日官軍入城蔡元吉率

其黨衆羅拜馬前歡聲雷動蔣益澧挑其精壯列爲元字八營交蔡元吉管帶駐紮城外聽候調遣責令

立功贖罪餘均資遣回籍蔡元吉自捐所部八營兩月口糧復捐給散遣之資衆心亦服現在海甯州城內有劉樹元楊應龍等營分部防守城外有張景渠葉炳忠等各營駐紮足資控制辦理尙爲周妥臣維海甯一城既下杭州賊勢更孤從此東北兩面可期逐漸合圍於大局實有裨益臣於官軍克復富陽之時卽奏稱俟餘杭得手卽當襲取海甯固我浙東之防斷賊退竄之路原謂餘杭既復則兵力始敷分布耳茲餘杭未復海甯卽已先下機勢順利固非始願所及蔡元吉雖久陷賊中而自拔來歸不煩兵力應援照童容海古隆賢投誠成案請 旨賞給四品翎頂以示激勵已革前署甯紹台道張景渠上年克

復鎮海甯波餘姚紹興各城頗著微勞此次防守西興一帶隨同蔣益豐辦理招撫諸事收復海甯州城亦屬出力應行查辦之前署海甯營都司候補都司王錫馴首先入城諭降隨同收復州城尙知愧奮合無仰懇 天恩將已革署甯紹台道張景渠免其治罪留營差遣以觀後效前署海甯營都司王錫馴

免其查辦仍以都司留浙補用並免繳捐資其餘出力員弁可否由臣查明俟克復杭城彙案奏請優獎伏候 皇上聖鑒訓示施行謹 奏

議政王軍機大臣奉 旨另有旨欽此

遞陳分別勦撫相機辦理片 同治二年正月初五日

再用兵之道勦撫兼施而實則撫之流弊極多非臨機應變措置得宜難免事後之悔臣自入浙以來祇

行解散一策而不敢輕議招撫者以此現在杭州城內及石門德清各逆會均有求撫之事海甯撫局一成各逆私相猜貳者更復不少頃准江蘇撫臣李鴻章密咨亦稱僞聽逆陳炳文呈遞帛書乞降臣以各賊逼聚一方勢實窘感其求降固在意中然事前之詐僞宜防事後之安插亦殊不易此中節目甚多惟有分別勦撫相機辦理乃為穩著臣惟當慎以圖之謹附片陳明伏乞

聖鑒謹

奏

議政王軍機大臣奉

旨另有旨欽此

同治三年正月二十七日內閣奉

上諭左宗棠奏官軍收復海甯州城一摺浙軍自杭州餘杭等處

迭獲大捷後僞會王蔡元隆踞守海甯州望風通款獻城乞撫經蔣益澧派令前署海甯營都司王錫馴等入城曉諭蔡元隆將被脅夥黨一律薙髮繳械投誠並捐資散遣其眾官軍遂於十二月二十七日入城當將海甯州城收復辦理尙爲周妥著左宗棠乘勢分軍北渡以期合圍杭城迅奏膚功用伸天討降人蔡元隆於官軍未至之先自拔來歸獻城反正著准其更名蔡元吉從優賞給四品翎頂已革前署甯紹台道張景渠隨同辦撫尙屬出力著免其治罪留營差遣以觀後效前署海甯營都司王錫馴首先入城尙知愧奮著免其查辦仍以都司留於浙江補用並免繳捐資其餘出力員弁著左宗棠查明俟克復杭城彙案保奏欽此

議政王軍機大臣

字寄同治三年正月二十七日奉

上諭左宗棠奏攻勦餘杭及收復海甯州城

各一摺請簡杭州要缺暨陳相機撫各片本日業將海甯收復情形明發諭旨宣示並照所請將張景渠等均免置議降人蔡元吉賞給四品頂翎矣蔡元吉雖所保稍優惟獻城反正功有可錄自與他處僅係脫身來歸者不同該督所稱蔣益澧將其精銳挑選入營卽交蔡元吉管帶人數已屬不少著左宗棠將該降人留心察看妥爲防範如有未盡馴伏恐滋事端之處仍須隨時量爲遣散並卽傳知蔡元吉此次優給頂翎乃朝廷逾格恩施俾益感奮該督所陳招撫一事流弊甚多事前之詐僞宜防事後則安插不易惟有分別剿撫相機辦理持論頗爲通達此時海甯撫局已成各逆私相攜貳其應如何乘機分別剿撫之處惟在該督妥爲籌辦僞聽逆陳炳文但有與侍逆及李秀成互相猜疑之說此時在李鴻章呈遞帛書乞降卽著左宗棠與李鴻章妥商辦理餘杭進攻兩勝一挫康國器楊昌溶等各軍攻破楊家橋等賊壘聲勢甚壯惟瓶窰鎮賊壘未能盡破至進攻林清堰賊巢因地勢未詳趣戰過急致爲悍逆汪洋所乘傷亡將士殊爲可惜所有此次攻奪餘杭城外林清堰賊壘血戰捐軀之福建補用副將余佩玉副將銜浙江補用參將張明遠儘先補用參將劉質彬遊擊銜湖南補用都司唐得勝遊擊銜花翎補用都司李陞德藍翎都司陳吉進花翎補用守備陳宗懿均著交部從優議卹並入祀湖南昭忠祠以慰忠魂現在海甯收復杭州賊勢益孤東北兩面可漸合圍且進攻餘杭諸軍不須再籌分兵他顧更可壹意併力攻取著左宗棠卽嚴督諸軍奮力攻擄速拔各城以奏膚功前據左宗棠奏稱江南賊勢已感恐其

分黨竄由皖南以犯江西當將所籌布置各情寄諭與曾國藩商同辦理旋據曾國藩奏侍堵兩逆已由甯國竄績溪調派毛有銘一軍過江前赴休甯堵截復經寄諭飭令與左宗棠前派徽防之王開琳一軍聯絡策應此次左宗棠奏報於賊竄績溪等情未經陳及殊深慮著仍遵前旨相機調撥出兵邀擊與曾國藩隨時聯絡防剿毋令賊得肆衝突復擾他處蔓延爲患杭州府知府一缺向係揀員調補惟此時爲地擇人卽著該督酌籌應行請補請調不必拘定資格總以得人爲要俟奏到時再降諭旨將此由六百里諭令知之欽此

奏報賊由蘇皖突竄浙境截攻迭勝摺

同治三年二月初二日

奏爲賊由蘇皖突竄浙境官軍截剿迭獲大勝恭摺馳奏仰祈

聖鑒事竊賊首李秀成李世賢久思

由皖竄浙以犯江西臣於上年十二月十三日附片覆陳卽一面飛咨曾國藩李鴻章沈葆楨熟商防禦之策於本年正月初五日忽接分水守將副將劉明珍飛稟初三日有賊由廣德州甯國縣竄入昌化縣白牛橋探稱卽上年擊敗之花旗賊匪劉明珍卽率所部數百人前往迎剿留一營扼河橋爲策應甫經過河遇該逆前隊花旗賊一百餘殲之跟追十餘里忽紅旗黃旗蜈蚣旗大股突至官軍乘其尙未成列分路衝入混戰數時賊愈聚愈衆官軍縱橫血戰仍穿陣而出是役劉明珍不知竄賊多寡又誤以巨股之盡爲花旗賊也故有輕敵之失賊亦不料官軍速戰又未測官軍多少疑前途山谷有伏亦止不追劉

明珍與參將黃本富均被矛傷數處收隊過河橋斷橋扼之雖殺賊約二三百名而官兵之傷亡者亦九十餘名初六日賊散屯昌化縣西北一帶數十里山中而蹤跡偏向西路臣知其將犯瀘遂也當飭記名提督黃少春由餘杭率馬步八營赴嚴州以出瀘安溫處道魏喻義率所部三營由新城回守嚴州道銜知府喻德成遊擊龍漢清兩營守金華新募來浙之副將戴奉聘等三營守衢州檄調總兵銜副將王開琳率所部老湘全軍由屯溪下趨瀘安與黃少春一軍夾擊並調水師新右營師船赴瀘助勦其桐廬梓溪等處亦添派師船梭巡黃少春初九日馳抵嚴州探報該逆已一股到徽州績溪一股向瀘安而竄其竄瀘安界者欲由威坪過河以竄遂安經瀘安守將副將唐連勝率所部師船堵截連日大雪溪流陡漲師船上下轟擊奪回賊所擄民船十六隻斃賊百餘名而賊之前隊已於十一十二等日由歙縣所轄深渡地方擄民船宵濟先是王開琳因賊已竄入績溪卽於初七日率所部由屯溪赴徽會同皖南鎮唐義訓馳赴臨溪截勦頗有斬獲賊卽宵遁潛由績溪山徑竄至遂安之昏口馬金街一帶王開琳比卽拔回屯溪繞從白濟嶺赴遂安截擊十五日馳抵遂安之中洲該逆率衆來撲總兵丁長勝副將鄧正達督隊痛擊參將康榮詔繼之立斃長髮悍賊千餘名賊敗竄昏口十七日王開琳率各營分路進勦昏口之賊該逆二三萬併力來拒官軍縱橫痛斃賊數百名賊敗走官軍乘勢追擊又斃賊千餘名將昏口各館踞賊勦洗殆盡其由遂安鮑村向馬金街而竄者適該處路狹湖深官軍從後感之羣賊自相蹂踐殺斃

溺斃不計其數時黃少春一軍至濟安港口茶園一帶署遂安縣知縣潘謨探賊已由深渡街口擄船過河將竄遂安遣人飛報黃少春立即拔營前進十六日馳入遂安縣城則附城之十都十一都十七都及二十五各都賊蹤已滿矣十七日黃少春督諸營由城北分三路進勦飭都司黃元吉副將李良平等擊左路之賊斃悍賊數百名副將周紹濂遊擊劉昌選擊中路之賊連破賊館四處亦斃賊數百忽騎馬賊二百餘斜抄而出大股賊匪復由郭村蜂擁而來周紹濂劉昌選且衝且堵勢漸不支黃少春及副將張福齊等率所部大呼陷陣立斃騎馬悍賊數十名周紹濂劉昌選乘勢回擊四面兜剿逼賊入郭村盡殲之是日賊爲王開琳所敗因探遂安縣城無官軍乃繞道向遂安而竄恰遇黃少春所部扼其竄路機勢湊合兩路獲捷共斃賊六七千名解散難民萬餘奪獲旗幟器械數千件騾馬數百匹實非意料所及也十八日該逆後隊仍由遂安之章村將竄昏口路過新橋黃少春督各營截之斃長髮悍賊近千名生擒二百餘名王開琳復率所部繞出昏口截殺又斃賊三四百名其向鮑村一路竄走者甫入谷口副將龔隆貴鄧榮達突起擊之殺賊二三百名餘賊翻山越嶺而遁是日又共斃賊千數百名解散難民數千其由昏口馬金街逸出竄往開化華埠僅千餘賊而已據生擒賊供首逆李世賢自上年十二月廿七日由溧陽竄過廣德州甯國縣分股一竄安徽之績溪一竄浙江之昌化由昌化竄遂者爲僞王宗李仁壽等前隊爲林逆正揚所帶廣東花旗賊及僞浦王譚星之義子所帶廣東賊李世賢尙在後未到也其

續溪一股亦繞從深渡過河與此股合併此次官軍所勦者爲廣東花旗股匪之後隊僞沛王譚逆及李逆仁壽等之前隊其林正揚一股三四千人已竄開化華埠現據探報遂安擊敗餘匪與此股花旗賊匪復由華埠繞江西玉山德興邊界竄至河口欲候大隊齊至再竄撫建至李逆世賢有言其行至昌化復行折回者有言其尙在續溪地方者十九日另股賊續竄威坪旋復驚遁蓋聞先竄之賊已經官軍痛勦不敢前來就戮也臣一面飛咨江西撫臣一面飭黃少春由馬金街華埠追勦并飭王開琳嚴扼瀘遂以防後股續至之賊竊維此次逆賊由溧陽廣德甯國突竄昌化數日卽到其颯忽可知自昌化繞竄歙南之街口深渡計程不過二百餘里乃遲至十日始能過河而後王開琳黃少春兩軍得以先後馳赴遂安痛予勦洗是則雨雪交作溪流路滑天之有意滅賊非人謀所及也現在沈葆楨於廣信玉山廣豐等處均已密布防兵賊前隊雖竄江西大局或可無礙記名提督強勇巴圖魯黃少春總兵銜副將王開琳被勦蘇皖竄賊冒雪奔馳連獲大捷實屬奮勉出力黃少春可否賞給清字勇號王開琳可否以總兵記名簡放其餘各將士可否擇尤保奏之處出自天恩所有截勦蘇皖竄出之賊五獲大勝實在情形謹據實具奏伏乞皇上聖鑒訓示施行謹奏

議政王軍機大臣奉 旨另有旨欽此

奏報收復桐鄉縣城摺 同治三年二月初二日

奏爲官軍收復桐鄉縣城恭摺馳奏仰祈

聖鑒事竊海甯州城經官軍收復後桐鄉與海甯相隔僅

三十餘里爲杭州通嘉興要路必先下此城始可分取嘉興石門等處蔣益澧於正月初二日飭蔡元吉

率元宇八營乘夜襲取桐鄉縣城桐鄉守逆僞朝將何培章見蔡元吉率軍突至梯城而上當開礮拒傷

蔡元吉勇丁百餘人初三日蔡元吉卽率所部分紮西南兩門蔣益澧復飭候選直隸州知州李邦達都

司謝茂勝率親兵六哨與已革道員張景渠副將葉炳忠所部馳往分紮桐鄉東北兩門何培章見官軍

雲集勢甚窮蹙乃遣人通款於都司張其光初六日隻身赴張景渠營中乞降願率衆卽日薙髮獻城並

呈繳軍械及偽印等件張景渠等商之蔣益澧以何培章情詞尙無詐僞自可准其投誠以省兵力當由

蔣益澧發給旗幟號衣等件飭令回城更換初八日官軍齊隊入城何培章率衆迎伏道左其被脅夥黨

除賞遣回籍外蔣益澧挑其精壯列爲章字六營仍交何培章管帶責令立功贖罪何培章因烏鎮雙橋

爲由杭入嘉要道願率所部前往駐守並自行捐給三月口糧嗣杭賊之赴嘉取糧者路經雙橋被何培

章所部擊走之臣查何培章雖係賊中巨憝然獻城就撫不致重煩兵力自應寬其既往以廣 皇仁

俟續有勞績再奏請給予獎敘至此次辦理招撫出力之遊擊銜都司張其光可否請免補各本班以遊

擊留於浙江儘先補用儘先守備陳紹請以都司留於浙江補用並請 賞換花翎署海甯州知州廖

安之請

賞戴花翎以示鼓勵之處出自

恩施理合恭摺馳陳伏乞

皇上訓示施行謹

奏

議政王軍機大臣奉 旨另有旨欽此

附陳近日軍情片 同治三年二月初二日

再蔣益澧收復桐鄉縣城後卽飭署杭州府知府陳思燭會同副將葉炳忠及蔡元吉各營進規嘉興以與蘇師聯絡浙師駐城之西南蘇師駐城之東北正月二十一日湖州悍賊二萬餘分撲烏鎮雙橋營壘杭州亦出賊萬餘逼近桐鄉焚掠冀解嘉郡之圍經蔣益澧督飭各軍擊退二十四日嘉興城外東北賊壘數座經蘇師攻克西面賊壘數座經蔡元吉攻克城賊之勢愈感其杭州城外官軍因偵知賊援嘉興記名提督高連陞會合總兵劉連陞水師各營及洋將德克碑所部於二十五日乘勢將望江門外賊踞石壘三座攻克斃賊千餘直逼城根城上礮石如雨官軍仰攻數時始收隊還臣維嘉興一城米糧充足杭州餘杭之賊俱仰給於此自何培章扼紮烏鎮雙橋杭嘉之氣中斷杭賊屢次來犯皆經官軍擊敗賊謀益沮現蔣益澧飭副將劉樹元亦進紮烏鎮並令蔡元吉分三營扼駐陡門遏賊旁窺烏鎮之路局勢可期穩固蔣益澧已於二十八日回留下老營臣當督飭各軍相機攻取所有近日軍情理合附片

陳明伏乞 聖鑒 奏

議政王軍機大臣奉 旨另有旨欽此

左文襄公奏疏 初編卷十三

請飭張臬司帶勇赴任劉臬司募勇助剿片

同治三年二月初二日

再侍逆李世賢一股上年十二月二十七日由溧陽廣德分股竄至潛安績溪一帶其前隊廣東花旗股匪已竄入江境江皖浙三省交界之區戰事方殷必應處處嚴防杜其竄越查福建之崇安浦城光澤等處皆與江浙毗連防務亦關緊要福建臬司張運蘭前在皖南帶勇未經赴任上年兩廣督臣毛鴻賓於該員假歸時奏調赴粵旋以高州克復首逆陳金剛被戮聞毛鴻賓檄止無庸赴粵可否請

旨飭下

湖南撫臣

兩廣督臣

速飭張運蘭即赴福建臬司本任並將所部勇丁挑選二三千名一併馳帶赴閩以資得力之處伏候

聖裁又署浙江臬司劉典回籍後接其來稟以浙江軍務方殷擬於本年春間葬

親事畢迅速回營臣已飛札飭其即在湖南本籍募勇丁三千編列隊伍配齊軍械由江西赴浙並飭令

路過江西時察探情形如須就近助剿即稟明江西撫臣相機辦理以期速為戡事理合附片具奏伏乞

聖鑒訓示施行謹

奏

議政王軍機大臣奉

旨另有旨欽此

同治三年二月二十日內閣奉

上諭左宗棠奏收復桐鄉縣城請將辦理招撫之員弁獎勵一摺浙

江桐鄉縣城為杭州通嘉興要路經布政使蔣益澧飭令蔡元吉乘夜潛師進攻復令李邦達等各率所部分紮桐鄉東北兩門偽朝將何培章見官軍雲集勢甚窮蹙潛遁款於都司張其光隻身赴張景渠乞

降呈繳軍械偽印各件桐鄉縣城當於初八日收復所有辦理招撫之遊擊銜都司張其光著免補各本班以遊擊留於浙江儘先補用儘先守備陳紹著以都司留於浙江補用並賞換花翎署海甯州知州廖安之著賞戴花翎以示鼓勵降將何培章獻城就撫並親率所部擊走由杭赴嘉取糧之賊尙屬真心歸正著准其免罪候續有勞績再行奏請獎叙另摺奏請將截剿由蘇皖竄浙之匪連獲大捷之出力各員給獎等語記名提督黃少春著賞給達春巴圖魯名號副將王開琳著以總兵記名簡放其餘出力將士著左宗棠擇尤保奏毋許冒濫該部知道欽此

議政王軍機大臣 字寄同治三年二月二十日奉

上諭左宗棠奏賊由蘇皖突竄浙境官軍截剿

疊勝並擊退嘉興城外賊匪暨嚴防江皖浙三省交界各摺片覽奏已悉昨因曾國藩奏侍逆率黨歸併湖州由安吉孝豐昌化遂安以竄江西當經諭令左宗棠添調兵勇分投遏截著該督仍遵昨日諭旨檄飭派出各軍將後股賊匪實力截剿毋令接續上竄江境違其撲犯撫建之謀至侍逆是否行至昌化又復折回抑尙在績溪地方著偵探明確分飭各軍奮力追擒以除巨慝蔣益澧一軍收復桐鄉縣城連克嘉興城外賊壘分軍駐紮嘉城西南與李鴻章之軍會合夾擊是杭嘉之賊勢已斷著督飭該藩司等迅圖攻拔嘉城以孤杭賊之勢花旗股匪前已竄入江境雖經沈葆楨派令韓進春等在玉山一帶堵遏尙慮兵力單薄且該逆現又竄及鉛山湖坊地方駸駸乎漸入腹地必得一枝勁旅前赴撫建遏截方可力

挫兇鋒臬司劉典既經左宗棠飭其在湖南本籍募勇赴浙卽著飭令迅速督勇起程卽於路過江西時
察探賊蹤迎頭勦擊以保完善而維大局所請飭令張運蘭帶勇赴任一節本日已寄諭毛鴻賓催令起
程桐鄉降將何培章仍令帶所部駐紮烏鎮雙橋是否可靠仍著該督隨時加意察看將此由六百里各
諭令知之欽此

陳明酌擬頒賞洋將人等物件片

同治三年二月初二日

再上年克復甯波慈谿餘姚各城英國領事官福禮等九員隨同助勦出力經臣奏明可否請旨嘉

獎並由臣傳旨賞給物件於同治二年十二月初九日欽奏寄諭左宗棠所請傳旨賞給該員

等物件是否已有成說惟未明言何項賞件礙難懸擬著將各該員等勞績細加察核應如何分別賞資
銀兩物件功牌之處一面酌擬賞件頒發一面奏聞並摘錄此旨內嘉獎數語宣示其或需賞給銀兩或
需酌賞物件只須酌定一項填註旨內至功牌爲外國人所重無論或賞銀兩或賞物件均不可無功牌
功牌如外國寶星之類崇厚李鴻章並曾製造有式可仿照辦理也等因欽此臣當卽恭錄行知甯紹台

道史致諤將各該員勞績等次核明以便分別給獎茲據史致諤開列清摺並聲稱上年助勦除夏復
禮等九員外尙有英國參將銜兵頭葛格兵頭芬治法國兵頭法蘭克等三名均屬出力開保時遺漏應
請一併補獎等情前來臣維功牌與寶星雖同爲外國人所重然寶星一項事費工鉅必須外洋匠人製

造方能合式不如功牌本爲中國名器

頒賞達人尤爲羣情所欣羨

臣已另行刊刻擬請

賞給

英國總兵哇樂德克頭等功牌一張盤龍功賞頭等金牌一面閃緞衣料四件湖縐四匹大荷包一對小荷包一對法國參將權授中國兵官德克碑頭等功牌一張盤龍功賞頭等金牌一面閃緞衣料二件湖縐三匹大荷包一對小荷包一對英國領事夏復禮閃緞衣料四件湖縐四匹大荷包一對小荷包一對法國稅務司日意格法國兵頭法蘭克法國參將銜兵頭葛格英國水師都司達費士英國兵頭芬治二等功牌各一張盤龍功賞二等金牌各一面閃緞衣料各二件湖縐各二匹大荷包各一對小荷包各一對法國教主田雷思英國繙譯官有雅芝三等功賞金牌銀牌各一面閃緞衣料各二件湖縐各二匹大荷包各一對小荷包各一對英國都司波格樂英國兵船參將銜醫官伊爾雲三等功牌各一張功賞銀牌各一面閃緞衣料各二件湖縐各二匹大荷包各一對小荷包各一對

旨填註旨內飭交甯紹
台道轉給各該員祇領以上各件均經史致譔再三稟商探知各洋將之情得此已爲榮幸之至應附片
陳明請 旨伏乞 聖鑒施行謹 奏
議政王軍機大臣奉 旨知道了欽此

...

...

...

...

...

...

...

...

...

...

...

...

...

左文襄公奏疏初編目錄

卷十四

奏報浙師獲勝並會蘇師攻克嘉興府城摺

援案請將降人蔡元吉賞保文職片

附陳杭州餘杭攻勦情形片

奏報攻克杭州餘杭兩城摺

詳陳攻克杭州餘杭兩城實在情形摺

陳明錢貴仁事前通款貸其一死片

洋將助克杭城出力擬請 獎賞片

奏報克復武康德清石門三縣摺

陳明進駐省垣設局賑撫籌辦情形片

截勦竄賊兩獲大捷并規湖郡情形摺

陳明覈減紹興府屬浮收錢糧摺



左文襄公奏疏初編卷十四

奏報浙師獲勝並會蘇師攻克嘉興府城摺

同治三年二月二十三日

奏爲湖州援賊竄犯桐鄉烏鎮浙師截剿獲勝並會合蘇師攻克嘉興府城恭摺馳奏仰祈

聖鑒事

竊嘉興府城外賊壘經蔡元吉等會合蘇師於正月二十四日攻克後蔣益澧復派兵扼紮桐鄉所轄之烏鎮雙橋賊勢愈感湖州首逆僞普王楊輔清僞佑王李遠繼僞戴王黃呈忠等率黨數萬竄犯烏鎮雙橋妄冀掣動官軍以解嘉郡之圍而擾我海甯桐鄉甫經撫定之局蔣益澧派令同知楊道洽率所部馳往援剿並令副將葉炳忠四品翎頂蔡元吉各營回駐桐鄉署杭州府知府陳思燭及團總監生章文盛練勇仍逼嘉郡西南兩門以與蘇師聯絡二月初七初八初十等日湖州援賊由陡壘搭浮橋偷渡經蔡元吉所部擊退該逆糾合大股自烏鎮爐頭鎮三里街陡壘雙橋等處連營數十里直撲桐鄉西門蔡元吉帶所部馳援斃賊多名十五日會合楊道洽所部分路進攻爐頭鎮三里街賊壘張景渠亦派陳紹張其光督隊助剿蔡元吉督所部奮力衝殺手受槍傷筋骨俱斷猶裹創力戰賊乃敗走乘勢將爐頭鎮三里街等處賊壘十餘座一律踏毀實斃賊二千餘名生擒百餘名十六日李遠繼黃逆呈忠乘官軍築壘未就復率悍黨萬餘來撲元吉副中營營官軍功楊嘉玉力戰受傷勇丁傷亡者五十餘名勢正危迫蔡元吉與李邦達楊道洽各率所部馳至鏖戰三時賊仍死拒不退蔡元吉率親兵從深林繞出賊後

縱火猛擊賊陣始亂楊道治麾所部夾擊共斬悍賊三百餘名落水淹斃者四五百名奪獲旗幟軍械無算十七十八等日蔡元吉復率所部力攻陡壘賊壘克之十九日乘勢進攻烏鎮與副將劉樹元軍功何培章夾擊斃賊二三百名生擒百餘名餘賊悉向高橋萬年橋等處竄遁此湖州大股援賊竄犯桐鄉烏鎮浙師截勦獲勝破壘之實在情形也其嘉興府城迭經蘇軍痛勦於二月十七日大舉環攻晝夜未息十八日轟塌北門蘆蓆圍城垣十餘丈申刻蘇軍由東北兩門衝殺而入署杭州府知府陳思燭督同章文盛所部併力攻勦當將郡城克復首逆僞榮王廖發壽已受重傷率敗賊奪路竄走鹽河潮斃者無數此蘇浙官軍會克嘉興府城之大概情形也臣維嘉興一府本浙西腴郡爲官軍與賊所必爭賊首廖發壽前往蘇州納款迫蘇軍壓境旋復中變杭湖兩郡各逆復調悍黨赴援並冀擾動海甯桐鄉新復各州縣勢頗披猖幸賴蘇軍之力嚴扼嘉郡東北兩面力破堅城俾平仁海鹽新復各區不致復遭擾害厥功甚偉所有在事出力員弁兵勇應由江蘇撫臣李鴻章保奏浙軍於收復海甯桐鄉後分守兩城復擊敗杭湖會援嘉湖之賊亦屬著有微勞而四品翎頂蔡元吉及所部縱橫血戰勞績尤著可否由臣查明保奏之處出自 恩施所有各戰情形謹據實馳奏伏乞 皇上聖鑒施行謹 奏

議政王軍機大臣奉 旨另有旨欽此

再四品翎頂蔡元吉自率眾投誠以來迭著戰功自應量予獎勵查咸豐五年湖南救援江西克復袁州府城案內降人李能通曾保通判候選此次蔡元吉勞績較著其在家亦曾讀書識字意欲求保文職以自別於降人可否援照李能通成案請以通判歸部候選之處出自 天恩伏候 聖鑒訓示謹

奏

議政王軍機大臣奉 旨另有旨欽此

附陳杭州餘杭攻勦情形片

同治三年二月二十二日

再杭州餘杭兩城自入春以來官軍晝夜轟攻賊勢日益窘感惟堅踞城壘固匿不出僞聽王陳炳文於上臘遣其族兄陳大桂赴江蘇撫 臣李鴻章處求降李鴻章據稟咨商 臣以越省勦賊則可受降則不可請其就近辦理嘉興勦撫事宜而諭該首逆赴 臣處遞稟聽候察勘乃該首逆於陳大桂未回之先即將

杭城圖爲內應之人悉行殺害比陳大桂自蘇來營又未攜遞該首逆降稟是其投誠空詞未可遽信 臣

與蔣益澧薛時雨面諭陳大桂該首逆如果實心投誠應卽獻城散眾以表誠信二月十七日陳大桂入城仍無音耗 臣密飭蔣益澧相機圖之勿墮緩兵奸計二十一日蔣益澧督水陸諸軍分路進攻鏖戰竟

日力拔古蕩觀音塘壘十座斃賊無數生擒二百餘名德克碑於饅頭山開放大礮轟塌城堞數丈其餘杭各軍先夕四鼓環轟城壘斃賊無數比曉收隊已刻復出隊猛攻城壘賊齊出官軍奮力衝殺近

則刀矛相接遠則槍礮環轟計共斃悍賊千數百名遙見杭城西南一帶濃煙四起知杭軍業已得手乃收隊而還其竄濱安威坪一股續圖竄越江西者覘知浙軍截勦前股被創仍卽折回甯國縣大塔嶺下一帶復於十二日由甯國翻山竄入湖州孝豐縣南鄉飢憊不堪侍逆前竄至甯國昌化時聞蘇軍攻宜興始由甯國回竄旋聞宜興溧陽經官軍克復乃竄湖州其悍黨潰散已多昨攻拔杭州城外各壘訊據生擒各賊中有侍逆餘黨竄出者所供如此現在江皖賊麇聚湖州俟杭餘兩城得手自應迅圖湖州杜其四竄臣惟當慎以圖之仰紆 慈廑所有各戰詳細情形及亡傷各員弁容卽核明陳奏謹先將大概附片陳明伏乞 皇上聖鑒謹 奏

議政王軍機大臣奉 旨另有旨欽此

議政王軍機大臣 字寄同治三年三月十一日奉 上諭左宗棠奏截勦湖州援賊獲勝並會克嘉

興府城及杭州餘杭攻勦情形降人蔡元吉請賞文職各摺片收復嘉興戰狀前據李鴻章奏報已明降諭旨宣示矣湖州大股援賊竄犯桐鄉烏鎮經蔣益澧諭派各軍截勦獲勝破其壘壘餘賊竄遁並會合蘇軍攻克嘉興府城在事員弁均屬出力著左宗棠擇尤奏請獎勵惟嘉興克復後李鴻章派員留守並分守海鹽乍浦平湖各城現在江陰楊舍一帶尙有賊衆屯踞常州尙未克復曾經諭令左宗棠分兵替防嘉興海鹽等城以便李鴻章所部各軍併力勦辦蘇境之賊著左宗棠仍遵前旨迅派得力將弁駐守

各城倖蘇軍得以騰出兵力痛勦江陰屯踞之賊進規常郡昨經李鴻章奏報杭州省城業經浙軍於二十三日攻克茲據奏稱蔣益澧督飭水陸各軍攻薄餘杭縣城斃賊甚衆遙見杭城西南一帶濃煙四起知官軍業已得手等語杭城此時是否收復著左宗棠確探詳細情形迅速具奏江皖敗賊膺聚湖州如杭州餘杭均已克復卽著左宗棠督率全軍約會蘇軍迅圖湖州殲除巨寇毋令一賊旁竄以期肅清全浙同膺懋賞前次上竄江西之賊已至新城距閩省光邵一帶甚近左宗棠須會商徐宗幹調撥兵將嚴密布置不可令其竄擾完善降人蔡元吉既據奏稱自投誠以後屢著戰功此次求保文職以自別於降人卽著照所請准其以通判歸部候選以示獎勵將此由六百里諭令知之欽此

奏報攻克杭州餘杭兩城摺

同治二年二月二十五日

奏爲官軍攻克杭州餘杭兩城恭摺馳奏仰祈 聖鑒事竊杭州餘杭兩城踞逆經官軍於二月二十

一日攻勦克獲大勝後勢極窮蹙蔣益澧復親督水陸各軍於二十三日乘勢奮攻慶春艮山武林等門晝夜不息賊膽愈裂是夜五更急啟武林門向德清一路竄走蔣益澧督隊入城殺斃賊匪無算當於二十四日卯刻將杭州省城克復餘杭之賊亦於二十四日卯刻由東門逃竄臣於二十一日戰勝後知賊竄必速卽預飭各營整隊以待是日見城中火起各營分路跟追至瓶窰鎮該處本有賊壘數座逆賊因被迫窮迫卽憑壘併力拒抗臣得報後親率各營前往追勦乘其驚魂未定務當痛予殲除俟將竄往瓶

審之賊肅清再進省垣布置一切所有克復兩城詳細情形容俟查明再行具奏理合先將大概由驛六
百里加緊馳奏伏乞 皇上聖鑒施行謹 奏

議政王軍機大臣奉 旨另有旨欽此

同治三年三月十二日內閣奉 上諭左宗棠奏攻克杭州餘杭兩城一摺杭州餘杭兩城踞逆經官
軍於二月二十四日攻勦得獲大勝賊勢極爲窮蹙蔣益澧復親督水陸各軍於二十三日乘勢奮攻慶
春艮山等門晝夜不息賊膽愈寒是夜五更急啟武林門向德清一路竄走蔣益澧督隊入城殺賊無算
卽於二十四日卯刻將杭州省城克復餘杭之賊亦於二十四日卯刻由東門逃竄經左宗棠預飭各營
整隊以待是日見城中火起各營分路跟追餘賊敗竄瓶窰鎮此次官軍將杭州餘杭二城同日克復辦
理甚爲得手所有竄逸餘匪卽著左宗棠督飭兵勇迅速追勦盡殲醜類毋留餘孽閩浙總督左宗棠自
督辦浙省軍務以來連克各府州縣城池茲復將杭州省城餘杭縣城攻拔實屬調度有方著加恩賞加
太子少保銜並賞穿黃馬褂浙江布政使蔣益澧自調任浙江以來戰功卓著屢拔堅城茲復親督各軍
克復杭州省城實屬奮勇異常著賞穿黃馬褂以示優獎所有在事出力將士著左宗棠查明擇尤保奏
欽此

議政王軍機大臣 字寄同治三年三月十二日奉 上諭左宗棠奏官軍攻克杭州餘杭兩城一摺

本日已明降諭旨將左宗棠加恩賞加太子少保銜並賞穿黃馬褂蔣益澧加恩賞穿黃馬褂出力將士
令左宗棠擇尤酌保矣杭州敗匪竄向德清餘杭敗匪亦竄踞瓶窰鎮左宗棠現擬親赴瓶窰鎮督勦著
卽馳赴該處迅速進攻務乘該逆喘息未定之時將此股悉行殲除其竄往德清之賊亦著左宗棠派兵
勦除毋留餘孽昨據左宗棠奏稱淳安威坪股匪續圖竄越江西者現仍折回甯國竄入湖州之孝豐縣
侍逆亦由甯國竄入湖州等語是各路悍黨業已歸併一處正宜乘此軍威厚集兵力四面兜勦著左宗
棠迅速派撥兵將進規湖郡以期一鼓殲除肅清浙境左宗棠既須勦辦瓶窰之賊又須赴杭州布置兼
須進勦湖郡用兵處所甚多且距浙江邊界漸遠賊氛四逼深恐或有疎虞所有浙江及江西交界邊防
並著曾國藩左宗棠會商妥籌兼顧嚴斷賊匪竄越之路斷不可爲其所乘致掣全局廣信一帶地方卽
著沈葆楨分布兵勇嚴密堵扼以防湖郡敗匪竄入毋稍大意蘇省常郡尙未克復楊舍股匪爲數衆多
前經疊諭左宗棠分兵替防嘉興海鹽等城以便李鴻章所部各軍併力勦辦蘇境之賊惟湖州一城悍
賊麇聚若徒以浙省之師圍攻恐其力不厚諸悍賊尙得伺隙旁竄著李鴻章酌量移調兵勇會同浙省
之師夾攻以期迅速克捷湖郡既克則蘇省無後顧之憂嘉興等處駐防之軍均可撤回洋將戈登上年
冬間隨同官軍克復蘇州省城曾經給與賞銀一萬兩並由李鴻章另給銀兩以酬其勞此次克拔杭城
洋將德克碑曾於餓頭山開礮先行轟塌城垛數丈亦應給予獎勵惟德克碑與戈登情形不同應如何

酌給獎勵之處著左宗棠李鴻章會同商酌妥籌辦理以免歧異將此由六百里各諭令知之欽此

詳陳攻克杭州餘杭兩城實在情形摺

同治二年二月初一日

奏為詳陳攻克杭州餘杭兩城實在情形仰祈 聖鑒事竊杭州餘杭兩城經官軍於二月二十四日

卯刻同時攻克業將大概情形先行馳奏在案二月二十一日蔣益澧派記名提督高連陞率副湘四營
攻清泰門外觀音堂賊壘總兵劉清亮率五營助之水師總兵劉連陞唐學發副將羅啟勇率所部登岸
助勦派副將周廷瑞遊擊徐文秀率湘軍六旗並楚軍前營閩字右後兩營忠毅軍漳詔勇攻古蕩賊壘
派洋將德克碑用大礮轟攻鳳山門城垣蔣益澧分親兵五哨助之而自率親兵四哨為諸路策應卯刻
高連陞劉清亮等齊抵觀音堂督隊猛進賊伏不出官軍一擁齊上飛躍過濠羣賊驚竄立破賊壘二座
賊卡數處聽逆陳炳文率悍黨萬餘來援劉清亮劉連陞唐學發羅啟勇各率所部繼至蔣益澧復督親
兵並參將馬得順馬隊馳往策應酣戰一時賊始敗退然壘中槍礮雨集城上礮石火彈齊發賊巢垂破
復完時德克碑在餓頭山開放大礮已將鳳山門城堞轟坍三丈餘蔣益澧調轉大隊搶上高連陞劉清
亮副將王聯芳等緊逼城根洋兵十餘名及守備丁賢發等奮勇先登城賊拚死抗拒勇丁被傷百餘名
高連陞王聯芳均為槍礮所傷猶裹創力攻逾時始收隊還其周廷瑞徐文秀等進攻古蕩賊壘因賊營
隔水環攻未下乃分兵先攻葛嶺賊壘忽悍賊千餘由錢塘門外狂奔來援都司賀國輝副將蔣榮彩截

擊敗之周廷瑞徐文秀賀國輝王東林乘勢將萬嶺賊壘兩座攻克共斃賊七百餘名無一漏網各壘之賊始望風而潰王東林周廷瑞徐文秀又連破武林門外二壘副將曹魁甲都司胡榮連破古蕩二壘追至武林門外十里街始收隊而還二十三日蔣益澧復派徐文秀等四營攻十里街賊壘劉清亮等七營擊武林門援賊副將劉清望等三營及蔣榮彩水師攻錢塘門城根賊壘高連陞所部四營會同洋將德克碑花勇由鳳山門進攻總兵王月亮等兩營由清波門進攻劉連陞唐學發羅啟勇副將謝永祐遊擊布興有水師各帶五成隊登岸分攻望江清泰各門以掣賊勢蔣益澧自率親兵往武林門督戰徐文秀周廷瑞王東林賀國輝督隊銜枚疾進至十里街旁始發號擂鼓乘之各勇爭先搶取木橋竹籤越濠而進該逆伏於壘內見官軍逼近排礮轟擊勇丁被傷數十名徐文秀親執小旗冒礮躍進內濠周廷瑞賀國輝接踵而上該逆死拒不退官軍之奮勇登壘者屢上屢蹶徐文秀足受矛傷各勇益憤環攻益力正猛擊間首逆陳炳文率悍黨萬餘來援劉清亮等各營分投堵擊王東林率所部橫截而出席得元率親兵四哨馳往策應賊稍却時周廷瑞等奮攻賊壘勢已垂破城中又出賊數千蔣益澧飭都司謝茂勝陳念親率洋槍隊緊逼城門轟擊其先出者悉被槍傷不敢復出惟陳逆炳文拚死相持壘賊恃有外援亦堅守不動鏖戰三時斃賊極多而官軍傷亡者已四百餘名矣未申之交大雨驟至官軍仍嚴陣以待雨止復攻直至酉刻收隊其高連陞王月亮劉清望劉連陞德克碑等分攻各門城壘亦因城賊槍礮太密

未能得手是日城壘雖未攻拔然兇悍之賊已多傷亡聽逆恆擾特甚是夜四鼓潛啟武林門逃竄蔣益
澧當飭各營派勇潛伏城根偵伺四更後柝聲漸稀忽聞城中人聲鼎沸蔣益澧急派徐文秀周廷瑞賀
國輝王東林劉清亮李運榮翁桂秋李世祥馬雲標胡榮李國棟羅三綱葉紀來等分兩大隊由武林錢
塘等門衝殺而入蔣益澧率親兵繼之徐文秀周廷瑞王東林等由武林門一帶截殺並將藏匿各街巷
之賊悉行駢戮人馬紛馳屍骸枕藉呼號喊殺之聲震聞數里其高連陞德克碑王月亮劉連陞唐學發
羅啟勇謝永祐余朝貴張志公張政順丁賢發姜子豹布興有等亦各率所部同時由鳳山清波清泰慶
春等門梯城而入四路搜殺約共斃賊數千名生擒千餘名拔出難民無數奪獲槍礮器械無數登於二
十四日卯刻將杭州省城攻克蔣益澧一面分軍移紮各門一面抽派馬隊跟追沿途又斃賊數百名此
二十四日攻克杭州省城之實在情形也其餘杭踞逆入春以來官軍迭次攻擊頗有斬獲康國器所部
各營二月十六十八等夜攻倉前李家塘等處賊壘斃賊近千名二十夜臣飭各軍環攻城壘火箭炸彈
飛墮壘中賊勢驚亂至曉收隊已刻復出康國器令遊擊林本參將吳光亮所部爲前隊同知康熊飛參
將古捷芳遊擊林珠等繼之遊擊蔡盛恩所部截剿倉前援賊該逆見官軍驟至率黨數千前來逆戰吳
光亮林本等督隊衝擊立斃悍賊數十名賊勢不支後隊之賊又蜂擁而至康熊飛古捷芳等馳往接戰
斃賊無數乘勢將附近蔣元壩賊卡焚燬僞裕王劉逆率悍黨來援吳光亮古捷芳康熊飛林本併力痛

擊立將劉逆轟斃並斬黃衣賊目多名賊敗走時倉前援賊由橫渡橋斜抄而出蔡盛恩力戰斃先鋒悍賊數名忽中槍落河身死古捷芳康熊飛等馳救斃賊數十賊愈裹愈厚古捷芳往來馳突手刃黃衣紅衣數賊亦力竭陣亡勢正危迫林珠率所部突圍而入康熊飛吳光亮林本等復奮力衝殺賊始奔潰官軍乘勢掩殺又斃賊數百名其西門所出之賊經已革總兵羅大春知府劉璈等各營截殺百餘名南門所出之賊經總兵楊和貴等擊殺數十名賊經此次挫敗勢愈窮蹙將城內輜重婦女悉搬入城外壘中以備轟攻城壘賊益怖二十四日黎明汪逆海洋率黨急由東門向瓶窰一路竄走羅大春與總兵劉榮合副將簡桂林等分路追殺各營亦乘勢跟追斃賊數百名其東門各處之賊尙有未及逃竄者悉被康國器所部各營勦殺追過東門數里殿後悍賊見官軍逼近拚死回拒林本簡桂林匹馬衝殺被賊砍傷仍裹創力戰賊復敗走羅大春等追至瓶窰而杭城之賊亦已竄至與瓶窰踞逆憑壘併力抗拒臣得報飛飭各營加派隊伍躡蹤緊追自率親兵繼進賊聞官軍大隊連至卽夜竄走臣馳抵瓶窰卽飭各營疾追馳十八里抵安溪關該處地勢險峻羣峯矗立前撫臣曾修築礮臺一座於此以資控扼汪逆之守餘杭也以瓶窰扼北路又於安溪關築一大石壘護之比由瓶窰敗竄至此卽分斷後悍賊半伏壘中半匿林內妄冀官軍攻壘分股從後包抄羅大春劉榮合楊和貴道員朱明亮張聲恆等馳至審視地勢先

將伏賊搜勦殆盡乘勢攻壘賊不能支紛紛潰竄當將安溪關要隘攻克共奪獲大礮數十尊擡鳥槍千餘桿旗幟刀矛無數二十六日張聲恆羅大春等復分路出安溪關追勦曉霧迷漫咫尺不辨張聲恆率所部五營由中路轉戰而前適入賊伏勇丁傷亡者二百餘名勢幾不支朱明亮羅大春楊和貴等由左路率所部奮衝殺立斃悍賊數百名生擒白號衣賊數十名奪獲汪逆姓旗數十面洋槍礮械無算賊仍敗走其前隊一趨德清一趨武康與踞城之賊會合抗拒臣飭各營緊追武康之賊飭楊昌濬率親兵暫駐瓶窰爲各路策應飭蔣益澧分督各營速攻德清石門之賊以期規復湖州斷賊回竄之路此二十四日克復餘杭縣城並攻奪各要隘追賊至武康之實在情形也竊維杭州爲全浙根本餘杭又爲杭州西北屏蔽逆首陳炳文汪海洋負隅死守力抗大軍數月以來攻勦殆無虛日茲幸兩城同時克復浙西大局漸可次第肅清此皆仰賴 皇上福威諸文武同心協力得以迅奏膚功用彰 天討據各處

探報逆首黃文金李遠繼等麇聚湖州侍逆李世賢及各悍賊圖竄江西因瀉遂各軍截斷退竄宜溧又因宜溧已經蘇軍克復復竄湖州是湖州爲蘇皖諸逆逋逃淵藪最爲喫重臣自當殫竭心力慎以圖之賊在浙境則圍攻賊出浙境則追勦務將積年逋誅劇寇聚而殲旃免致流毒完善地方又成不了之局至於機勢之順利與否則亦未敢逆計也此次克復杭州餘杭兩城在事文武不無微勞足錄浙江布政使額哲爾克克巴圖魯蔣益澧調度有方忠勤丕著記名提督廣西左江鎮總兵尙勇巴圖魯高連陞樸

勇善戰能人和應如何

加恩以示優異之處伏候

聖裁浙江督糧道楊昌濬請

賞加按

察使銜江西記名道康國器請遇有福建道員缺出請

旨簡放並

賞加按察使銜記名總兵王

月亮劉榮合均請

賞加提督銜並

賞給該員三代從一品封典記名總兵劉清亮請以提督記

名請

旨簡放記名水師總兵楊政謨劉連陞均請

賞加提督銜補用副將周廷瑞請遇有總兵

缺出記名請

旨簡放總兵銜補用副將劉樹元副將王聯芳均請以總兵記名請

旨簡放總兵

銜候補副將彭大光請遇有閩浙水師總兵缺出請

旨簡放浙江補用副將簡桂林請遇有閩浙總

兵缺出請

旨簡放並

賞給勇號已革總兵羅大春請開復原官遇有閩浙總兵缺出請

旨

簡放記名總兵楊和貴請

賞給勇號副將曹魁甲請

賞加總兵銜並

賞給該員兩代二品

封典補用遊擊徐文秀請免補遊擊以副將仍留浙江遇缺卽補並

賞加總兵銜副將銜補用參將

李運榮請以副將補用並

賞加總兵銜浙江候補副將羅啟勇請

賞加總兵銜並

賞給勇

號副將銜補用參將馬德順請以副將仍留浙江補用並

賞加總兵銜副將銜江西候補參將吳光

亮請以副將仍留江西補用並

賞加總兵銜四川補用副將劉清望請以副將改留浙江補用並

賞給勇號補用遊擊余朝貴請以副將仍留浙江補用參將銜江西補用遊擊林珠江西補用遊擊林本

均請以參將仍留江西補用並加副將銜補用遊擊翁桂秋請以參將補用並加副將銜浙江遊擊席得

元陳念親梁雲山均請以參將仍留浙江補用並加副將銜遊擊銜都司王東林請以遊擊仍留浙江儘先補用並加副將銜遊擊銜都司賀國輝張志公請以遊擊留於浙江補用並加副將銜花翎都司謝茂勝都司銜守備張政順丁賢發李世祥均請以遊擊留於浙江補用花翎都司胡榮請以遊擊補用花翎守備姜子豹請以都司補用藍翎守備銜千總李國棟請以守備補用並加都司銜福建補用道朱明亮請 賞加按察使銜運同銜浙江補用同知魏光邴楊進治請免補本班以知府仍留浙江遇缺卽補知府銜湖南儘先補用同知直隸州知州吳作梁請免補本班以知府仍歸湖南遇缺卽補並 賞給

該員祖父母父母兩代正四品封典候選同知康熙飛請免選本班以知府留於浙江補用遊擊高有志請以副將儘先補用參將丁應龍署浙江提標遊擊補用參將布興有均請加副將銜其餘出力員弁兵勇可否由臣查明從優保獎出自 恩施其力戰陣亡之廣東卽補參將古捷芳江西儘先補用遊擊

蔡盛恩應請

旨飭部從優議卹其各戰陣亡員弁容俟查明再行奏請一併給予卹典臣拜摺後卽

入省垣辦理善後事宜並分飭各軍迅速攻剿所有克復杭州餘杭兩城實在情形理合驛由六百里馳

奏伏乞 皇上聖鑒訓示施行謹 奏

陳明錢貴仁事前通款貸其一死片 同治三年三月初一日

再杭城踞逆僞北王錢貴仁前曾遣人納款獻城嗣因人多謀洩被汪逆知覺將內應之人概行殺害錢

貴仁卽深自隱飾不敢輕舉昨次蔣益澧攻入杭城搜勦逆匪錢貴仁卽率其黨千餘跪伏道旁泣求免死據蔣益澧稟報前來臣以錢貴仁雖劫於兇威未能立功贖罪而事前通款屬實尙可貸其一死已飭令分別遣散挑留理合附片陳明伏乞 皇上聖鑒謹 奏

洋將助克杭城出力擬請

獎賞片

同治三年二月初一日

再權受中國總兵法國參將德克碑自議立條約以來最爲馴謹間有性急多疑之處一經坦懷指示並不爭執此次助攻杭城與記名提督高連陞同事見高連陞樸勇謹厚尤爲推重每次攻勦極肯出力杭城克復實著勞績擬由臣籌給紋銀二萬兩分賞所部當捷軍出力弁兵可否 賞加德克碑提督銜並賞給大小荷包衣料以示優獎之處出自 天恩伏候 聖鑒訓示施行謹 奏

同治三年三月二十日內閣奉

上諭左宗棠奏攻克杭州餘杭兩城詳細情形并將出力陣亡各員

分別獎卹一摺杭州踞逆經蔣益澧督率各軍分路環攻二月二十一等日迭破城外賊壘德克碑在饒

頭山開放大礮轟塌鳳山門城垛三丈餘該逆屢率悍黨抵死抗拒官軍奮勇攻擊殲斃甚多賊勢愈感

二十三日夜該逆啟門潛遁官軍四面梯城攻入搜殺賊匪數千名生擒千餘名卽於二十四日卯刻將

杭州省城收復餘杭踞逆經左宗棠督飭各軍晝夜環擊迭有斬擒賊衆洵懼二十四日該逆率黨急由

東門向瓶窰一路竄走當將縣城收復左宗棠馳抵瓶窰派兵追殺立將安溪關賊壘攻克餘賊向德清

武康等處敗走勦辦甚屬得手仍著左宗棠督飭各軍乘勝進攻湖州郡縣迅掃逆氛廓清全浙毋留餘孽浙江布政使蔣益澧奮勇勦賊克拔堅城前經降旨賞穿黃馬褂著再加恩賞給雲騎尉世職記名提督高連陞著加恩賞穿黃馬褂權受浙江省總兵德克碑帶兵助勦尤爲出力著賞給頭等功牌並賞銀一萬兩以示嘉獎道員楊昌濬著賞加按察使銜康國器著遇有福建道員缺出請旨簡放並賞加按察使銜總兵王月亮劉榮合均著賞加提督銜並賞給該二員三代從一品封典劉清亮著交軍機處記名遇有提督缺出請旨簡放楊政謨劉連陞均著賞加提督銜副將周廷瑞劉樹元王聯芳均著交軍機處記名遇有總兵缺出請旨簡放彭大光著交軍機處記名遇有閩浙水師總兵缺出請旨簡放簡桂林著交軍機處記名遇有閩浙總兵缺出請旨簡放並賞給傑勇巴圖魯名號已革總兵羅大春著開復原官遇有閩浙總兵缺出請旨簡放總兵楊和貴著賞給揚勇巴圖魯名號副將曹魁甲著賞加總兵銜並賞給該員兩代二品封典遊擊徐文秀著免補遊擊以副將仍留浙江遇缺卽補並賞加總兵銜參將李運榮著以副將補用並賞加總兵銜副將羅啟勇著賞加總兵銜並賞給確勇巴圖魯名號參將馬德順著以副將仍留浙江補用並賞加總兵銜吳光亮著以副將仍留江西補用並賞加總兵銜四川補用副將劉清望著以副將改留浙江補用並賞給勁勇巴圖魯名號遊擊余朝貴著以副將仍留浙江補用林珠林本均著以參將仍留江西補用並賞加副將銜翁桂秋著以參將補用並賞加副將銜席得元等三員

均著以參將仍留浙江補用並賞加副將銜都司王東林著以遊擊仍留浙江儘先補用並賞加副將銜賀國輝等二員均著以遊擊留於浙江補用並賞加副將銜謝茂勝等四員均著以遊擊留於浙江補用胡榮著以遊擊補用守備姜子豹著以都司補用千總李國棟著以守備補用並賞加都司銜道員朱明亮著賞加按察使銜同知魏光邛等二員均著免補本班以知府仍留浙江遇缺卽補補用同知直隸州知州吳作梁著免補本班以知府仍歸湖南遇缺卽補並賞給該員祖父母父母正四品封典同知康熊飛著免選本班以知府留於浙江補用遊擊高有志著以副將儘先補用參將丁應龍等二員均著賞加副將銜陣亡之廣東卽補參將古捷芳江西儘先補用遊擊蔡盛恩均著交部從優議卹其餘出力陣亡各員弁著左宗棠查明分別奏請獎卹該部知道欽此

奏報克復武康德清石門三縣摺

同治三年三月十二日

奏爲官軍克復武康德清石門三縣恭摺具奏仰祈 聖鑒事竊杭州餘杭兩城經官軍攻克後逆賊

一趨武康一趨德清臣以武康德清爲湖州屏蔽石門爲通杭湖要道必先克此三城而後可進圖湖郡

當飭楊昌溶督各營由瓶窰安溪關進規武康飭蔣益澄分軍進規石門德清飭知府李耀南副將劉明燈等馬步七營出孝豐武康之間截剿竄賊二月二十八日李耀南等各營破藤頭賊卡楊昌溶等各營破上陌賊卡進攻武康縣城先是武康逆目吳開俊會遣人通款於記名總兵羅大春約爲內應楊昌溶

以武康雖無城垣而

賊恐水

修砌兩大石壘極堅難以力拔令羅大春率所部先進曉以禍福一面飭副

將余萃隆簡桂林等各率所部並駐上陌逼之時陳逆炳文汪逆海洋及侍輔首戴利來各賊曾層聚德

清賊眾不下十數萬然震懼之餘驚雜特甚三月初一夜道員張聲恆令滿建桂挑降人趨捷者二十餘

潛入賊中燒賊營一座賊館數處羣賊驚擾達旦初二初三等日紛紛由德清西渡遁入武康羅大春率

親兵并礮船百餘號赴德西察看地勢遇賊於黃洞橋殺賊數十名溺死無算立將黃洞橋浮橋拆毀連

夜各營分伏武康城邊用火器攻擊城賊大震適降人楊芸桂等復遣人赴羅大春營中申內應之約初

四日羅大春楊和貴余萃隆簡桂林即率所部薄城環攻楊昌濬與總兵劉榮合道員朱明亮副將湛玉

連等繼之逆首吳海勝猶憑卡抗拒正轟擊間降人楊芸桂李文林向安邦李秀明彭玉桂金權衡等開

門延納官軍吳海勝棄卡逃竄羅大春等一面入城一面分兵追勦直抵三橋埠適德清之賊大股擁至

吳海勝復率眾回鬪官軍扼橋抗拒排礮轟擊斃賊數百名賊仍敗走此三月初四日克復武康縣城擊

敗德清援賊之實在情形也其德清一路經蔣益澧派令高連陞王月亮兩軍進駐上七鋪地方探悉陳

汪二逆將由德清竄走侍逆屢後初五日高連陞率數十騎馳抵城邊見城賊急出西門逃竄高連陞等

卽策馬衝入詎街巷破屋中伏賊突起其先竄出城之賊仍折回併力抗拒高連陞與遊擊余朝貴奮威

衝殺突圍而出隨招所部副湘四營會同王月亮閩字各營分路猛攻自辰至未鏖戰未息城賊洶懼棄

衛殺突圍而出隨招所部副湘四營會同王月亮閩字各營分路猛攻自辰至未鏖戰未息城賊洶懼棄

城而遁高連陞王月亮親率各營追殺斃悍賊數百名生擒七十三名奪獲大小船隻數十號旗幟器械無算當將德清縣城克復蔣益澧復飭知州李邦達四品翎頂蔡元吉率師進逼石門探聞踞逆鄧光明自上年十一月二十四日經餘杭官軍擊敗後光明爲擡礮子所洞垂死復蘇昇回石門未審確否遣人偵之鄧光明伏枕涕泣令其黨夥出城就撫而單身赴杭聽候審辦初五日李邦達蔡元吉立將縣城收復臣與蔣益澧提訊鄧光明據供罪民久已蓄意投誠因爲陳炳文所逼不能猝脫並述前杭城陷時曾以禮收殮撫臣王有齡學臣張錫庚之屍載至上海并衛送林福祥等出上海託其代陳衷曲不料林福祥等到後匿不以聞致滋疑懼現惟束身歸命以俟刑誅臣見其左手已廢疔瘡特甚縱令乞降非真抑亦殺之不武旣不忍以其求生而竄之死傷朝廷好生之仁更不敢因前奏該逆業已陣斃稍涉廻護因傳令免死令挑其黨之悍者分爲數營隨同進剿以規湖郡此三月初五日攻克德清并收復石門之實在情形也其先竄德清僞利王來王一股繞出武康之西圖竄孝豐初五日李耀南劉明燈聶邦光

張人和廖渭臣等各營旗出簪頭鎮截擊該逆急向荻浦竄去正追殺間聽逆陳炳文一股續又竄至聶邦光率所部橫截而出殺賊數百奪驟馬十餘匹賊勢大潰利逆率衆回援劉明燈張人和廖渭臣等馳至夾擊又斃賊數百餘逆棄械狂奔官軍乘勢追殺斃賊無算拔出難民數千其滿髮老賊陸續逃去者約六七百名此李耀南等各營於孝豐武康之間截勦獲勝之實在情形也該逆經官軍迭次痛擊人心

渙散李世賢楊輔清陳炳文等逆圖分路以竄廣德孝豐黃文李遠繼等逆圖守湖郡及見官軍逼近李逆遠繼又欲由安吉以竄甯國初八日高連陞等乘賊勢紛亂之時率師急進至離湖州四十里地方遇賊隊蜂擁而來縱兵大擊斃賊數千燒賊船千餘號羣賊望風潰竄頃據探報前由孝豐竄去一股已繞從千秋關太陽埠竄至昌化縣境臣前因蘇皖諸賊麇聚湖州卽慮突犯上游擾我完善之區致成不了之局當飭分水新城嚴州遂安各處守軍嚴防並調康國器張聲恆兩軍赴臨安截勦現賊既悉由廣德孝豐上竄嚴遂之防尤爲緊要臣又加派劉清亮各軍由新營以赴嚴州總兵唐學發彭大光兩營水師於桐廡一帶梭巡該逆裹糧而趨斷難持久若前路各軍能力扼奔衝後面各軍復躡蹤猛擊或可聚而殲旃卽有漏網他竄臣亦當督飭各軍出境追勦務將此股肅清以冀仰紓 聖座所有此次尤爲出力之道銜留浙補用知府李耀南請以道員仍留浙江補用候選直隸州知州李邦達請以知府留於浙江補用副將劉明燈請交軍機處記名遇有閩浙總兵缺出請 旨簡放總兵銜副將余萃隆請以總兵留於閩浙補用其餘出力員弁可否由臣存記俟克復湖州彙案保獎出自 天恩理合恭摺由驛六百里馳奏伏乞 皇上聖鑒訓示施行謹 奏

議政王軍機大臣奉 旨另有旨欽此

再臣於三月初二日進駐省垣巡視各城垛身間有轟塌之處尙易修葺惟駐防城身概行拆卸房屋但
子高崖台城以內倉庫衙署俱已蕩然無存街市房屋亦大半拆毀聞無事時省城內外居民共有八十
一萬餘口現除逃亡死故外陸續來歸及存留遺民合計不過數萬口一片劫灰傷心慘目蓋兩次淪陷
被禍爲尤酷也現已遴派員紳設立賑撫局收養難民掩埋屍骸並一面招商開市一面將急須修濬工
程辦理以期通商惠工暫救時局其餘善後事宜容再次第籌辦理合附片陳明伏乞
聖鑒

奏

議政王軍機大臣奉 旨另有旨欽此

同治三年三月二十六日內閣奉 上諭左宗棠奏楚軍克復武康德清石門三縣並截剿竄匪獲勝

一摺浙省官軍克復杭州餘杭後餘匪分竄武康德清等處經左宗棠派令楊昌濬蔣益澧等分路進攻
羅大春先將黃洞橋浮橋拆毀密飭各營伏武康賊壘之外火器轟擊逆匪大震三月初四日羅大春等
各率所部薄壘環攻逆首吳海勝憑卡抵拒降人楊雲桂等開門迎納官軍吳海勝逃至三橋埠地方復
率援賊回鬪官軍排礮轟擊斃賊無數當將武康縣克復德清一城經高連陞等併力猛攻自辰至未鏖
戰四時之久賊勢不支棄城而遁官軍分路追殺擒斬悍賊數百名奪獲船隻數十號器械無算德清縣
城亦卽收復蔣益澧復飭知府李邦達等直逼石門踞逆鄧光明出城就撫遂於初五日收復石門縣城

道員李耀南等並將圖竄孝豐匪股迎頭截擊殲斃無算拔出難民數千名勦辦均屬得手著左宗棠督飭諸軍一面搜勦敗賊一面迅拔湖州府城肅清全省所有尤爲出力之知府李耀南著以道員仍留浙江補用直隸州知州李邦達著以知府留於浙江補用副將劉明燈著交軍機處記名遇有浙江福建總兵缺出請旨簡放余萃隆著以總兵留於浙江福建補用其餘出力員弁准其由左宗棠存記彙案保獎該部知道欽此

議政王軍機大臣 字寄同治三年三月二十六日奉 上諭左宗棠奏官軍克復武康德清石門三

縣一摺已降旨宣示並將尤爲出力之知府李耀南等先行獎勵矣武康德清爲湖州屏蔽石門爲通杭湖要道現經左宗棠督飭各軍次第克復該逆疊受懲創人心渙散官軍自可乘勢進取湖州惟賊首李世賢楊輔清陳炳文等圖竄廣德孝豐李逆遠繼又欲由安吉以竄甯國而竄往孝豐之賊已繞從千秋關太陽埠竄至昌化縣境該逆窮無所之希圖突犯上游擾及完善之區爲苟延殘喘之計左宗棠現調康國器張聲恆兩軍赴臨安截勦並派劉清亮各軍由新城馳赴嚴州防勦唐學發彭大光督率水師於桐廬一帶梭巡布置尙屬周妥卽著嚴飭水陸各軍前截後追乘該逆喘息未定聚而殲旃不致漏網他竄方爲妥善江朝忠曾否已抵江省陳鳴志等所統江忠義營部現紮何處著沈葆楨酌度機宜或卽派此軍赴江西浙江毗連處所扼要駐紮以杜該匪上竄之路如已乘間闖入江境卽著左宗棠檄飭諸軍

迅速越境追勦務將此股竄匪悉數殲除俾江省得以悉力南豐新城肅清腹地高連陞等率師進趨湖
郡離郡城四十里地方擊賊獲勝羣賊望風潰竄此時計已緊逼城下官軍自必倍加奮勇左宗棠卽當
乘機鼓舞令其迅拔堅城廓清全浙前因嘉興克復諭令李鴻章督率李朝斌等會同浙軍設法進取湖
州現在浙軍業已前進並著李鴻章分兵會勦兩路夾擊用收速效該撫派兵援浙向能不分畛域此時
機有可乘尤當激勵軍士協力兜勦以竟前功現派何將何營會勦湖郡之處著李鴻章迅速奏聞廣德
甯國一帶係湖賊出竄要衝李世賢等現又有圖竄廣德等處之議該處防勦正緊會國藩前有會同浙
師在徽浙之交節節布置之奏刻下廣德甯國等城防兵是否足資分布著該大臣妥籌調派務將廣德
甯國一帶賊竄之路嚴密堵截毋稍大意致羣賊續犯江西又成不了之局鄧光明束身待罪左宗棠見
其左手已廢危瘡特甚准暫免其一死辦理自屬正大所部悍黨現經分爲數營隨赴湖州攻勦並著左
宗棠嚴飭湖州各營將領隨時加意防範毋令別滋事端江西大兵雲集所有竄踞南豐蔓延新城之賊
著沈葆楨激勵將士痛加勦洗務使前竄股匪盡皆殄滅庶後股不敢接踵而來於東南全局亦大有裨
益左宗棠另片奏進駐省垣籌辦善後事宜等語杭州兩次淪陷被禍尤酷存留遺民及陸續逃歸者合
計不過數萬覽奏曷勝矜憫左宗棠現已設局賑撫收養難民並將善後各事宜逐一興辦卽著督飭在
事官紳認真經理不可有名無實前據左宗棠奏訪查前署布政司麟趾湖州府知府瑞春均於城陷時

殉難諭令將該員等死事情形查奏此時杭城已復著左宗棠即將麟趾殉難詳細情形及道員進福有無下落一併查明據實奏聞知府瑞春著俟克復湖州後再行確查具奏將此由六百里各諭令知之欽此

截勦竄賊兩獲大捷並規湖郡情形摺

同治二年二月二十七日

奏爲官軍截勦竄賊兩獲大捷並現籌規取湖郡情形恭摺仰祈 聖鑒事竊武康德清石門三縣克

復後僞侍聽康利來首戴各賊曾擁衆十餘萬由安吉孝豐上竄僞堵王黃文金僞祐王李達繼僞輔王

楊輔清等逆仍堅踞湖州臣當飭蔣益澧派軍進攻湖州飭楊昌濬督各營進駐武康飭分水嚴州滄遂

各處守軍相機截勦三月初九初十等日該逆陸續竄至昌化縣境其前股已趨績溪十一日駐防分水

副將劉明珍率所部四營前赴昌化攔擊兼理昌化縣事署分水縣知縣邵杜亦率鄉團助勦將其後隊

截殺六七百名生擒悍賊百餘名奪獲旗幟刀矛數百件騾馬十餘匹十二日劉明珍復率各營追至白

牛橋搜斬粵賊二百餘名遣散者四五百名待逆李世賢及各逆繞由昌化十都過老竺嶺悉向安徽績

溪竄去復由問道走歙西之巖寺篁墪以竄屯溪其聽逆及僞康王汪海洋等逆均走歙縣之水南村分

路向南源口深渡過河以折竄小境十五日徑趨小川希圖分犯滄遂十七日駐防遂安總兵王開琳令

王福昌一營嚴守雪嶺黃蔚嶺自率親兵並龔隆貴羅瑞山喻勝榮三營由黃蔚村舉嶺進了長勝康榮

詔莫坤和三營並水師後營師船由威坪街口沿河直上行近小川該逆出隊來撲官軍奮擊羅瑞山喻勝榮匹馬衝鋒斃賊多名賊退據石橋官軍乘勢急進衝過橋北丁長勝莫坤和各率隊繼至師船遙於河中排礮轟擊斃賊六七百名賊敗走一向深渡一向小川裏山而遁王開琳磨兵趕殺約追七八里賊復回拒羅瑞山喻勝榮丁長勝莫坤和等沿山圍勦而上賊始大敗爭向山谷狂奔自相踐踏死者不計其數其向深渡逃竄一股亦經龔隆貴康榮詔截殺四百餘名落河溺斃者無算餘賊悉敗竄屯溪是役殺賊二千餘名生擒五百餘名踐斃溺斃者倍之此截剿昌化歙南竄賊兩獲大捷之實在情形也其湖州一路自初八日高連陞進勦獲勝後羣賊皆退聚菱湖東林山茅山菁山一帶修築堅壘復於西北之長興以至泗安梅溪安吉等處連營數十里相爲犄角臣以湖州四面臨水賊於附城二三十里地方均修堅壘並連營長興泗安等處必先將菱湖賊壘攻克東南兩面布置並妥始可移軍而西以期合圍當飭劉連陞水師各營駛赴德清飭蔣益澧分撥高連陞王月亮蔡元吉各軍由德清進規湖郡西南劉樹元何培章各營由石門進規湖郡東南十三十四等日劉連陞羅啟勇等各率師船進攻菱湖破賊一卡蔡元吉復率軍進駐埭溪二十二日湖郡之賊分路來撲高連陞王月亮營壘經各軍擊敗斬殺數百名賊潛竄洛舍圖攻官軍後路亦經高連陞等擊退此進規湖郡獲勝之實在情形也竊維浙江一省惟餘湖州一城及長興安吉兩城未卽克復賊數雖多然形勢漸感尙可緩圖惟蘇皖餘逆李世賢等與杭城

餘杭漏出首逆陳炳文汪海洋竄入皖境決意竄擾江西完善之區必須節節截勦預爲戒備雖未能聚而殲旃然勦平一股卽少貽江西一股之患多殺一賊卽少貽江西一賊之患臣於杭餘等城克復後卽

飭黃少春王開琳戴奉聘等嚴密准備並催調劉明燈李耀南劉清亮等各營馳赴嚴衢各要隘以厚兵力乃各軍甫抵嚴州而賊已竄至徽境逕竄屯溪鎮其勢可不由浙境以竄江西頃據探報賊之竄屯溪者又竄至婺源之江灣汪口等處踞江西之德興樂平已不遠矣臣方飭王開琳由馬金街出大鋪嶺以

趨婺源之南戴奉聘等三營由華埠出德興之東截之忽接黃少春飛報聽逆汪逆前股擊敗遁回屯溪後復翻白礫嶺折竄遂安昏口楊村一帶黃少春已帶所部馬步各營與王開琳一軍出楊村橫擊之魏

喻義李耀南等急馳赴馬金街圖與黃少春所派先駐馬金街之黃元吉李良平兩營合隊爲迎頭截擊之兵臣已飭劉清亮一軍速赴馬金街固未知能否趕到賊前也昨接署浙江臬司劉典來稟知新募之

軍四月初旬始可由湖南啟行道員王德榜回湘續募兩營已行抵廣信臣擬俟此股竄賊勦除後卽飭

王開琳王德榜戴奉聘各軍赴江西助勦與劉典一軍會合稍資厚集其黃少春劉清亮兩軍則仍應留防瀆遂俟湖州賊蹤稍定乃可他調蓋皖南之廣德州甯國縣績溪縣一路空虛湖州之賊以長興安吉爲出路一舉足卽入徽境不由此竄江西必由瀆遂竄江西未可任其衝突也所有此次賊竄昌化兼理昌化縣事候補縣丞邵杜赴鄉調團隨同官軍將賊擊退縣城未被其踞應請免其置議理合恭摺由驛

馳奏伏乞 皇上聖鑒訓示施行謹 奏

議政王軍機大臣奉 旨另有旨欽此

議政王軍機大臣 字寄同治三年四月十一日奉 上諭左宗棠奏官軍截剿竄賊獲勝並規取湖

郡情形一摺所奏蘇皖餘逆李世賢與杭餘漏刃之陳炳文汪海洋等賊竄至皖南圖擾江西各情與節次曾國藩沈葆楨所奏大略相同而左宗棠此奏稱於昌化小川深渡截剿疊有殲戮餘賊竄向小川裏山及由深渡悉竄屯溪當是皖南迤東一帶情形曾國藩前奏皖南賊勢甚重唐義訓毛有銘兩軍均有挫失祁黻休葵岌岌可虞當是皖南迤西各境逆氣更肆左宗棠所派王開琳等軍由馬金街出嶺以截賊於婺源之南德興之東又因汪逆折竄浙境遂安一帶勢不能不回軍合隊迎頭截擊其所續派劉清亮之軍赴馬金街若能趕到賊前速與諸軍併力截剿將康逆此股就地殲除則由皖竄江之賊勢又稍輕卽飭王開琳王德榜等各軍速赴江西會同劉典之軍厚其兵力助剿江境之賊其黃少春劉清亮兩軍自應留防遂安等境以俟湖賊勦平賊蹤稍定乃可移動惟皖南迤東之廣德甯國以至績溪一路空虛不但蘇境餘賊由此路竄走卽湖州之賊以長興安吉爲湖出路亦可由此竄徽以入江境毛有銘等近日軍威是否重整堪資截擊丹陽尙未卽克鮑超一軍赴援江西曾否啟行著曾國藩將皖南徽甯一路之防加意布置嚴督諸軍節節截剿卽未能將竄賊所至聚殲但能勦滅一賊卽少貽江境一賊之患

湖州官軍漸次合圍著左宗棠督飭高連陞等軍迅圖攻克浙省惟餘此城及安長兩邑未復並著速行掃蕩全清浙境李鴻章派赴助攻湖郡各軍前奏破賊錢瀆楊瀆著卽飭令乘勝會合浙軍併力攻擣以資得力江西南豐一城曾否攻克著沈葆楨嚴飭席寶田等各軍實力進攻所派精捷等營東馳前赴德興一帶攔截皖南續竄賊股並著飭令會合皖浙諸軍前截後追共收夾擊之效其劉典王文瑞兩軍並遵前旨催提星速來江以憑調遣該撫前奏又有飭令席寶田添招二千五百人此項新軍係由何處召募現在曾否招齊作何布置之處並由江甯閩之賊有無續往兵力能否支持均著隨時馳奏左宗棠摺內此次賊竄昌化兼理昌化縣事候補縣丞邵杜赴鄉調團隨同官軍將賊擊退縣城未被佔踞著照所請免其置議將此由六百里各諭令知之欽此

同治三年四月二十三日內閣奉

上諭左宗棠奏截剿上游竄賊連獲大勝一摺江浙敗賊竄入徽

境經左宗棠督飭王開琳等軍連日在楊村屯溪鎮等處分投兜剿疊有斬擒逆匪復趨遂安縣屬馬金街圍撲黃元吉營盤並經黃少春等軍分路環擊殲賊無算重圍立解餘賊在馬金街對河築壘官軍乘夜擊破分隊躡追劉明珍遇賊於屏風關外擊斃悍賊多名三月二十九日乘勝追至江西玉山縣境直逼城河溺斃賊匪無數王德榜一軍由城西北鳳凰山夾擊亦斬悍賊百餘名玉山之圍立解劉明珍等復分三路進剿齊抵賊巢該逆分隊迎拒王德榜劉明珍督軍橫衝入陣截賊數段逆勢不支紛向浮

橋潰竄墜河溺斃者甚多官軍復追及賊於沙溪由上下游躡擊斃賊百餘名勦辦尙爲奮勉著左宗棠
迅卽乘勝督飭各軍將沙溪屯賊悉數殲除毋任竄逸所有此次尤爲出力之副將劉明珍戴奉聘均著
賞加總兵銜參將張人和著以副將仍留浙江儘先補用都司黃元吉著以遊擊留於浙江儘先補用並
賞加參將銜其力戰陣亡之參將銜儘先遊擊廖渭臣副將銜參將黃應春參將銜遊擊彭光祥陳陞倫
都司劉開賢張禮宣劉宗聖均著交部照例議卹欽此

陳明覈減紹興府屬浮收錢糧摺

同治三年三月二十七日

奏爲覈減紹興府屬浮收錢糧恭摺奏祈

聖鑒事竊浙東各屬地丁南米經

臣上年奏明應一律覈

減並將温州府屬先行減定在案茲查浙東八府錢糧徵數以紹興爲最多浮收之弊亦以紹興爲尤甚
山陰會稽蕭山諸縣完納錢糧向有紳戶民戶之分每正耗一兩紳戶僅完一兩六分至一兩三四錢而
止民戶則有完至二千八百文或三四千者以

國家維正之供而有紳民輕重之別以閭閻奉公之

款徒爲吏胥中飽之資官司以賠墊爲苦民戶以偏重爲苦若不明定章程刪除浮費弊累日甚其何以
堪孟子論治以經界不正井地不均穀祿不平爲深憂者此也

臣於上年覈定溫屬地漕後卽飭奏調來

浙差遣候選知府戶部郎中顧菊生前赴紹興會同該管道府將歷年官徵民納實數及向來流攤各款
逐細清查分別裁減茲據顧菊生等稟稱紹屬八縣六場正雜錢糧有照銀數完納有照錢數完納殊與

定例有乖現擬統照銀數徵解其一切攤捐名目及道府各署陋規概行禁革并擬於正耗錢糧之外仍視各縣舊徵多寡每兩酌留平餘以爲各縣場辦公之用開送徵解留用數目清冊前來臣細加覆覈除正耗仍照常徵解外其紹屬八縣額徵地漕等款并蕭山公租電課銀四十五萬三千四百七十四兩零除新昌一縣徵數業經勒石毋庸議改外其餘七縣共實減去錢二十萬五千一百零六千文南米額徵本色米七千餘石折色米一萬五千二百六十七石零減去本色耗米三百六十一石減折色耗錢一萬二千零七十二千文六場電課額徵銀一萬四千三百八十九兩又蕭山牧租額徵錢一萬三千九百六十六千文實減去錢四千二百四十二千文計共減錢二十二萬一千四百二十千文米三百六十一石但能永遠遵守大小戶一律完納以十年通計之民間即可多留二百餘萬千之錢三千餘石之米矣既無須損上以益下民力自見其有餘亦無須哀多以益寡貧戶不憂其不足官之徵收有定章則上下之交肅民之完納有定數則胥吏之弊除此次明定章程之後臣當飭令各屬一體勒石遵守如有官吏陽奉陰違於定章之外添設名目多取分文者定卽立予撤參如有大戶不遵定章完納致官有賠墊之虞民有偏重之苦者亦必核實懲辦以昭儆戒所有核減紹興府屬錢糧緣由理合恭摺具陳伏乞 皇上聖鑒訓示再紹屬錢糧減定後戶部郎中顧菊生已飭令前赴甯波一律查辦合併陳明謹 奏

議政王軍機大臣奉

旨另有旨欽此

同治三年四月十一日內閣奉

上諭左宗棠奏覈減紹興府屬浮收錢糧一摺浙東各屬錢糧以紹

興徵數爲最多而浮收之弊亦最甚經左宗棠查明核減將紹興所屬八縣六場正雜錢糧等項紳戶民戶統照銀數徵解一切攤捐名目及陋規等項概予革除計除正耗仍照常徵解外共減去錢二十二萬有奇米三百六十餘石民困諒可稍蘇卽著照所議辦理嗣後並著爲定章永遠遵行不准再有紳戶民戶之別致滋偏重其地方官吏尤當潔己奉公剔除積習倘敢陽奉陰違添設名目格外需索及大戶不遵定章完納者卽著該督撫核實查參懲辦以重國賦而恤民瘼欽此



左文襄公奏疏初編目錄

卷十五

浙省餉項支絀陳請照常收捐摺

奏報進規湖郡迭勝並攻克孝豐生擒首逆摺

附陳江省近日追剿汪丁二逆獲勝情形片

附陳閩邊軍情片

陳明覈減甯波府屬浮收錢糧摺

陳明江省減成米捐已飭停止裁撤片



左文襄公奏疏初編卷十五

浙省餉項支絀陳請照常收捐摺

同治三年五月二十日

奏爲浙省餉項支絀用款浩繁應請照常收捐以濟要需恭摺奏祈 聖鑒事竊查浙省未經賊擾之

先曾經遵奉部行按照籌餉減成事例開辦捐輸以濟軍餉並遵續奉通行於例定銀數減二成外遞減一成其例減四成者不再遞減由司刊填實收分次詳請 奏獎嗣因省城失陷列郡淪胥捐事遂久

停辦迨同治元年臣奉 命撫浙因軍食匱乏復經 奏准照湖北章程開辦米捐年餘以來藉此

稍贖軍食惟查米捐章程實職虛銜照定例銀數減四成封典加級各項減四成外再遞減二成與向來浙省捐輸減二成僅遞減一成者有間見在興辦善後修築海塘在在均需鉅款必須勸捐辦理而又未便概入米捐請獎且以前尙有捐輸本境防勦經費未經 奏邀獎敘者再四思維惟有仍按浙省向

行籌餉事例減成章程凡報捐實職虛銜本減二成者仍遞減一成其已減四成者不再遞減均由司委員分投勸辦按次造冊分別 奏咨給獎事竣分案覈實報銷其應歸京銅局收捐分發等項並監生

補交四成實銀仍令捐生赴京上兌浙省概不收捐定例既相符合用款不無稍裨卽與見行米捐亦無窒礙據藩司蔣益澧具詳請 奏前來臣覆覈無異合無仰懇 天恩俯念浙省經費奇絀度支浩

繁准予照常收捐俾辦一切善後事宜不致竭蹶如蒙 兪允並請飭部由驛頒發各項虛銜封典空

白執照三千張貢監生空白執照二千張來浙以資填給除咨戶部查照外理合恭摺具奏伏乞 皇

上聖鑒訓示施行謹 奏

議政王軍機大臣奉 旨戶部速議具奏欽此

奏報進規湖郡迭勝並攻克孝豐生擒首逆摺 同治二年六月十四日

奏爲官軍進規湖郡迭獲勝仗並攻克孝豐縣城生擒首逆恭摺馳奏仰祈 聖鑒事竊高連陞蔡元

吉等將菱湖東林山要隘攻克後蔡元吉一軍卽進紮荻港一帶該逆見官軍漸逼調集城內悍黨數萬悉趨東南路力圖抗拒五月初十日出悍賊萬餘直抄蔡元吉營後並分撲長生橋官軍營壘蔡元吉督各營堅壁穩守相持竟日賊不得逞至夜賊潛扮官軍出小港希圖偷犯各營蔡元吉偵知密令洋槍隊二百名分伏於桑林待賊撲近突起轟之斃賊數百比曉該逆復出大股隔河而陣官軍出隊迎之因水阻未能痛剿計兩日共擒賊目三十餘名內有僞王一名僞天燕一名殺斃溺死者無數訊據生擒賊供堵逆黃文金糾集各僞王持十日糧誓與官軍決戰臣以賊勢既趨重此路蔡元吉所部兵力尙單當飭蒞益豐分撥師船並調都司湯葆元飛划一營前往助剿十四日該逆大股麇至蔡元吉督隊奮擊相持至暮該逆卽逼長橋亭子橋而營時總兵劉樹元因蔡元吉各營苦戰連日勢甚緊迫急率所部及洋將寶德稜花勇馳往策應新授温州鎮總兵劉連陞亦率水師各營移紮菱湖東林山下昂一帶以壯聲援

十六日劉連陞各營由荻港進發蔡元吉劉樹元督同陸軍助之賊憑河抗拒未能猝拔十七十八等日賊又於亭子橋添築兩壘蔣益澧以蔡元吉一軍連日鏖戰賊鋒未挫飭記名提督高連陞抽撥丁賢發錢桂仁兩營並調知府楊道洽一營馳往助剿二十日該逆復出悍黨數千分撲蔡元吉營壘環攻五時均經擊退羣賊益憤酉刻分七路來犯並用大礮向長生橋營壘轟擊勢極兇悍蔡元吉飭各營鎮靜以待約會水師各營憑河扼堵自率親兵馳赴長生橋力戰却是夜密令副後營營官楊成棟設計誘擒僞軍政司樂興等六名並餘黨數十名斬之該逆知蔡元吉各營有備不可攻復乘虛繞襲湖抄我後路劉連陞副將蔣榮彩參將梁雲山都司湯葆元守備劉仁和各營師船極力堵截高連陞派高有志洋槍隊百名助之二十四日該逆全股來犯劉連陞梁雲山率所部迎剿斃賊多名燒賊船十餘號賊勢少却劉連陞督師船乘勝追擊賊拚死回拒槍子如雨弁勇傷亡百餘名正相持間適高有志率洋槍隊抄出賊後楊道洽又適從餘杭調至率所部排列菱湖助之賊見援軍突至駭而奔二十五二十八等日間有賊黨出犯均經官軍擊走二十九日袁家匯賊目李得芳赴蔡元吉營中請降蔡元吉許之三十日親赴袁家匯擬督降人出其不意攻取未降各壘僞輔王楊輔清覺其有異即率悍黨來爭蔡元吉麾眾分路截殺羣賊潰竄遂將袁家匯賊壘一律焚毀率降眾七百餘回營蔣益澧當飭其將新附之眾編立一營餘眾分補各營缺額此五月初十日至三十日湖州東南路水陸各軍迭次血戰獲勝之實在情形

也方輔逆之並攻東南路也堵逆復分大股由太湖塘楊漢以向軌村希圖撲犯林墟何培英各營之後擊我兵力俾不能馳援長生橋等營五月初九日該逆率大股分撲章宇右營後營劉樹元飭何培英各營馳往截擊而自率所部繞出軌村兜剿適該逆正圖搶造浮橋渡河何培英乘其半渡擊之斃賊二十餘名餘賊溺水死者無算追至軌村該逆尙圖抗拒劉樹元率所部馳至夾擊該逆紛向太湖塘楊漢竄去嗣官軍百計誘攻賊俱伏匿不出劉樹元見太湖塘之賊暫無動作南潯一帶已有蘇軍駐紮而蔡元吉各營攻勦正當喫緊遂率所部及花勇馳援詎該逆又從太湖塘繞出林墟後路陸家灣一帶以拒蘇軍不時分黨至離林墟二三里地方擄掠劉樹元飭何培英率各營於二十四日進剿該逆負隅不出何培英派章宇右營抄出賊後兩路夾擊破其一卡其餘逆壘仍堅踞不退何培英督隊乘勝猛擊劉樹元亦馳往接應合兵兜剿立破賊壘三座餘賊棄壘狂奔官軍追殺數里將太湖塘楊漢等處賊壘一律掃蕩二十七日復分擊辰舍賊壘鏖戰三時破賊卡一座而還此五月初九日至二十七日湖州東路水陸各營迭次獲勝之實在情形也餘賊悉退四安梅溪與踞賊合楊昌濬以四安梅溪既添賊黨其勢必將上竄自率各營由牌頭進銅嶺扼之令知府劉琰副將劉端冕谷香山等三營會同周廷瑞等六營由黃湖進白水灣直搗孝豐縣城六月初三夜周廷瑞劉琰劉端冕谷香山潛師踰嶺以進黎明行抵孝城賊猶未覺瞥見官軍突至卽伏牆內施放槍礮官軍奮勇齊進受傷多名谷香山劉端冕躍過重濠揮兵直

入劉琰督隊繼之奮攻逾時賊勢不支哨長吳德華首先由南門梯城而上立斬僞坪天義潘和周廷瑞
督各營由東門攻入所部營官李有慶立斬僞天將洪恩坊城賊大亂紛紛奪路逃竄當於初四日午刻
將孝豐縣城克復周廷瑞劉琰麾軍追擊遙見羣賊擁一賊騎馬狂奔意其爲首逆也劉琰急率所部躡
蹤緊追至城北十五里阪山場外委李必得矛刺該逆落馬生擒以歸餘賊四散訊之卽僞感王陳榮也
是役斃賊千餘名生擒長髮廣賊二百餘名拔出難民婦女五六百名奪獲羸馬百數十匹此攻克孝豐
縣城生擒首逆之實在情形也臣維孝豐一城北通安吉東北聯安徽之廣德州甯國縣地方瘠狹又久
經賊擾荒苦特甚山谷幽叟餉饋極艱實非屯軍之所然安吉廣德州既尙爲賊踞甯國縣並無官軍湖
州踞賊如圖西竄皖南竄浙勢必假道於此已飭留劉琰劉端冕谷香山三營駐守其地扼之而楊昌濬
攻安吉之軍乃可免後顧之慮惟安吉一城當皖浙之交其險阻百倍於孝豐爲湖州賊必爭之地據楊
昌濬函報梅溪四安踞賊尙有數萬與廣德安吉之賊互相聯絡官軍進攻安吉則梅溪四安廣德之賊
必來救援恐有腹背受敵之患臣已緘商江蘇撫臣檄長興之軍分攻四安以掣其勢密飭楊昌濬如安
吉一時不能遽下或先攻梅溪搗其要脅庶湖州之賊與安吉劃而爲兩較易收功除克復長興詳細情
形由江蘇撫臣奏報外所有此次進攻湖州東西南三路尤爲出力之浙江補用知府劉琰請 賞加
道銜浙江補用副將劉端冕谷香山均請 賞加勇號四品翎頂候選通判蔡元吉請以同知歸部選

用並 賞加勇號其餘出力員弁可否由臣存記俟克復湖州彙案保獎出自 天恩理合繕摺由
驛六百里馳奏伏乞 皇上聖鑒訓示施行謹 奏

議政王軍機大臣奉 旨另有旨欽此

附陳江省近日追剿汪丁二逆獲勝情形片 同治三年六月十四日

再前竄江西康逆汪海洋一股由鉛山陳坊湖坊向上清宮一路竄走經總兵王開琳道員王德榜於五月初八九等日追剿於火田畝汪二渡黃沙港等處獲勝情形已由江西撫臣沈葆楨會奏在案茲據王德榜稟稱將陳坊湖坊等處肅清後旋准幫辦江西皖南軍務署浙江臬司劉典調赴臨江行抵貴溪探報賊目丁三洋圖由貴溪盛源洞竄過安仁鄧家埠一帶屯踞王德榜以該逆沿河直下如繞出我軍之前師行必阻當率所部疾趨安仁一面緘約王開琳由貴溪渡河截剿及王德榜於二十日馳抵安仁縣城該逆已竄踞鄧家埠羅田岡上一帶距安仁僅十五里矣二十日王德榜督各營進剿羅田岡上踞逆破之適副將戴奉聘率所部會同江西內河水師從上游搜剿而來羣賊大敗追至張家灘始行收隊二十三日進剿鄧家埠詎該逆於先夜搭造浮橋竄逸總兵蕭得龍等追至羣賊正在搶渡官軍乘勢感之瀾斃無算遂將北岸一律肅清賊悉向東鄉竄去王德榜正擬率各營進紮鄧家埠跟蹤疾進旋因連日大雨溪水暴漲不克過渡遂於鄧家埠對岸馬岡嶺駐紮六月初一日王德榜過河察看地勢行至梅

抗橋突遇賊數百擄糧而回當飭各營邀擊殲斃殆盡乘勢將界排村河村賊館掃蕩生擒賊目僞天燕黃正魁斬之前後拔出難民數千等情前來臣查康逆汪海洋一股見已悉由許灣下竄東鄉侍逆李世賢一股尙踞崇仁臣已飭王開琳一軍馳赴貴溪與王德榜相機渡河南勦必須將東鄉一路肅清方可與劉典一軍會合臣處相距較遠奏報未能迅速見楊岳斌已由水路起程計此時必已入江嗣後王德榜王開琳兩軍戰事應卽由楊岳斌沈葆楨奏報合併陳明伏乞 皇上聖鑒訓示謹 奏

議政王軍機大臣奉

旨覽奏均悉欽此

附陳閩邊軍情片

同治二年六月十四日

再六月初十日欽奉

上諭林正揚一股由福村回竄石城之豐山仍敗踞福村僞王宗一股由甯化

之安遠司竄近廣昌復退池源山背村中負隅不出是福建邊防愈形喫緊著左宗棠等督飭康國器一

軍確探賊蹤迎頭截勦徐宗幹懷遵諭旨迅催林文察等飛速內渡合兵會勦並飭在防諸軍嚴扼要隘其不能得力員弁仍遵前次諭旨加意察看隨時甄汰欽此臣維竄閩之賊僅林正揚花旗一起見已回

竄江西意圖合併巨股其近光澤建甯甯化等邊界時有賊蹤出沒暫尙未能爲害也揆度賊情非經江西痛勦窮感無歸必不能遽竄閩境惟延建邵河一帶匪盜素多急應速予誅鋤以靖內患見在康國器之軍已抵邵郡臬司張運蘭已據稟報率所部取道江西信豐定遠以入汀州臣已飛飭其各將邊腹土

匪迅速殲除確偵江西賊蹤相機兜勦張運蘭康國器久經戰陣自知以勦爲防不至畫疆自守惟閩省邊隘與江西緊接者自光澤至武平延亙千餘里客兵越境止能相機兜勦不便久遠屯戍致滯戎機臣

惟有與撫臣徐宗幹慎以圖之仰紆

慈廑至此次逆賊由江關入因閩省文武鮮知兵之員撫臣倉

卒調撥難期應手而臣調度稍遲亦難辭咎見已與撫臣函商將不能得力員弁懷遵疊次

諭旨隨

時甄汰以肅軍律不敢因循諉飾自外 生成所有閩邊情形謹據實附片陳明伏乞

皇上聖鑒

訓示謹 奏

議政王軍機大臣奉 旨另有旨欽此

同治三年六月二十三日內閣奉 上諭左宗棠奏官軍進規湖郡疊獲勝仗並攻克孝豐縣城生擒

首逆一摺五月初十一等日湖州踞逆由東南分撲長生橋官軍營壘復潛軍偷犯各寨經蔡元吉等

設伏迎擊斃賊數百生擒賊目三十餘名蔣益澧高連陞復派水陸各營助勦自十一日至三十日累次

獲捷焚毀賊船十餘號將袁家匯賊壘一律平毀其南路賊匪於五月初九日由太湖塘楊漢賊壘北犯

林墟何培英乘其半渡擊斃多名劉樹元馳至夾擊該逆敗竄我軍乘勝追勦將太湖塘楊漢賊壘掃蕩

殆盡其西路竄踞孝豐之賊分犯百丈裏經羅大春等擊退六月初三日周廷瑞等潛師抵城劉端冕躍

濠直入劉墩督隊繼之城賊紛紛逃竄初四日遂將孝豐縣城收復生擒僞感王陳榮斃賊千餘陣擒長

髮廣賊二百餘名拔出難民五六百名勦辦甚爲得手仍著左宗棠督飭各軍乘此聲威會合蘇軍迅將湖州克復此次尤爲出力之知府劉璈著賞加道銜副將劉端冕著賞給勇巴圖魯名號谷香山著賞給彥勇巴圖魯名號通判蔡元吉著以同知選用並賞給猛勇巴圖魯名號其餘出力員弁著俟克復湖州彙案保獎該部知道欽此

議政王軍機大臣 字寄同治三年六月二十三日奉 上諭左宗棠奏官軍進規湖郡獲勝並攻克

孝豐縣城生擒首逆一摺本日已明降諭旨將出力之知府劉璈等照所請分別獎勵矣孝豐既克則湖州安吉賊勢漸孤左宗棠已令楊昌濬進攻安吉恐梅溪四安等處之賊齊心救援將有腹背受敵之患著李鴻章檄飭長興得勝之軍分攻四安以牽賊勢必須湖州之賊與安吉劃而爲二方可收功湖州東路水陸各營已疊獲勝仗掃蕩賊壘不少左宗棠卽飭蔣益澧等各營水陸夾攻務須一鼓作氣迅克堅城此時金陵外城克復洪逆已如釜魚阱獸恐各處賊匪均無固志勢必紛紛逃竄且太湖廣袤數百里江浙路路可通尤須嚴密防維以免疏漏其廣德之賊恐與徽浙各逆互相聯絡是皖南一路根株殊難淨絕曾國藩左宗棠均須隨時兼顧免致臨時棘手蘇常各屬地方李鴻章飭各路守將認真防範毋稍大意左宗棠另片奏林正揚花旗一股已由閩回竄江西惟延建邵汀一帶盜匪素多急應速予誅鋤以清內患見在康國器之軍已抵邵郡張運蘭已由江西入汀州該督卽飭令該員等各將邊境腹地匪徒

迅速勤洗無任續有竄入閩省將吏如有不能得力者仍遵前旨嚴爲甄汰均隨時與徐宗幹咨商會辦勿稍瞻顧將此由六百里各諭令知之欽此

陳明覈減甯波府屬浮收錢糧摺

同治三年六月二十七日

奏爲覈減甯波府屬浮收錢糧恭摺奏祈

聖鑒事竊

臣將紹興府屬地丁南米減定後卽委戶部郎

中候補知府顧菊生前赴甯波會同該管道府覈實查辦茲據顧菊生等稟稱甯波所屬定海一廳鄞縣慈谿奉化鎮海象山五縣共徵地漕銀二十三萬七百三十一兩零南米額徵本色米五千九百九十八石零折色米二萬五千二百九石零鳴鶴穿楊清泉玉泉龍頭大嵩大場共徵電課銀七千四百四十八兩零查各屬浮徵之數雖不及紹興之甚而弊端亦在所不免當將各該廳縣場錢糧收納實數暨流攤各款逐細清查分別裁減除正耗仍照常徵解外計地漕項下共減去錢八萬九千二百五十八文南米項下減去本色耗米八百六十七石折色耗錢一萬三千九百零四文電課項下減去錢一千七百零八千文共減錢十萬四千八百七十文米八百六十七石自此次定章之後從前以錢數收納者皆飭令統照銀數收納不准有大戶小戶之分其一切攤捐名目及道府各署陋規概行禁革並擬請於正耗錢糧之外仍視各縣舊徵多寡每兩酌留平餘以爲各該廳縣場辦公之用開送徵解留用數目清冊前來

臣

覆覈無異除飭將減定新章頒示各屬一體勒石遵守外嗣後官吏固不准藉添名目多取分文

紳民亦不得稍違定章致形偏重務期年清年款積弊一除下裨民生上裕國課所有覈減甯波府屬錢糧緣由理合恭摺具陳伏乞 皇上聖鑒訓示再本年上半年上忙業已開徵新章應從下忙爲始其上忙浮

收之數已飭令照數劃出撥歸賑撫之用合併陳明謹 奏

議政王軍機大臣奉 旨另有旨欽此

同治三年七月二十六日內閣奉 上諭左宗棠奏覈減甯波府屬浮收錢糧一摺浙省甯波各屬所

徵地漕南米等項浮收之弊在所不免經左宗棠查明覈減將甯波所屬一廳五縣六場所有錢糧收納實數暨流攤各款除正耗仍照常徵解外其一切攤捐名目及各項陋規槩行禁革其減去錢十萬四千有奇米八百餘石民困諒可稍蘇卽著照所議辦理嗣後並著爲定章永遠遵行其從前以錢數收納者悉令統照銀數收納不准有大戶小戶之分至地方官吏尤當潔己奉公別除積弊如敢陽奉陰違添設名目格外需索及大戶不遵定章完納者卽著該督撫查參懲辦以重國賦而恤民瘼餘著照所議辦理該部知道欽此

陳明江省減成米捐已飭停止裁撤片 同治三年六月二十七日

再 前因軍餉支絀同治元年六月 奏請援照湖北減成章程開辦米捐於江西省城設立總局飭

前江西藩司李桓現任藩司孫長絨署鹽道沈元泰委員分赴各屬勸辦 軍賴資接濟惟江西自本年

以來兵事孔棘餉事愈艱現本省正擬開辦米捐浙捐未便同時並舉臣已飭停止將局裁撤其已收浙捐將來卽槩由浙省軍需項下報銷其劉典王開琳王德榜等軍餉併由浙省解江支發合併陳明伏乞
聖鑒謹 奏

議政王軍機大臣奉

旨該部知道欽此

左文襄公奏疏初編目錄

卷十六

攻勦湖郡安吉踞逆迭次苦戰情形摺

進規湖郡迭次苦戰獲勝情形摺

附陳日月山等處踞逆歸降並收復湖州城片

...

...

...

...

...

...

...

...

...

...

...

...

...

左文襄公奏疏初編卷十六

攻剿湖郡安吉踞逆迭次苦戰情形摺

同治二年七月初六日

奏爲官軍攻剿湖郡安吉踞逆迭次苦戰尙未得手現籌辦理情形恭摺馳奏仰祈 聖鑒事竊蔡元

吉一軍將湖郡東南路袁家匯賊巢焚毀後卽率所部進駐東埠堵逆黃文金見蔡元吉懸軍深入糾集悍黨於六月初八日起迭次攻撲蔡元吉營壘均經蔡元吉擊退初十日又分巨股繞出思溪雙福橋等處築壘以截蔡元吉餉道蔡元吉數次猛撲賊一面迎拒一面築壘未能攻克温州鎮總兵劉連陞記名總兵彭大光副將蔣榮彩都司湯葆元遊擊李錦堂各率水師知府楊道洽率陸師於初十一等日急起援之因港汊紛歧兩岸桑林薈翳官軍前進賊以槍划數百四出抄襲且桑林中伏賊各擊洋槍由暗擊明容易取準官軍深入亡失頗多蔣益澧稟商飭署湖州府知府李邦達督鄧光明各營由東林山馳赴菱湖會合劉連陞水師進勦思溪劉樹元何培英等由林墟進擊長超山並調劉清亮一軍由分水駐隸頭以厚兵力十八日復率親兵及賀國輝一營親赴菱湖督剿李邦達於蔣益澧未到之先十六日督鄧光明分三營紮孫家橋分一營紮鳳凰橋距雙福橋僅八里該逆乘槍划數百蜂擁來撲鄧光明飭各營一面築壘一面迎敵該逆會舟登陸猛撲五次均經鄧光明擊退十九日蔣益澧抵菱湖二十一日卽會合諸軍進剿飭李邦達督鄧光明各營攻思溪楊道洽率親兵洋槍隊護劉連陞等師船繼之高連陞

率所部攻雙福橋黃鎮湘率內河師船扼荻港並緘約駐南潯蘇軍會合張景渠各營攻晟舍劉樹元率何培英各營攻成兆以掣賊勢是日黎明各軍分路齊進蔣益澧率親兵先抵思溪卽飭鄧光明各營渡河分攻各壘該逆從桑林撲出鄧光明督隊奮擊賊敗走官軍乘勢進逼該逆伏於壘中密施槍礮鄧光明率各勇蛇伏而進將壘外花籬木椿拔棄一鼓突前壘已垂破忽援賊從左右樹林抄出鄧光明急撤隊迎敵壘賊亦趁勢來撲鄧光明奮威衝殺賊漸不支適劉連陞彭大光等師船駛近思溪賊以飛划迎敵因師船藥桶爲賊火箭所著霎時煙燄飛騰各船回救爲賊所乘正危急間楊道洽率洋槍隊李邦達率親兵馳至蔣益澧亦麾親兵策應賊始敗遁其雙福橋成兆晟舍等處各軍轟攻竟日亦未能得手二十二日水陸各軍專攻雙福橋該逆負隅不出二十三等日蔣益澧令鄧光明分三營偪紮思溪楊道洽一營緊傍河邊築壘護以水師二十五日飭鄧光明各營爲第一隊劉清亮等爲第二隊高連陞等爲第三隊蔣益澧率親兵爲第四隊更番迭戰該逆鼠伏不出相持至未申之交堵逆黃文金率悍黨數萬拚死來犯官軍分投迎敵蔣益澧飛馬馳往與高連陞督同賀國輝謝茂勝等併力猛戰洋槍隊連環轟擊逆黨紛紛敗退時已薄暮各軍正擬收隊該逆復大股衝出蔣益澧高連陞四馬陷陣各將弁一齊向前衝殺立斬大旗悍賊十餘名賊始潰敗是日鏖戰六時斃賊無算而官軍帶傷者數百人陣亡者數十人副將銜參將翁桂秋及鄧光明所部營官周大受俱被槍傷蔣益澧戰馬亦幾爲槍子所洞時洋將德

克碑見官軍連日苦戰願率所部洋槍隊並淺水輪船前來助剿二十七日蔣益澧率親兵攻思溪令高連陞德克碑攻雙福橋劉樹元攻晟舍三路齊進該逆憑河死拒不出德克碑用開花礮向雙福橋轟攻半日亦未得手蔣益澧隨於思溪雙福橋之間令高連陞偪紮五營鄧光明於雙福橋河邊添築一壘並飭馬雲標一營於大河沙洲駐紮以防賊船從後抄襲二十八九至初二日各軍奮力猛攻距蔡元吉營僅一河之隔因對岸賊營環迫未能得達而蔡元吉各營自六月初十日起晝夜鏖戰歷二十餘日糧已垂盡士氣未衰其勢甚危其志可憫臣見調省城防兵令署杭州協副將徐文秀遊擊王東林等馳往並飭水師總兵楊政謨一營助之然地險賊眾尙未卜能解此重圍否此賊圍東埠水陸各軍迭次猛戰尙未解圍之實在情形也其楊昌濬進扼銅嶺一軍於孝豐攻克後卽會同總兵周廷瑞於六月十八日分路進攻安吉周廷瑞攻西北兩門楊昌濬攻東南兩門楊昌濬所部各營銜枚疾進行抵城下天猶未曙各勇將濠外花籬竹籤拔去梯城而上將及城堞賊始驚覺急率悍黨死拒槍礮如雨副將銜參將朱尊賢攻破東門橋壘卡首先搶上礮臺立斬悍賊三名忽爲洋礮所中陣亡都司陳壽照亦受重傷總兵羅大春道員朱明亮等麾軍猛攻逾時迄未得手此西路各軍進規安吉猛戰未克之實在情形也竊維湖州北濱太湖東南則港汊紛歧桑林薈翳西南則嶺路複雜餉饋最艱故歷代取吳興皆由太湖廣德長興進兵以地勢順而糧道便也此次浙軍由東西南三面進攻剿數月未能尅期蕝事實地勢有以限

之安吉居萬山中負城數里野竹成林飛鳥不入官軍進取爲難守亦不易此臣前奏所以有緩攻安吉

先攻梅溪之議也然欲攻梅溪非蘇師進攻四安不足以分賊勢已與江蘇撫臣李鴻章函商及之昨接

孝豐守軍飛報據金陵逃出難民供僞幼主洪福瑨於六月二十一日由東壩逃至廣德二十六日堵逆

黃文金迎其入湖州府城查湖郡守賊黃文金楊輔清李遠繼等皆積年逋寇賊數之多約計尙十餘萬

此次互相勾結本有拚命相持之意茲復藉僞幼主爲名號召賊黨則其勢不遠他窺可知且江西兵力

漸集李世賢汪海洋諸逆如不得逞於江西則遁入浙閩復與湖州踞逆相首尾亦未可知臣惟有與會

國藩楊岳斌李鴻章沈葆楨慎以圖之以冀稍紓宸廑所有此次力戰陣亡之副將銜浙江補用參

將朱尊賢克復餘杭計功應保總兵合無仰懇天恩飭部照總兵陣亡例議卹以慰忠魂其餘陣亡

員弁容俟查明彙案請卹理合恭摺由驛六百里馳奏伏乞皇上聖鑒訓示施行謹奏

議政王軍機大臣奉 旨另有旨欽此

議政王軍機大臣 字奇 欽差大臣協辦大學士兩江總督一等侯曾國藩閩浙總督兼署浙江巡

撫左宗棠督辦江西皖南軍務陝甘總督楊岳斌江蘇巡撫一等伯李鴻章江西巡撫沈葆楨同治三年

七月十五日奉 上諭左宗棠奏攻剿湖郡安吉之踞逆疊戰尙未得手現籌辦情形一摺據稱賊

在思溪雙福橋等處築壘蔡元吉東埠營盤被圍屢次猛撲未能得手蔣益澧親抵菱湖會合諸軍進剿

飭李邦達等營攻思溪高連陞等攻雙福橋等處逆壘分隊進逼更番疊戰該匪鼠伏不出官軍頗有傷亡蔣益澧復親攻思溪洋將德克碑亦用開花礮助攻雙福橋均未攻拔左宗棠見調省城防兵令副將徐文秀等水陸往救並據報稱金陵逃出之僞幼主洪福瑱於六月二十一日由東壩逃至廣德二十六日堵逆黃文金迎入湖城爲號召賊黨之計等語蔡元吉一營孤懸東埤逆賊圍之數重該營糧已垂盡而士氣未衰亟應乘勢合擊以解重圍洪福瑱諒卽洪福壇昨據會國藩奏洪福壇積薪自焚茫無實據似已逃出僞宮李秀成供曾經挾之出城後始分散其爲逃出已無疑義湖熟防軍所報斬殺淨盡之說全不可信著會國藩查明此外究有逸出若干並將防範不力之員弁從重參辦此犯已至湖州必將號召羣逆爲久踞之計左宗棠正可督飭蔣益澧等令其激勵各軍許以重賞果能一鼓攻拔將洪逆及堵逆等悉數殲除則東南全就肅清朝廷必當破格施恩若遷延日久或令他竄亦必重治其罪不能因前曾立功稍從寬貸也此次力戰陣亡之副將銜參將朱尊賢著照總兵陣亡例議卹以慰忠魂其餘陣亡員弁仍卽查明請卹楊昌濬攻安吉之師旣不得手著卽令其先攻梅溪並著李鴻章督飭派出各軍力攻四安以分賊勢前派往金陵之礮隊等一萬餘人俱係精銳或派往四安或分赴廣德均可期其得力該撫向來不分畛域左宗棠亦非妒功忌能之人卽著李鴻章督令諸將弁認真助剿以收廓清之效並一面分兵嚴防湖賊旁竄各路廣德地屬數省衝要歷代規取吳興多由於此從前各路無兵可分是以

未能派兵駐守以致僞幼逆及黃文金等往來無阻見在江寧得勝兵將甚多昨據會國藩奏述李秀成供內有廣德不攻自遁之語可見廣德見在並非無賊著會國藩多撥精銳派得力將弁帶赴廣德攻剿如賊已遁去亦卽力扼要衝以免湖逆出竄皖南爲江西後路之患左宗棠李鴻章均應設法兼顧嚴密兜圍勿令旁竄江西兵力此時亦已厚集李世賢汪海洋諸逆不得違志於江西則將遁入浙閩與湖州踞逆相首尾且聞洪幼逆尙在難保不死灰復然楊岳斌沈葆楨亦當督飭諸軍妥慎防剿均須各就本地盡力剿除勿貽後患俾東南諸郡全就盪平以副委任將此由六百里各諭令知之欽此

進規湖郡迭次苦戰獲勝情形摺

同治二年七月二十九日

奏爲官軍進規湖郡迭次苦戰獲勝見籌辦理情形恭摺馳奏仰祈

聖鑒事竊湖州東南路蔡元吉

一軍被賊圍逼情形經

臣

奏明在案蔣益澧馳抵菱湖後親督各營奮力攻剿自六月二十一日至二十

九日冒暑鏖戰賊惟憑壘堅拒穴牆施放槍礮子密如雨迄未得手七月初二日蔣益澧於思溪雙福橋

之閒搶搭浮橋三座以通蔡元吉各營接濟適署杭州協副將徐文秀遊擊王東林兩營馳至蔣益澧卽

飭提督劉清亮知府李邦達楊道洽及鄧光明各率所部攻思溪徐文秀王東林繼之總兵劉樹元督何

培英各營及洋將寶德稜花勇攻成兆雙福橋蔣益澧自率親兵及提督高連陞副將李運榮參將陳武

職遊擊賀國輝李世祥馬雲標等分兩隊嚴陣以待飭洋將德克碑率所部花勇沿河排列助戰並以淺

水輪船載開花礮泊於河汊對思溪八角亭賊壘轟擊各營一面將竹筏搭架甫至中流賊壘洋槍齊發
乃于湖賊漾分三營並花勇駐守以湘軍師船護之令楊政謨師船進泊八角亭以德克碑日意格淺水
輪船佐之十三日楊政謨彭大光會同日意格由荻港正河用開花礮轟攻袁家匯賊壘高連陞王東林
李運榮陳念親由荻港渡河進擊袁家匯街頭蔣益澧督徐文秀賀國輝分帶水師礮船由湖賊漾對攻
袁家匯賊壘梁雲山黃鎮湘率師船分扼湖尾支港官軍三路齊進百礮齊轟賊鼠伏壘中抵死不出
官軍環攻三時將傍街賊壘及賊踞房屋轟塌大半斃賊無數當各軍酣戰時蔡元吉見賊勢趨重袁家
匯一路當挑奮勇五百名隨遊擊楊應龍由思溪突圍而出將至河邊逆賊從左右層層抄截楊應龍奮
威衝殺手刃數賊力竭陣亡蔡元吉所部營官楊成棟向得勝亦同歿於陣勇丁僅衝出百餘人蔣益澧
以思溪一路既經蔡元吉派隊衝出儻賊知蔡元吉一軍虛實圍必益急當飭各營竟夜奮攻袁家匯賊
壘以掣賊勢一面率親兵及楊道洽所部馳往雙福橋長生橋一帶策應是夜三更蔡元吉竟從東阜堯
水三道衝出重圍所部勇丁及楊應龍營勇隨同衝出遇伏兵四起大潰官軍一齊猛進立將踞街逆黨
殲除殆盡當陸師鏖戰時賊划由水路齊出劉連陞率師船迎敵賊敗走官軍乘勢追擊伏賊從桑林用
洋槍暗擊子貫劉連陞右額師船稍卻蔣益澧一面飭高連陞進紮一面調湘軍師船泊荻港護之該逆
忽以槍划載悍賊各擊洋槍由支港抄我師船之後勢將不支蔣益澧疾率大隊由南岸馳至賊始駭遁

是夜賊復率死黨分數路來撲均經蔣益澧擊走之初八日蔣益澧飛調洋將德克碑日意格淺水輪船赴荻港會剿並令高連陞賀國輝王東林等各率所部至荻港是日申酉之交一齊向前衝殺輪船巨礮同時轟發該逆猝不及備正欲拚死抵拒各勇已拔鐵越濠而入立斃壘中悍賊六七百名餘賊偪溺無算將荻港賊壘三座次第攻克斃賊無數是夜有賊目僞天安譚世友鍾大旺率長龍舢板戰船十號赴蔣益澧軍前乞降十一日蔣益澧親督徐文秀謝茂勝乘師船四十餘號由荻港繞出太湖察看地勢突遇逆賊槍划數十飛駛而來蔣益澧當飭各勇以洋槍排擊斃賊無算紛紛退去官軍遂乘勝駛入湖受傷多名水師副將蔣榮彩及鄧光明所部水師營官彭開壽仍奮勇前進各軍復於對岸發巨礮助之賊死拒不退各勇爭先搶入至離岸三丈餘賊槍礮愈密勇丁傷亡愈多水師營官蔣榮彩黃鎮湘彭開壽陸師營官李世祥均受重傷蔣益澧復用飛划渡德克碑花勇及李運榮一營過河偪岸攻擊李運榮所部未及抵岸花勇先進遇伏賊槍礮而却其劉清亮等會同水師總兵劉連陞彭大光攻思溪賊壘鏖戰半日亦未得手計是日官軍陣亡者百餘名受傷者數百名生擒賊供堵逆黃文金親來決戰亦被洋槍子傷其左肩是戰悍賊約共斃六七百名其受傷者則不可數計矣蔣益澧因思溪雙福橋等處勢難力攻擬由袁家匯荻港出湖舩漾以達長超山徑襲逆賊後路初六日飭高連陞率賀國輝王東林席得元陳念親等進紮荻港之中洲飭徐文秀扼紮雙堂子初七日黎明蔣益澧率親兵三哨赴荻港督戰時高

連陞賀國輝王東林已率陸師進薄前面賊壘於時劉連陞各率師船會剿賊憑卡死拒不出高連陞飭各勇佯作疲憊之狀誘之該逆一鼓突出

以下原闕

者不及千人飢疲不堪詰其近況知馬羸食盡後割桑皮煮食者六七日士卒感大軍援救之德雖餓不能起無一人附賊者其伏匿草間積屍之下賊退復歸伍者復四百餘人是日蘇軍及已革道員張景渠等又將晟舍賊巢攻克斃賊千餘賊見蔡元吉已經突圍而出而晟舍賊壘又經官軍攻破意氣沮喪十六夜思溪雙福橋等處踞逆均紛紛退竄劉清亮劉樹元李邦達於是夜初更時各率所部潛坐划船過河大呼殺入該逆連將浮橋拆斷其未及過浮橋者官軍刀斫矛刺約近千名其迫溺而斃者不計其數當將賊營數十座一律踏毀現劉清亮李邦達鄧光明各營已移紮亭子橋進攻長超山踞賊高連陞等水陸各營會同洋將德克碑進攻袁家匯能速奪此兩隘則東路東南路乃可徑抵城根此湖州各軍迭次苦戰獲勝實在情形也

臣維湖州地勢守易攻難逆賊東踞長超山昇山袁家匯西踞楊家莊梅溪四安安吉西北踞廣德州南扼妙善和平兩鎮以爲犄角賊勢雖感而地險人衆難以偏圍現在蘇軍之距城最近者爲大全湖口之水陸各營浙軍之最近者爲東路日月山各營此外皆相距二三十里十餘里也蘇軍自克晟舍後北路西路日事鏖戰李鴻章毅然以攻取廣德州爲己任尤爲制賊要害大局既合長圍之勢已成逆賊雖暫肆鴟張檻獸釜魚遲速有必滅之理所慮者局勢尙寬非若一城之可鎖圍而

待其自困臣與李鴻章雖嚴督各軍漸逼漸近以收節短勢險之效察看機局尙未能一時就緒而旬日以來逃出難民及投誠之僞目等皆言僞幼主因初二日之戰畏懼頗甚逃避廣德州黃文金遣其弟僞值王黃文英護之各處賊館多豫備戰糧似有急竄之意蘇浙兩軍自湖城北面以東及東南一帶水陸合成長圍尙無罅漏惟西路山嶺複峻路徑紛歧地勢闊遠又安吉一城尙稽克復其緊鄰之甯國縣並無防兵儻賊竄甚速誠恐防不及防必致蔓延他方又成不了之局幸連接各路咨稟江西賊勢經官軍疊次痛勦腹地漸就廓清臣軍之援江者除劉典一軍業經跟蹤追剿外其王開琳王德榜兩軍於攻克東鄉後還駐弋貴之交可就近調赴婺源馬金一帶與浙師聯絡其提督黃少春一軍及總兵劉明燈副將劉明珍等各營臣前因江西各賊被剿緊急防其入浙閩邊界令其移駐常山江山邊隘相機截剿茲江西賊勢已衰浙閩邊隘無警現飛調移駐嚴州相機分撥備迎頭攔剿之用如能仰仗天威全股蕩平東南底定臣自當會同江蘇撫臣恭摺馳報若僅收復湖州府城各營當卽躡蹤緊追不敢居以爲功也此次力戰陣亡之補用遊擊楊應龍克復海鹽桐鄉案內計功應保參將因力援東牟營盤血戰捐軀寶堪悼惜合無仰懇天恩俯准飭部照副將陣亡例議卹傷後身故之副將蔣榮彩杭餘克復案內擬保總兵茲以傷重於二十三日身故應請飭部照總兵陣亡例賜卹以慰忠魂其餘傷亡中外各弁勇俟查明彙單請卹至候選同知蔡元吉久困重圍忍飢血戰斬擒悍賊最多雖所部傷亡千

餘名於大局無礙應否免其置議之處出自
天恩所有迭次苦戰獲勝見籌辦情形謹由驛馳奏

伏乞 皇上聖鑒訓示施行謹 奏

議政王軍機大臣奉 旨另有旨欽此

附陳日月山等處踞逆歸降並收復湖州城片

同治三年七月二十九日

再正拜摺間復接蔣益澧飛稟自官軍逼紮日月山亭子橋東畢長超山麓後二十五日湖州城南門守賊僞天將陳學明率千餘人來降二十六日長超山踞壘賊目僞天將陳姓及姚姓劉姓以所轄三壘之衆來降是日日月山守將劉樹元會同蘇軍猛攻昇山賊壘拔之收隊復瞭見湖州城中火光燭天而袁家匯賊壘亦有竄動形迹劉樹元已率所部先進蔣益澧亦卽拔隊猛追甫兩時許蔣益澧遣弁飛報湖州踞賊已於是夜開西門竄出劉樹元已率所部入城所有收復湖州追剿竄賊情形卽查明奏報伏

乞 皇上聖鑒謹 奏

議政王軍機大臣奉 旨另有旨欽此

議政王軍機大臣 字寄 欽差大臣協辦大學士兩江總督一等侯曾國藩閩浙總督兼署浙江巡

撫左宗棠陝甘總督楊岳斌兩廣總督毛鴻賓江蘇巡撫一等伯李鴻章江西巡撫沈葆楨福建巡撫徐宗幹署廣東巡撫郭嵩壽同治三年八月初八日奉 上諭楊岳斌等奏收復宜黃克復南豐詳細情

形克復新城大槩情形王文瑞一軍在槎路口等處獲勝陳炳文等投誠請賞虛銜頂帶毛鴻賓等奏剿辦戴梓潰一股斬馘極多請飭曾國藩嚴防贛南並嘉應石坑堡鄉民械鬪派兵彈壓各摺片覽奏均悉官軍收復宜黃並南豐縣城亦經靈宇等營克復辦理均極得手所有出力人員著准其擇尤保奏惟敗匪上竄廣昌甯都已偏南贛其東鄉金谿敗匪見衆瀘溪新城南贛甯三府州毗連閩粵楚南楊岳斌等已派鮑超進剿新瀘防賊入閩王開琳等回駐弋陽貴溪以備浙西敗賊勾結楊岳斌不日馳赴贛甯調度著卽飛催劉典等繞出賊前扼要兜擊並令席寶田等跟蹤追剿以期一鼓聚殲無任再有竄逸克復新城詳細情形仍著查明具奏湖州業經克復浙西賊恐復上竄並著責令王開琳王德榜以剿爲防勿稍疏懈陳炳文等投誠旣屬真心悔罪自應網開一面准予自新所請獎賞參將等銜未免過優惟念該降人等尙知順逆且以激勸未降各股是以俯如所請本日已明降諭旨照准楊岳斌等當傳知該降衆等俾知感奮圖功如續有勞績仍准保獎但其人數在數萬以上槩予遣散後患必多是否酌留效力未據聲明其洋礮等件曾否呈繳均著飭令鮑超等妥爲經理李世賢汪海洋見在何處此二逆必須殲除方免滋擾鄰省之患宜黃之賊屢犯槎路口交湖經王文瑞三次痛剿茲復往撲甯都著卽催督各軍四面截殺敗匪上竄廣昌甯都已偏南贛若開此一路縱令入粵又成不了之局本日據毛鴻賓等奏請控制贛南自係目前切要之圖著曾國藩楊岳斌等飭令派出各軍繞前截擊務須就地殲除能否增兵繞

越甯都石城一帶扼賊南竄並著曾國藩等酌度辦理毛鴻賓等亦當派兵出境防堵不得任其闖入其竄甯都之賊與閩省切近左宗棠徐宗幹務飭練兵認真設防遇賊卽擊張運蘭已取道嘉應赴閩卽著令其迅速前進擇要駐紮毋令一賊竄入閩境毛鴻賓奏剿辦客匪僞軍師戴梓潰一股餘匪退入五坑五坑爲客匪所居山深林密經卓興等進剿獲勝傳言戴逆已死於亂軍之中著該督撫仍飭卓興查明戴梓潰實在下落並將餘匪一併殲滅勿使再有勾結所有在事出力文武員弁准其擇尤保奏毋許冒濫嘉應州石坑堡溫陵等姓因事挾嫌械鬪溫姓子弟復勾通揭陽匪首溫亞喬等率黨相助長樂興甯二縣亦有械鬪之事毛鴻賓等已派吳贊誠會同地方官查拏懲辦著卽責令妥爲辦結不得草率了事毛鴻賓另摺奏總兵勒福患病已降旨准其開缺並將卓興一員簡授爲南韶鎮總兵矣另片一件留中正在寄諭間左宗棠奏官軍進規湖郡迭次獲勝另片奏據蔣益澧稟報湖郡踞賊夜開西門竄出劉樹元已率所部入城等語湖州克復昨已據李鴻章奏報仍著左宗棠將詳細情形查奏洪福瑱逃避廣德李鴻章所派之軍力攻州城自未可稍涉鬆懈著曾國藩左宗棠李鴻章督飭各軍務將該逆擒獲毋令漏網湖州收復後賊由西門出竄究竟已竄何處著左宗棠李鴻章查明具奏一面飭令蔣益澧等會同蘇滬各軍躡蹤緊追不得任其紛竄致令死灰復燃勒辦又形棘手四安梅溪等處踞賊尙多李鴻章當飭各軍節節掃蕩以期漸次肅清湖州力戰陣亡之遊擊楊應龍著照副將陣亡例議卹傷後身故之副

將蔣榮彩著照總兵陣亡例議卹以慰忠魂同知蔡元吉所部雖多傷亡念其久困長圍忍飢血戰著免其置議將此由六百里各諭令知之欽此

左文襄公奏疏初編目錄

卷十七

查明浙省失事應辦武員分別定擬摺

截勦竄賊大獲勝仗情形摺

奏報截勦竄賊獲勝全浙肅清情形摺

附陳起獲黃逆屍首梟示情形片

附陳杭城餘匪竄出情形片

浙餉支絀欠解甘餉無從籌撥摺

浙軍出境追勦連獲勝仗情形摺

附陳提訊忠逆之子李士貴口供賊情片

覆陳杭州殉難大員死事詳細情形摺

乍浦頭圍二口未能啟徵情形摺

擬請温州關稅暫由溫處道徵解摺

奏報兩浙商鹽試行運票摺

奏報賊竄閩疆撥兵援剿摺

請飭浙江撫臣速赴本任片

附陳漳賊雖退龍巖仍應速援片

懇准提督回籍調養傷疾摺

陳明浙江提督委員署理帶兵援閩片

左文襄公奏疏初編卷十七

查明浙省失事應辦武員分別定擬摺 同治二年八月二十二日

奏爲查明浙省失事應辦武員分別定擬具奏仰祈 聖鑒事竊照浙江省城二次失守各屬相繼淪

陷所有失事文職各員業經分別定擬罪名先後具奏在案其陸續投_臣到武職各員俱經飭司訊取確

供彙案詳辦茲據布政使蔣益澧代辦按察司林聰彝會詳稱查有已革前署處州鎮總兵台州協副將

特保已革前杭州協副將王邦慶前代辦撫標中軍參將衢州城守營都司陸用參將林奎已革前提標

中軍參將世襲騎都尉兼雲騎尉博忠四員或兩次失陷咎無可辭或雖著微勞功不掩過或暫代人員

並未接印或隨同攻克並復鄰封情節各有不同均經逐一訊擬取具各該員親供具詳前來_臣細加覆

核酌其情罪重輕分別定擬摺敘案由開單恭呈 御覽理合恭摺具奏伏候 皇上訓示施行謹

奏

謹將浙省失守武職各員摘敘案由分別定擬開單恭呈

御覽

已革前署處州鎮總兵台州協副將特保 查該署鎮先因出境防堵被賊竄陷處州府城當卽馳回克

復嗣因衆寡不敵城池復陷該署鎮招集兵勇隨同各軍奮力攻勦旋即規復郡城及青田縉雲等縣事

後尙知愧奮惟專閫大員不能嬰城固守兩次失陷咎無可辭業經革職應請
旨發往軍臺効力贖
罪

已革前杭州協副將王邦慶 查該革將於杭州初次失守據稱督兵巷戰衆寡不敵保守內城前將軍

臣瑞昌令催援軍隨同克復旋經臣瑞昌札飭仍回杭州協本任交卸後又經前撫臣王有齡查無聞警

退避情事委令稽查城廂嗣復派援東陽縣白峯嶺卒因回援縣身受重傷就近赴台調養而台屬亦

相繼淪陷該革將在天台鄉間激勸民團會同官紳督率練勇先後克復天台台州府縣兩城並紹屬之

新昌縣城雖屬著有微勞惟該革將所稱迎催援軍奉飭回任及委查城廂等事均無文札可憑且該革

將以二品武職人員不能力扼兇鋒省城被陷後復失守備防功不掩過業經革職應請
旨發往軍

臺効力贖罪

前代辦撫標中軍參將衢州城守營都司陸用參將林奎 查該參將前在省城專辦軍需火藥嗣因前

署撫標中營參將林台三赴台查辦土匪前撫臣飭委該參將暫行代辦並未接印仍司督造軍火爲時

未久賊卽圍城卒至糧盡援絕勢不能支致被竄陷該參將在火藥局遇賊抵禦身受重傷遇救出城卽

赴定海隨同各軍先後克復鎮海甯波兩城著有微勞雖省垣不守本屬罪無可寬惟該參將係暫代人

員並未接印專司督造火藥與督兵防剿者不同應請
旨革職免其治罪

已革前提標中軍參將世襲騎都尉兼雲騎尉傅忠 查該革將甯波府城失陷時曾經受傷其妻妾均在城內殉難一子隨同抵禦被擄無蹤並無棄城先遁情事事後招集兵勇隨同各軍先後克復鎮海甯波府城縣城並紹屬之餘姚縣城尙知愧奮業經革職應請 旨免其治罪

截勦竄賊大獲勝仗情形摺

同治三年八月二十五日

奏爲官軍截勦竄賊大獲勝仗恭摺馳奏仰祈

聖鑒事竊賊竄淳安威坪蜀口等處官軍初八初十

日截勦疊獲大勝羣賊退踞淳安所轄唐村黃金嶺一帶十一日副將劉明珍派參將黃本富遊擊賴長率所部踰雲嶺進攻汪川墜下賊巢破之斬騎馬賊目十餘名斃賊五六名生擒二十餘名十三夜探報唐村黃金嶺之賊欲分三路越嶺竄逸十四日昧爽黃少春遂飭副將張福齊周紹濂率所部夾徽港而上會合先駐街口之遊擊黃元吉羅順成兩營扼防安徽歙縣所轄小川飭副將李良平參將伍正得等進勦黃金嶺自率中營及總兵劉明燈道員李耀南參將馬復震遊擊劉昌選等步隊總兵楊芳桂都司伍先申馬隊由六都橫出洪池並約副將劉明珍率所部四營由雲嶺以躡唐村之後各軍分路齊追縱橫決盪戰逾時賊勢不支紛紛潰竄官軍乘勝追殺陣斬及墮崖死者約計四五千名生擒千數百名拔出難民萬餘奪獲騾馬三百餘匹旗幟軍械無算當將黃金嶺唐村洪橋頭洪池等處五十餘里賊館全行掃蕩追至歙淳交界之門嶺始收隊還時劉榮合等四營亦由昌化躡蹤追至將沿途尾賊搜斬淨

盡是日午刻張福齊周紹濂羅順成黃元吉等甫抵小川賊之前隊五千餘人已由歙境大洲源繞出建
口過河各營截殺數百人後股又至官軍排礮轟之賊向原路退去黃少春聞賊由建口過河當率中營
及伍正得彭俊光李良平馬復震伍先甲等取道遂安新橋昏口一帶迎擊並飭李耀南楊芳桂會同劉
明燈馳赴街口米灘截勦後股竄賊十五夜逆賊大股復圖由建口涉淺而渡已過萬餘人其未過河者
尙不下二萬人正向上下兩灘搶渡各營馳至分投扼堵副將唐連勝師船往來轟擊鏖戰一時賊不得
濟劉明燈張福齊周紹濂劉昌選黃元吉羅順成等各率五成隊從上灘過河繞出賊後李耀南等從下
灘過河兩路夾擊賊大敗適皖南鎮總兵唐義訓所部亦由歙南深渡馳至唐連勝師船復排礮向山口
轟擊各軍四面兜殺逆賊無路奔逃陣斬僞列王邱國文等賊目數十名賊黨五六千名生擒僞列王黃
吉建及僞天將朝將等賊目二十餘名賊黨三千餘名其被勦窮感向劉明燈張福齊黃元吉等馬前跪
伏乞降者約五千餘人向唐連勝營中乞降者一千餘人奪騾馬三千餘匹軍械八千餘件據投誠賊目
僉供首逆范汝增經官軍追勦身被數矛落馬從賊拚死搶去不知生死其馬及僞照已爲官軍所獲餘
逆向績溪一路翻山遁去者僅數百人後路已無賊蹤其先由歙境建口渡河一股十七日翻雪嶺竄至
遂安章村郭村一帶黃少春亦于是日馳抵遂安十七都十八日卽率各營進勦甫抵方村地方突遇賊
大股由東亭村中衝出黃少春當飭各營分路迎敵鏖戰兩時右旗旗官遊擊彭俊光中營哨長賀潤蘭

彭在上首先陷陣彭俊光身受矛傷伍先申李良平張介和復齊衝賊陣賊潰走官軍追過郭村殺賊千餘名生擒數百名奪賊馬三百餘匹羣賊翻山向昏口而遁適馬復震伍正得率所部進勦途與賊遇鏖戰四時殺賊無算官軍亦傷亡百餘人黃少春派彭俊光伍先申所部馳往策應賊已奪路向遂安十六都而竄僞列王蕭雅泗劉得義等率僞天將胡將等賊目百餘人賊衆二萬餘赴黃少春軍前乞降黃少春受之現已分別挑留遣散此四十六十八等日各軍截勦竄賊大獲勝仗實在情形也計逆賊由湖州廣德甯國上竄浙軍節節截勦斬解散投誠者人數實二十餘萬前後共奪獲驛馬至六千餘匹之多大小僞印約千數百顆大小洋槍亦數千件其隨幼逆逃竄黨夥不過萬餘皆係堵逆昭逆借逆敗殘之餘能戰者不過數千而已其祐逆李遠繼自甯國敗竄後收殘黨千餘此次聞劉得義等投誠其黨一聞而散李遠繼隻身遁走現洪幼逆等已繞由遂安昏口橫沿大溪邊一路逃竄黃少春已於二十日率所部躡踪緊追官軍可迎頭截擊者尙有駐馬金街之劉明珍一軍駐婺源之王開琳王德榜兩軍又准楊岳斌沈葆楨來咨已商撥劉典一軍赴婺源截擊臣已飛咨劉典於廣信一帶迎勦此股或可悉數殲夷所有截勦竄賊迭獲大勝情形理合由驛六百里馳奏伏乞

皇上聖鑒訓示施行謹 奏

議政王軍機大臣

字寄閩浙總督兼署浙江巡撫左宗棠同治三年九月初三日奉

上諭左宗棠

奏官軍截勦竄賊疊獲大勝情形一摺覽奏均悉淳安等處竄賊踞唐村黃金嶺一帶經黃少春等痛加

掃蕩追至歙清交界地方搜斬淨盡其前隊之賊由建口過河復經官軍分路夾擊擒斬賊目甚多該逆窮感乞降者五千餘人其向績溪翻山遁去者僅數百名著仍督飭諸軍奮力追剿以清餘孽投誠賊眾妥爲安置前據奏報洪福瑱頭髮鬚裝扮洋人意圖混竄現在祐逆李遠繼因黨已紛散隻身遁走洪幼逆等已繞由遂安昏口一帶逃竄著左宗棠懷遵疊次諭旨檄令劉明珍等軍嚴密購捕務在必獲以膺懋賞斷不可任令兔脫祐逆逃往何處並著嚴飭諸軍認真追捕劉典等已由楊岳斌派赴徽甯扼守要隘著卽速飭令將此股賊匪迎頭截擊務期悉數殲除毋令再擾江境又成蔓延之勢將此由六百里諭令知之欽此

奏報截剿竄賊獲勝全浙肅清情形摺

同治三年九月初六日

奏爲官軍截剿竄賊大獲勝仗浙省全境肅清各營出境追剿恭摺馳奏仰祈 聖鑒事竊該逆於八

月十四十六十八等日迭次痛剿僞列王劉得義等率眾投誠後餘賊均由遂安昏口黃沿一路竄走總兵王開琳道員王德榜聞賊偪遂安卽各率所部由婺源馳赴開化華埠截剿副將劉明珍十九日馳抵馬金街卽飭參將黃本富遊擊張成元賴長劉昆宗分路出昏口截擊斃賊數百名生擒二百餘名羣賊繞竄開化七都頭村二十日劉明珍率各營追至頭村三路縱擊斃賊無算陣斬僞享王劉裕鳩及僞天將謝元美李有才僞朝將李世華甯天義柯林等賊目數十名並獲僞享王銀印一顆驛馬三百餘匹時

賊前隊已由二三都闖入開化縣城以一股牽拒追軍一股直向華埠玉山七都球竄明去劉珍急率各軍追勦黃少春亦派總兵楊芳桂率馬隊馳至二十一日合軍齊抵開化城下賊匿不出劉明珍僞退誘之賊悉衆來撲甫近山邊伏兵突起賊駭而奔官軍乘勢追殺俘斬多名是日王德榜一軍由婺源馳至黃夜會合劉明珍所部各營分路進擊賊不能支急向華埠一路竄逸適王開琳先飭總兵丁長勝副將羅瑞山郭德馨參將康榮詔四營於二十一日午刻馳抵開化白渡截之賊前股已向玉山七都球遁去後股正從開化而來官軍嚴陣以待該逆衝突數次經羅瑞山手刃騎馬賊目數名康榮詔復督隊用礮轟擊斃賊千餘生擒二百餘名奪驟馬二百餘匹賊無路可逸是夜僞天將汪仁和等率黨四五百人赴康榮詔營中乞降二十二日王開琳王德榜劉明珍等軍追至華埠見賊悉由小路竄七都球劉明珍當率所部馳赴常山出草坪關古城截擊王開琳王德榜等跟蹤急進未刻行近七都球誦賊後股尙屯村內卽磨軍衝入花旗悍賊數千尙拚死擊洋槍拒戰相持兩時官軍大隊齊進縱橫痛擊斃悍賊數百名賊勢大潰紛紛奪路狂竄一向玉山一向江山而遁王德榜王開琳等分路追擊沿途斬馘不計其數是日劉明珍馳抵常山預飭張成元率所部於草坪設伏待之廿三日天甫黎明該逆果大隊擁至官軍突出奮擊賊卽退竄黃本富賴長復率所部從後邀截斃賊二三百名賊見官軍緊逼猝不可脫拚死向前衝突正盛戰間劉明珍督隊馳至橫貫賊陣將賊截爲兩段前股翻山向江山邊界而竄後股僞方王

早王等均被官軍擊斃餘黨數千僞天將胡元興熊開玉陳高勝陳左祥僞天福周國玉等率之伏地乞降劉明珍受之一面將降衆分別留遣一面飭黃本富等疾趨江山新塘邊截勦適賊正圖由江山西鄉等處繞竄石門峽口廿四日黃本富督隊由新塘邊馳擊王德榜亦率所部追至賊望風而潰是夜有僞天將方福泰僞天義詹福龍陸義泛僞天福李金星劉三元丁天福等率黨數千赴王德榜軍前乞降廿五日黎明前隊賊訶知率衆回殺適遇總兵蕭得龍副將戴奉聘所部馳至迎擊王德榜復派王德權何秀清黎榮李運勝鍾元與哈必發等督隊分路齊進蕭得龍戴奉聘陣擒生賊詢知騎馬黃衣賊目二名一爲洪幼逆之堂兄洪元珍一爲僞王宗李金信當卽馳馬衝入賊陣斬之餘賊驚潰盡趨廣豐官軍乘勢追殺斃悍賊數百名奪騾馬二百七十餘匹僞印八十三顆當王德榜一軍馳抵新塘邊截勦之時賊之另股已竄廣豐五都街王開琳抵玉山後卽於廿四夜乘月色微明飭各營銜枚疾進行近該處適遇大股粵賊正擁幼逆逃竄官軍分左右兩路抄襲各逆持洋槍對擊傷勇丁三十餘名都司謝吉祥力戰陣亡丁長勝羅瑞山郭德馨莫坤和方友才魏友盛等麾隊猛擊四面感之殲斃悍賊二百餘名幾擒幼逆爲粵賊拚死潰圍挾走官軍緊追二十餘里至二十五日午刻始行收隊計是日共斃粵賊五六百名生擒四百餘名奪騾馬五十餘匹此各軍迭次截勦大獲勝仗浙省全境肅清躡蹤追勦之實在情形也竊此次逆賊由湖州廣德甯國上竄經各軍迭次截勦湖州首逆黃文金廣德首逆黃文英就戮李士

貴生擒其餘著名賊目亦十殲八九浙省全境肅清惟洪福瑱一犯自金陵逃出沿途衝竄至今尚未就縛現由江西廣豐竄入鉛山縣境地方一向紫溪車盤一繞鉛城向湖坊一路逸去死黨尙有數千臣調度遲延未能辭咎幸劉典一軍已抵貴溪黃少春劉明珍兩軍已赴廣信河口一帶王開琳王德榜等亦率所部跟蹤急進當可前後夾擊臣已嚴飭各軍無論逆賊竄江閩務期悉數殲除斷不敢任令漏逸致煩宸廑所有黃少春王開琳王德榜劉明珍各軍出力將弁應暫由臣存記仍俟洪福瑱全股殲滅再行奏請從優保獎其代理開化縣事升用知縣候補縣丞方業崇於逆賊闖入縣城咎有應得惟查該縣城垣坍塌已久且無防兵情尙可原應請旨革職免其查辦署開化縣縣丞布理問銜候補府照磨張名名探辦軍米遇賊不屈投河身死應請旨交部照例議卹理合恭摺由驛六百里馳奏伏乞 皇上聖鑒訓示施行謹 奏

附陳起獲黃逆屍首臬示情形片

同治三年九月初六日

再據提督銜總兵劉明燈稟稱八月十六日在歙南建口大捷生擒各賊內復搜出忠逆之子僞二殿下

李士貴於休甯

屯

往投出扮作乞丐之僞王宗蘇得萬及僞神將周先發僞朝將熊國仁四犯訊據李

士貴係湖北江夏縣人咸豐二年被擄忠逆李秀成收爲義子加封僞職歷隨忠逆竄擾江浙各省擁

衆二十餘萬本年三月帶賊三萬餘由丹陽廣德竄入湖州昨由湖州竄出經官軍節節痛勦其黨盡散

因護眷屬後行致被擒獲臣已飭提來省訊取確供其黃文金屍首昨據參將劉光明帶同陣擒賊匪方友宏於昌化白牛橋過去十里之水窪司地方姚姓宅傍牆根將該犯屍身起獲遍身皆用黃綢紅綢包裹並殮以黃緞繡龍袍帽方靴又頭枕元寶兩錠口含金葉左右兩腕金鐲四隻逆屍自腹以下皆漸腐變惟頭面兩脅兩手皮肉未脫左肩洋槍子傷一處右肋擡槍子穿透方友宏認係黃逆正身劉光明當卽將屍身亂刀砍裂首級解省呈驗臣驗該逆面貌年約五十上下髯長而疏齒已脫淨耳後有一黑痣當飭臬示武林門外其偽印現存未燬可取驗也訊據方友宏供稱與臣前奏略同八月初五夜賊過白牛橋因埋堵逆屯紮一日初七日大隊始向昱嶺關竄去該逆在甯國縣七都受傷是七月三十日昇至白牛橋氣絕是八月初五日官軍之紅旗白邊者此路惟總兵羅大春副將劉端冕兩營而羅大春未至七都故臣前奏祇請 賞劉端冕總兵銜也適奉 寄諭飭查確實情形謹一併附陳伏乞 聖

鑒謹 奏

附陳杭城餘匪竄出情形片

同治二年九月初六日

再洪逆由金陵逃至廣德復由廣德甯國昌化績溪出皖浙之交以竄江西臣軍現在追勦蹤跡甚明其由金陵同竄數目或云數千或云數百臣前此祇據李鴻章之信致曾國藩曾國荃未嘗以之入

告臣所以緘詢此事者臣因前年攻龍游湯溪時見洪逆與賊首李世賢偽文卽有幼主之說曾舉以告

曾國藩茲復有此傳聞故欲詳覓其說耳頃據黃少春送到所獲幼逆六月二十四日給偽首王范汝增黃綢偽詔則幼逆由金陵竄出實無可疑閩所鈐偽璽上方橫列太平天國四字下方橫列玉璽兩字左刻天下太平右刻萬方來朝中刻上帝基督帶璜幼主作主字一行而璜字玉旁刻作主字拆視則真主二字雖鄙儻可笑然非一時倉卒所造亦無可疑逆種既已逸至浙境臣有所聞豈敢不入奏現在幼逆未獲臣無可冒之功將來幼逆不獲臣且有難辭之咎臣亦何暇計及此哉頃准曾國藩鈔送七月廿九日覆奏洪福瑱下落一片內稱杭州克復時偽康王汪海洋偽聽王陳炳文兩股十萬之衆全數逸出未聞糾參此次逸出數百人亦應暫緩參辦臣竊有所未喻也當臣軍肅清浙東時軍威頗壯杭城守賊無多本可速克比因皖南賊勢鴟張不得已調劉典分軍赴皖助剿而臣駐嚴州以資兼顧其攻富陽及杭城者僅蔣益澧一軍及水師數營又正疾疫繁興時兵力更薄此機一失首逆陳炳文汪海洋紛紛踵至賊數始多自富陽克後賊悉力守杭城餘杭維時臣戰餘杭蔣益澧戰杭州屢次破壘獲勝臣奏兩城賊勢窘蹙並未以賊數衆言每與交戰逆賊多不過一萬數千而止迭次奏報甚詳尙堪覆按其所以遲久而後克復者實由杭餘兩城中間相距六十里我軍未能合圍賊佔地勢攻守之難易懸殊也曾國藩稱杭城克復十萬之衆全數竄出所謂十萬全數果何據乎兩城之賊於二月二十三夜五更竄出陳炳文敗杭州武林門而竄德清汪海洋出餘杭東門而竄武康官軍皆於黎明時入城臣前此奏報克復兩

城時業經詳細陳明並無一字稍涉含糊夫以片時之久一門之狹而謂賊衆十萬從此逸出殆無是理此固不待辯而自明者也至湖州之賊如黃文金李遠繼楊輔清等皆從江西皖南而來此外蘇常丹句嘉興諸賊亦麇聚於此最後則李世賢大股一併竄入陳炳文汪海洋之竄德清武康也李世賢實迎護之杭餘兩城之北數十里處處皆爲賊守非可一攻卽下觀於武康德清之復在兩城克復旬日之後可見賊數之多不在杭餘兩城也明矣李世賢與陳汪兩逆旣入湖城賊數自有增無減李世賢由湖州廣德績溪竄徽州旋由婺源竄江西賊數十五六萬其時曾國藩有皖南諸城岌岌之奏陳汪兩逆窺浙軍赴歙南小川遂由白礮馬金諸嶺翻入浙境又經浙軍迭次截剿其竄入江西者尙數萬計厥後與李世賢會併其黨之或分或合更無從知曾國藩殆以陳炳文降數之多謂均從杭州竄出乎臣閱鮑超鈔示陳炳文降書諸頭目姓名多非杭州舊有之賊也至云杭賊全數出竄未聞糾參尤不可解金陵早已合圍而杭餘則并未能合圍也金陵報殺賊淨盡杭州報首逆實已竄出也臣欲糾參亦爲得而糾參之乎至若廣德有賊不攻甯國無賊不守致各大股逆賊往來自如毫無阻遏臣屢以爲言而曾國藩漠然不復介意前因幼逆漏出臣復商請調兵以攻廣德或因厭其絮聒遂激爲此論亦未可知然因數而疏可也因意見之蔽遂發爲欺誣之詞似有未可臣因軍事最尙質實故不得不辯至此後公事均仍和衷商辦臣斷不敢稍存意見自重愆尤謹附片陳明伏乞

皇上聖鑒訓示謹

奏

議政王軍機大臣 字寄閩浙總督兼署浙江巡撫左宗棠陝甘總督楊岳斌江西巡撫沈葆楨同治三年九月十四日奉 上諭左宗棠奏截剿竄賊獲勝浙境肅清各營出境追剿一摺逆匪由遂安昏口

一路竄走闖入開化總兵王開琳副將劉明珍等合兵追擊賊不能支由華埠竄江山玉山疾趨廣豐沿途殲斃甚衆受降者亦近萬人洪幼逆幾被擒獲復爲粵逆拚死潰圍挾之而走現由廣豐竄入鉛山縣境一向紫溪車盤一繞鉛城向湖坊一路逸去死黨尙有數千現在劉典一軍已抵貴溪黃少春劉明珍兩軍已抵廣信河口王開琳等亦率衆跟追著左宗棠楊岳斌沈葆楨督飭諸軍前截後追無留餘孽代理開化縣事候補縣丞方業崇於逆匪闖入縣城原有應得之咎姑念城垣坍塌久無防兵情尙可原著革職免其查辦署開化縣丞布政使司理問銜候補照磨張名第遇賊不屈投河身死著交部照例議卹所有追賊出力之黃少春等著左宗棠暫行存記俟洪福瑱全股殲滅再行奏請優獎左宗棠自入浙以來克復城隘數十處肅清全境厥功甚偉本欲卽加懋賞恐該督以洪幼逆未滅必將固辭一俟餘逆淨盡卽降恩旨浙省軍務已竣地方應辦一切善後事宜該督當飭司道等次第辦理以期奠安閩閩另片奏洪幼逆入浙各情覽奏均悉朝廷於有功諸臣不欲苛求細故該督於洪幼逆之入浙則據實入告於其出境則派兵跟追均屬正辦所稱此後公事仍與會國藩和衷商辦不敢意見稍存尤得大臣之體深堪嘉尙朝廷所望於該督者至大且遠該督其益加勉勵爲一代名臣以副厚望鮑超由建昌拔營顧黃

饒兩路楊岳斌等復派孫昌國督帶水師嚴扼廣信等處著卽懷遵昨奉諭旨督軍會浙軍迎勦以期一鼓殲除收降之衆過多仍飭各軍妥爲駕馭如遣散其衆尤須審慎辦理以防後患將此由六百里各諭令知之欽此

浙餉支絀欠解甘肅餉無從籌撥摺

同治三年九月初六日

奏爲浙省餉需支絀欠解甘肅兵餉無從籌撥恭摺具奏仰祈

聖鑒事竊准部咨同治三年二月十

九日奉

上諭恩麟奏甘省需餉緊急請飭催陝西等省籌解欠款一摺據稱浙江省欠解歷年甘肅

銀一百四十餘萬兩請飭迅速先籌撥解等語著左宗棠先行籌解銀二三十萬兩迅速派員解往甘肅省城毋稍延緩其餘兵餉仍著源源籌解以資接濟等因欽此欽遵飛咨到臣當經飭司籌解去後茲據布政使蔣益澧詳稱查得浙省各郡縣被賊踞擾數年之久地方糜爛幾徧現雖次第克復漸就肅清而蹂躪之餘瘡痍未復歲賦率多蠲免卽啟征各郡縣亦因兵燹之後人物凋殘田土荒蕪業已奏奉

恩旨暫免照額征收刻下本省兵餉軍需均屬積欠甚鉅自顧不遑所有欠解歷年甘餉委屬萬難籌解

應請全數改撥等情具詳請奏前來臣查前項甘肅兵餉係從前歷年欠款如果稍可騰挪自應遵

旨籌撥何敢稍事諉延第浙省需餉浩繁實難籌此鉅款合無仰懇 皇上天恩俯念浙省新復之區

情形萬分竭蹶請將應解甘餉

飭部另籌改撥以免遲誤除咨戶部查照外理合恭摺具奏伏乞

皇上聖鑒訓示施行謹 奏

浙師出境追剿連獲勝仗情形摺

同治三年九月十五日

奏爲浙軍出境追剿竄賊連獲勝仗現籌辦理情形恭摺馳奏仰祈

聖鑒事竊湖州廣德竄賊經官

軍迭剿由玉山江山邊境敗竄江西廣豐總兵王開琳副將劉明珍率所部緊追八月二十六日馳抵上饒縣屬鐵山地方遇賊尾隊麾軍急擊賊向鉛山小路敗走劉明珍率部繞赴弋陽黃沙港王開琳挑奮勇八百人乘夜追至上路畝分左右兩路齊進中路虛發號鼓應之時正昏黑逆賊不辨官軍多少紛紛奪路狂竄官軍乘勢趕殺直至上饒鉛山交界地方天色平明賊見官軍人數無多率黨回拒適王開琳督大隊馳至賊復潰竄是日共斃悍賊數百名生擒四十餘名搜出長髮老賊五十八名一併斬之二十七日該逆竄至鉛山楊村五都一帶距河口鎮二十餘里時提督黃少春道員王德榜兩軍已抵河口料賊必走湖坊陳坊二十八日黎明黃少春率伍正得彭俊光李良平馬復震等五營王德榜派戴泰聘何秀清李運勝李運龍等四營進剿湖坊以河口汛把總楊映春爲嚮導馳抵該處適賊已踞村房見官軍猝至偕逆餘黨僞王宗譚姓等四人率衆乞降黃少春卽令降衆回戈擊賊自率各營及王德榜所部繼之王德榜蕭得龍復率所部兩營劉明珍率所部四營由黃沙港馳出截擊斃悍賊二千餘賊大敗官軍併力追殺逼近陳坊三面感之該逆將馬匹軍械拋棄道途越嶺翻山而遁是夜有僞王宗譚長元僞朝

將龔賢德汪元貴等率黨千餘赴王德榜軍前乞降王德榜受之廿九日黃少春王德榜復飭各營追過陳坊四十餘里賊之前隊已一股由茶山竄瀘溪縣境一股由雲礫關火燒關竄閩黃少春等因連日馳勦兵力疲乏甫收隊還適總兵劉明燈道員李耀南副將張福齊周紹濂遊擊黃元吉劉昌選等六營馳至黃少春營分路躡蹤緊追時溫處道魏喻義亦率所部由玉山廣豐馳抵陳坊見賊從雲礫關竄閩卽督隊由大路進追及賊之尾隊又擊殺十數名解散無算餘賊悉向福建光澤及江西瀘溪新城邊界翻山竄竄此浙軍出境追勦迭獲勝仗之實在情形也竊該道由皖浙邊界上竄人數實二十餘萬經浙軍節節截勦除擒斬解散投誠外闖入江西者不滿萬人復經王開琳追勦於廣豐上饒縣境黃少春王德榜追勦於鉛山湖坊陳坊等處其由茶山竄瀘溪地界者據劉典函報僅一二千人均無器械經該軍於貴溪所屬北案截之將其尾股擊敗分別遣散現在江西金盪新城一帶防兵厚集無虞竄漏洪幼逆李達繼等由江閩邊界山徑偷越餘黨計不過三四千人所過各處不往市鎮夜則燃火照路散漫奔走形勢極爲窮蹙臣前慮其闖入閩邊已飛飭康國器張運蘭相機截勦矣浙軍往返馳奔前在歙南截勦之時病者已有三分之一茲復未帶棚帳鍋甌忍飢露宿窮追兼旬患痢瘧及足腫諸症者竟十居六七其劉典新募之軍三千餘人入江以來轉戰數千里未稍休歇又爲疾疫所苦幾至不能成軍不得已令各軍將病勇暫留弋陽河口一帶稍爲養息仍酌挑精銳相機追勦黃少春所帶克勇除原部一營三旂

外其餘各營臣已札飭仍歸劉典統帶計此次各軍勦撫兼施除臨陣擒斬外其窘感乞降及拔出難民殆十餘萬大小頭目以數千計各將領既須躡蹤緊追又須分別散遣挑留兼程逐北千有餘里備極艱劬臣未敢沒其微勞可否歸併克復湖州安吉案內保獎之處出自天恩至屢奉諭旨務將幼逆捕獲現仍漏網稽誅臣調度遲延咎無可追應請旨將臣交部議處伏乞皇上聖鑒訓示施行謹奏

附陳提訊忠逆之子李士貴口供賊情片

同治二年九月十五日

再前據提督銜總兵劉明燈搜獲忠逆李秀成之子李士貴臣飭提來省鞫訊供姓周湖北江夏人咸豐二年湖北省城初次失陷被李秀成擄去爲子改名李士貴咸豐十一年加封偽二殿下率黨萬餘隨李秀成竄擾安徽湖北江西浙江江蘇各省兩陷杭城本年三月由丹陽竄至廣德復來湖州與黃金合股六月間幼逆洪福瑱自金陵缺口衝出沿途除擒斬逃散外至廣德實有五萬餘人內有僞養王吉慶元僞揚王李名成卽李秀成之胞弟并李秀成之母及李秀成親生兩歲之子該逆曾隨黃金見過洪幼逆一次幼逆髮被至肩是剪齊的並非鬚該逆由湖州廣德甯國竄至歙南建口被擒時洪幼逆及僞佑王李達繼僞借王譚體元僞干王洪仁玕僞揚王李名成及秀成母子已先渡河以後事均不能知道其僞首王范汝增受矛傷後實已身死等語臣因各營搜獲逆目甚多其逃匿降衆之中潛易姓

名希圖倖免者當復不少飭各營嚴密盤詰暫留李士貴質認稍緩卽行處決據所供各情則李秀成所供廣德之賊不擊自走并勸官軍勿專殺兩廣之人意在庇縱逆黨亦可概見理合附片陳明伏乞

聖鑒謹 奏

議政王軍機大臣 字寄閩浙總督兼署浙江巡撫左宗棠陝甘總督楊岳斌兩廣總督毛鴻賓福建巡

撫徐宗幹江西巡撫沈葆楨署廣東巡撫郭嵩燾同治三年九月二十三日奉 上諭左宗棠奏浙軍

出境進剿連獲勝仗現籌辦情形一摺與前日沈葆楨所奏情形大略相同此股逆匪由皖浙邊界上

竄人數衆多經浙軍節節追剿斬擒不少入江後復經王開琳等追剿於廣饒鉛山等處其由茶山竄瀘

溪地界者僅一二人該軍截其尾股現在江西金盪新城一帶兵力不少著楊岳斌沈葆楨督飭各軍

搜捕以清餘孽洪幼逆李遠繼等由江閩邊界山徑偷越勢極窮蹙感著左宗棠徐宗幹督飭張運蘭康國

器相機截剿勿令闖入閩邊楊岳斌等仍當飭軍跟追毋稍疎懈前由浙入粵之賊竄逼南雄等處著毛

鴻賓郭嵩燾妥籌辦理並將近日情形速行入奏如續有竄入餘匪務卽督飭兵練進剿勿任深入爲患

浙軍往返奔馳傷病不少著照左宗棠所請暫留弋陽河口稍爲養息各軍追奔逐北千有餘里備極勤

劬著准其彙入克復湖州安吉案內一併保獎洪幼逆踉蹌逃走已極狼狽終必就擒左宗棠惟當督飭

閩浙諸軍合力夾擊勿任漏網以竟全功所請交部議處著加恩寬免前據御史洪昌燕奏浙江海塘潰

決請速籌款修理當經降旨交戶部妥速議奏昨經戶部議准將浙海關等稅酌撥動用著左宗棠遵照部議章程履勘興修及此冬令水涸潮汐不旺易於告成東南民命攸關漕運大局所繫諒該督必能仰體朝廷惠愛黎元之意撙節帑項妥速籌辦其如何辦理情形並著趕緊具奏以慰馳廑將此由六百里各諭令知之欽此

覆陳杭州殉難大員死事詳細情形摺

同治三年十月初三日

奏爲遵 旨覆查杭州殉難大員死事詳細情形懇 恩賜卹仰祈 聖鑒事竊查咸豐十一年

十一月賊陷浙江省城所有將軍瑞昌前撫 臣王有齡學政張錫庚副都統傑純按察使甯曾綸等殉難之處均經奉 旨優卹尙有署布政使杭嘉湖道麟趾由知府陞任道員擢署藩司杭州被圍隨同巡

撫王有齡登陴固守六十餘日城陷復督勇巷戰力竭捐軀經查明具奏懇 恩賜卹嗣承准軍機大

臣字寄同治三年四月初七日奉 上諭署布政使司麟趾據奏訪聞於城破時殉難仍著左宗棠查

明該員死事詳細情形具奏再降諭旨等因欽此欽遵轉飭確查去後茲據布政使蔣益澧具詳據署錢塘縣知縣祕雲書詳據家人李榮稟稱前署浙江布政使鹽運使銜杭嘉湖道麟趾咸豐十一年九月間

粵匪圍攻省城隨同前撫 臣王有齡登陴守禦晝夜巡防至十一月二十八日黎明該署司巡視堞口適

大股逆匪撲犯武林門該署司卽帶親軍疾趨礮臺開放大礮詎知賊已陷城該署司旋卽在城殉難該

署司之母瓜爾佳薩克達氏投水自盡第二女時年十歲第五子時年六歲已捐職知府忘其名字均同時被害伊在場目擊因被擄至湖州今始逃回等情由司查明專案詳請具奏前來臣查署布政使杭嘉湖道麟趾於杭城失陷時力竭殉難洵屬大節凜然現經查明相應請 旨照布政使例議卹其該署司之母瓜爾佳薩克達氏投水自盡其一子一女同時被害節烈萃於一門深堪嘉憫合無併懇 天恩飭部議給卹典以闡幽光所有覆查杭州殉難大員死事詳細緣由理合恭摺具奏伏乞 皇上聖鑒施行謹 奏

鑒施行謹

奏

乍浦頭圍二口未能啟徵情形摺

同治二年十月初二日

聖鑒事竊照浙海關兼隸平湖縣之

奏爲乍浦頭圍二口未能卽議設關啟徵情形恭摺具奏仰祈

乍浦海口因離甯較遠稽察難周額征關稅向委杭嘉湖道就近監徵一年期滿仍由護關甯紹台道彙核計考該口內通嘉湖蘇省外達東南兩洋在昔承平之時商賈輻輳凡福建木植閩廣糖貨以及四川各省藥材雜貨無不遠涉重洋往來傳運并有採買東西洋銅鉛販運土洋貨物進出兩稅歲以爲常均爲關稅大宗此外本港各船尚有魚鱉等貨稅每年額徵正盈稅銀二萬八千二十三兩五錢一釐又兼管海鹽縣之頭圍一口年額徵銀五百二十二兩三錢二分五釐以浙海關甯紹温台杭嘉等屬各口年定統徵正額盈餘稅銀七萬九千九百餘兩總數而計乍浦頭圍口幾居統關稅銀十中之四課額雖重

徵解尙裕間或年穀不登客貨銷滯偶有闕額亦由甯關各口通算彌縫此乍浦關向徵稅務之情形也自咸豐三年金陵淪陷商貨梗阻又東洋銅鉛連年減運以致進出貨稅漸形減少每年闕徵稅銀五六千兩多至一萬餘兩不等甯關自顧不遑未能如前挹注歷任前道賠項之鉅半由於此咸豐十年髮逆近擾嘉蘇狼氛四逼是年一屆關期僅徵稅銀八千六百餘兩闕額更鉅咸豐十一年三月初八日卽關期首季之第一日乍浦失守關稅無徵三年以來未能設復嘉湖郡縣克復以後乍浦城市蕭條闕屋僅存瓦礫客商不至貨稅毫無臣於四月間附奏常洋兩稅銀兩留浙充餉片內聲明乍浦初復頭圍二口未能設關敢徵在案刻下時逾數月應體察情形酌量辦理飭據護海關甯紹台道史致諤查明覆稱乍浦關口額稅甚鉅當此庫藏支絀苟可設法敢徵自當殫力籌辦何敢畏難苟安曠懸課稅是該口在未經失守之時銅鉛停運商艘不前進出貨稅已屬年不足額積疲本難驟返失守之後商船四散卽如建木一項本在乍浦開有場號歲運來乍轉售各路今則遷開上海運木到滬行銷甚捷又如閩廣糖貨近皆載運洋船各省藥材雜貨亦因道路多梗改由別處販運雖經設法招徠而地方凋敝已極民屋焚毀居多城外一片荒地紳民未歸商旅亦皆裹足若遽設關敢徵先須改造關屋選派書役稽查無論籌款爲難而無貨進出卽無稅可徵經費徒糜關成虛設體察現在情形尙須寬以時日逐漸招徠勢難卽議設關應俟民業稍安商販招集再行酌量試辦等情具詳請奏前來臣覆核無異除飭俟商貨稍通卽

行設關徵不得藉詞延緩曠懸稅課外謹將乍浦頭圍二口尙難設關徵緣由專案恭摺具奏伏乞
皇上聖鑒訓示謹 奏

擬請温州關稅暫由溫處道徵解片

同治三年十月初三日

再温州海關稅務向由甯紹台道派人徵收因相距較遠流弊無從稽核臣上年奏請改歸溫處道就近
徵解毋庸歸甯紹台道兼管以昭核實會奉 旨允准在案茲准戶部咨開浙海關每年應徵正額銀

三萬五千九百零八兩二錢三分盈餘銀四萬四千兩向由浙江巡撫派委甯紹台道兼管其大關及所
屬各口岸徵收稅銀俱由該道彙總統算年滿時歸入浙海大關報解其額定稅數儻有短收著落該道
賠補歷經辦理在案茲請改歸溫處道就近委員駐關徵解毋庸歸甯紹台道兼管是一關稅務委派兩
道分收將來稅額如有短絀轉使甯紹台道得以藉口實與歷辦成案不符應仍由甯紹台道派員前往
徵收隨時將所收稅銀解交浙海大關彙核辦理以專責成於同治二年六月十五日具奏奉 旨依

議欽此臣查温州海關額征正餘銀九千五百六十六兩零瑞平口額征正餘銀二千五十餘兩向由甯

紹台道派撥關書經徵按季報解從未報有盈餘上年改歸兼署溫處道周開錫派員徵收將一切陋規

概行裁革自上年正月二十八日起至年底止實徵庫平銀二萬二千五百餘兩雖關稅旺絀時有不同
而較之甯紹台道派撥關書經收殊爲核實現須整頓稅務似無庸拘照成案辦理擬請將温州海關稅

務暫仍由溫處道就近派員徵解每季徵銀若干由溫處道移知甯紹台道歸入大關彙總報銷應解部
飯銀兩亦從關稅內劃出撥歸大關彙解以重稅課而昭覈實除咨部查照外理合附片具奏伏乞

聖鑒施行謹 奏

議請兩浙鹽商試行運票摺

同治三年十月初三日

奏為兩浙商鹽議請試行運票以資整頓而裕課餉恭摺奏祈 聖鑒事竊照兩浙年額應銷正票引

目八十萬五千三百九十六道照改餘引八萬道餘引十五萬道每年額征正餘引課三十二萬數千兩
有奇向由商人認數領運先課後鹽按綱造報奏銷因歷來行銷未能足額每以內外雜款墊報全完道
光年間岸情雖極疲滯通綱牽算尙能銷至五六成不等自咸豐三年金陵失陷淮海私鹽乘機侵灌杭
嘉松三所銷數驟減甚至片引不銷所恃紹所引地銷暢加以辦理西鹽融銷淮界勉力措拄尙不至全
行廢墮至咸豐十年以後安徽之徽州府廣德州暨江蘇之蘇常松太各府州以次不守繼而浙省各隘
所屬郡縣幾無完土官商星散竈戶逃亡奸民投墮而入公然以販私為恆業其時遍地賊蹤無人過問
自浙東郡縣先後克復以來始飭紹興設局暫行試辦票鹽然所票僅止一隅為數無幾本年二月間大
軍進克省城嘉湖相繼克復刻下全浙肅清居民漸次復業亟宜實力整頓以冀改復舊觀無如案牘既
全行燬失商竈又大半凋零間有一二舊商亦皆避寇甫歸赤貧如洗勢難責令照舊運銷是現在兩浙

鹽務不但求往日之暢銷不可得卽欲如咸豐八九年之情形亦勢有不能與其仍積疲之後相率因循不若乘更始之時別籌補救擬請杭嘉紹松四所一律試改票鹽無論所商舊商但能納費到庫卽給票認地行運並於各府設立府局稽查銷數所收課銀全數提作正課解局軍餉內外雜課槩行停支其萬不能不放之款隨時酌核支給作正開銷惟改引爲票未能限以定額能否暢旺尙無把握應以同治四年正月爲始試辦一年如果行之有效再行奏請遵行現在甫經試辦各所情形不同所收票課多寡懸殊且有應行分解江省釐款勢難一律尙須隨時更改應俟試辦數月後畫一釐定另行奏定章程至票運不行之地或由官運或議招商應卽察看情形核實辦理總之創辦之始首重緝私以疏票引痛革浮費以紓商困核減賣價以遏鄰私嚴查煎數以杜影射會此四者別無良策據兼署鹽運使蘇式敬詳請先行具奏前來臣查兩浙鹽務自遭兵燹商竈流離各口岸銷數疲敝已極若不暫議變通辦理必致無可挽救合無仰乞 恩施俯准將杭嘉紹松四所一律改行票運如果試辦有效再行酌定具奏請旨遵行除咨明吏部戶部將應頒額引暫緩飭發并請將運司以至府廳州縣督銷經銷處分暫免核計考成外合將試辦票運大略情形恭摺具奏伏乞 皇上聖鑒謹 奏

奏報賊竄閩疆撥兵援剿摺

同治三年十月初五日

奏爲江西廣東諸賊繞竄閩疆現籌撥兵援剿恭摺馳奏仰祈

聖鑒事竊逆賊李世賢汪海洋兩股

透經江西勦敗然黨夥甚衆時出沒江粵邊界臣在杭州距江西粵東各邊二千餘里於賊蹤一切未得
確耗昨連接福建撫臣徐宗幹藩司張銓慶函報臬司張運蘭總兵關鎮國將瑞金踞逆擊退後賊之入
粵者復由廣東大埔翻山竄犯汀屬武平縣境張運蘭聞賊逼汀界卽率所部三旗由武平進勦詎賊已
由小路抄入武平縣城張運蘭回軍轉戰賊大股突至衆寡不敵遂至失利賊卽分股竄陷龍巖州南靖
縣直逼漳州府城土匪游勇內應漳州府城卽於九月十四日失守徐宗幹現調林文察回扼永安臣查
漳州龍巖失陷汀州所屬亦徧地賊氛北與德化永春毗連南與廣東潮嘉接壤見江西瑞金會昌皆有
賊踞關鎮國現駐汀州康國器現駐邵武之軍均未可撤動撫臣徐宗幹調泉廈各處官兵六七千人分
防興泉並通永春等處兵單力薄殊爲可虞臣得報後卽飛飭提督黃少春副將劉明珍兩軍四千五百
人由衢州取道浦城赴邵武一帶接防以便騰出康國器全部進勦漳州飭援江各軍除王德榜王開琳
兩軍仍留吉安一帶防勦外劉典一軍八千人卽由建昌取道以赴汀州惟此兩路由江浙邊界赴閩山
徑崎嶇深恐緩不濟急現逆賊已踞漳州有下趨之勢省垣爲根本重地興泉兩郡爲省城門戶豈可稍
涉疎虞再四思維應由海道出師以期便捷當飭提督高連陞率所部三千五百人馳赴甯波雇坐輪船
由海道先赴福建省城察看逆勢趨向相機迎勦以期穩固臣俟各軍拔行後卽擬進駐衢州就近調度
所有此次賊竄閩邊漳州失陷詳細情形諒撫臣已奏報在途理合將調派各軍赴閩緣由恭摺馳奏伏

乞 皇上聖鑒訓示施行謹 奏

請 飭浙江撫臣速赴本任片

再逆賊入閩入粵雖均爲東南大局之害然以形勢言之則入閩之患較之入粵爲稍輕如能於閩中殲除淨盡不致流毒他方未始非不幸之幸臣擬俟各軍拔行後卽進駐衢州相機調度如局勢必須急進自當赴閩親督諸軍迅速勦辦惟浙撫係臣兼署一切善後事宜猶須次第經理臣既赴閩勢難兼顧應請 飭下新任撫臣馬新貽速赴本任接辦以重職守其篆務可否卽交藩司蔣益澧護理伏候

訓示施行謹附片請 旨

附陳漳賊隨退龍巖仍應速援片

再正拜摺間接據署福建興化府莆田縣知縣吳光漢稟報漳州府城於九月十四日被匪混入大肆焚掠十五日仍退往龍巖興郡民心已漸安定臣維漳州賊退尙係得自傳聞而龍巖與粵東毗連各處均爲賊踞閩省軍情仍屬喫緊所有三路入閩官軍應仍星馳前進俾壯聲援而速戡定理合附片陳明伏

乞 聖鑒謹 奏

議政王軍機大臣 字寄閩浙總督兼署浙江巡撫一等伯左宗棠兩廣總督毛鴻賓福建巡撫徐宗幹江西巡撫沈葆楨署廣東巡撫郭嵩燾同治三年十月十三日奉 上諭左宗棠奏賊竄閩境派兵援

勦請催巡撫赴任並漳州賊匪退往龍巖各摺片覽奏均悉江西逆眾由廣東大埔翻山竄犯汀屬武平縣境張運蘭轉戰失利賊分股陷龍巖州南靖縣入漳州府城徐宗幹調林文察回扼泉州左宗棠飭提督黃少春副將劉明珍由衢州取道浦城赴邵武一帶接防以便替出康國器全部進勦漳州劉典一軍由建昌赴汀該督恐緩不濟急已飭高連陞由海道赴福州省城相機迎勦並擬進駐衢州就近調度催新任巡撫馬新貽赴任所籌均甚周妥本日已諭知曾國藩喬松年馬新貽令馬新貽即赴浙省矣浙省接辦善後各事亦關緊要萬一閩省軍情更緊馬新貽一時未能赴浙即令蔣益澧暫行護理仍隨時兼顧以期無誤漳州踞逆是否退往龍巖各該府州縣等城文武如何下落均著左宗棠徐宗幹查明具奏龍巖與粵東毗連各處俱爲賊踞閩省軍情萬分喫緊著左宗棠催令派出各軍並親督官軍速籌進勦張運蘭一軍雖小有挫失左宗棠徐宗幹仍當督飭該臬司激勵將弁以期再整軍威閩省邊防被賊闖入連陷數城徐宗幹何以先事毫無准備如再有疎失自問當得何罪毛鴻賓沈葆楨等於賊匪竄出境外何以不令諸將跟追畛域分明以鄰爲壑殊非同心禦侮之道著卽飭令在事員弁出境窮追會同閩浙諸軍協力勦洗淨絕根株其瑞金等處踞匪又南雄一帶竄匪仍著各該督撫認真搜勦勿留餘孽左宗棠另摺奏保賢員已照所請降旨允准惟記名道府與定章不符已將該員交軍機處存記候旨簡用並明降諭旨將周開錫開缺改爲以道員留於福建浙江補用將此由六百里各諭令知之欽此

懇准提督回籍調養傷疾摺

奏爲署理浙江提督傷疾舉發懇 恩准予回籍調養恭摺奏祈 聖鑒事竊署理浙江提督記名

總兵官記名提督秦如虎於咸豐十一年冬間奉 命帶兵援浙克復福建福鼎縣城攻破錢倉賊巢

馳抵平陽掃除金錢會匪力解溫郡城圍跟路追勦克復處郡苦戰數十次致受重傷當經請假調治嗣

欽奉 諭旨署理浙江提督抵任之後於營務一切留心整理正資裨助惟舊傷時發時愈步履維艱

本年四月間分咨 臣代爲奏懇回籍 臣以彼時回浙回粵道途中梗當經咨請暫留俟道路稍通再爲陳

奏咨復去後現准該提督來咨以浙省軍務已竣全境肅清該署提督傷發難痊未便戀棧貽誤請爲奏

懇 天恩准予回籍調養等情前來 臣覆查無異除將浙江提督篆務遴員前往接署奏報外謹恭摺

具奏伏乞 皇上聖鑒訓示施行謹 奏

陳明浙江提督委員署理帶兵援閩片


再署浙江提督總兵官秦如虎傷疾舉發經 臣奏懇 天恩准予回籍調養其所遺提督篆務 臣查有

記名提督尙勇巴圖魯高連陞威望素著堪以委署浙江提督惟現在閩省永定武平龍巖南靖漳州各

城均已失陷軍情喫緊 臣擬派高連陞於接署提篆後卽帶所部由輪船馳赴福建省城相機援勦其提

督衙門日行事件卽委提標中軍參將代拆代行除分別飭遵外謹附片具奏伏乞 皇上聖鑒訓示

謹
奏



左文襄公奏疏初編目錄

卷十八

奏報臬司受傷遵員接署赴閩會勘摺

浙餉維艱陳請抵解甘餉摺

請將本任廉銀作爲京餉報解片

附陳運司未能赴任懇請開缺片

陳明全浙肅清廣東協餉停止片

寬免議處謝 恩摺

請獎克復杭州等城出力將士摺

請獎外國助餉出力員弁片

附陳所保員弁免其加考毋庸核減片

議減杭嘉湖三屬漕糧大槩情形摺

請將北新關暫緩開設由釐捐撥抵關稅摺

敬陳薦舉人材摺

左文襄公奏疏

初編卷十八目錄



左文襄公奏疏初編卷十八

奏報臬司受傷遊員接署赴閩會勘摺

同治三年十月十四日

奏爲福建臬司鞠賊受傷現無下落遊員接署臬篆帶兵赴閩會合各軍進剿恭摺奏祈 聖鑒事竊

照福建臬司張運蘭前因閩省邊防喫緊經 臣奏調統帶所部由粵赴閩於八月二十八日馳抵汀郡旋

卽會督各軍越鞠江西瑞金踞匪因汀屬武平被匪窺竄張運蘭率部馳援酌留弁勇協守縣城自率三

旗湘勇扼紮下壩地方迎剿九月十一日辰刻匪衆屢次竄撲均經擊退詎該逆另股由旁路松源一帶

直犯縣城卽於巳刻失陷張運蘭折回馳救該逆四面圍裹因勇力較單死傷枕藉張運蘭被賊矛刺傷

重落馬親勇馳往救護復被逆賊衝散有隨帶親勇湯友德馳回汀郡赴總理老湘營務處選用道張恆

祥縷述情形卽據該道具稟前來 臣查武平失後永定南靖龍巖俱陷漳郡復被土匪勾引髮逆占踞業

經 臣調撥勁旅水陸馳援該臬司張運蘭久經戰陣勦匪向稱得力此次孤軍挫陷身受重傷尙無實在

下落所有福建按察司印信現存汀郡城刻下該處軍情緊急閩省又無知兵大員堪以接署惟查記名

臬司王德榜久歷戎行謀勇兼備先經 臣調赴江西勦賊現在吉安贛州一帶堪合速帶所部 臣標五營

卽由江西瑞金入汀會合各軍攻剿並接署福建臬司篆務以資得力除檄飭遵照並確查張運蘭下落

另行具 奏外理合會同福建撫 臣徐宗幹恭摺奏伏乞 皇太后 皇上聖鑒訓示施行謹

奏

議政王軍機大臣奉 旨另有旨欽此

浙餉維艱陳請抵解甘餉摺 同治三年十月十四日

奏為浙江籌餉維艱近復派撥重兵馳援福建裹糧以行應解甘餉無從籌撥請將協濟楊岳斌赴甘行資抵解甘餉恭摺仰祈 聖鑒事竊臣於九月二十三日欽奉 寄諭浙江應解甘餉昨據左宗棠

奏地方彫敝請飭改撥現在雖令戶部速議具奏惟甘省餉項奇絀仍著左宗棠無論如何為難先行設法籌解若干以濟急需欽此又於十月初八日欽奉 寄諭楊岳斌奏懇陳回籍募勇籌備餉項情形

一摺著左宗棠於本省籌撥銀八萬兩解交楊岳斌行營以便該督迅速募勇起程等因欽此旋准戶部咨錄原奏內開浙省郡縣甫經次第克復該督所陳自係實在情形惟甘省軍務萬緊需餉甚亟應將前次奉撥甘餉銀二三十萬兩先行籌解十萬兩趕緊派委幹員探明道路解往甘省交納以救燃眉其餘奉撥銀兩陸續籌出再行解往於九月二十三日具奏奉 旨依議欽此伏查浙省自經兵燹彫敝萬

分新復地方不獨錢糧無可征收且須另籌賑撫經費軍需項截至本年二月底止積欠或九十箇月或七八箇月不等至今未能清釐新餉又欠兩月茲幸全境肅清擬將勇丁陸續裁撤為節省餉需之計而裁撤一營總需銀二三萬兩計自八月以來新舊共撤四十餘營需餉四十餘萬兩尚有數營應撤因

餉項不敷未能即時撤遣本省軍需已形支絀復加以援江援閩各營餉項俱由浙省支應尤覺竭蹶萬分應解甘餉此時實無從籌撥卽楊岳斌奏撥行資八萬兩亦難如數措解臣亦知甘省需餉孔殷楊岳斌行資不可緩何敢稍事諉延惟值此庫藏空虛本省欠餉尙難籌給合無仰懇天恩俯念浙省彫敝一時無巨款可籌所有應解甘餉暫免協撥其楊岳斌行資臣當於無可設法之中飭司勉爲勻撥銀四萬兩於十一月內解交湖南應用卽請作爲浙省協甘之餉理合恭摺具奏伏乞皇上聖鑒訓示施行謹奏

議政王軍機大臣奉 旨另有旨欽此

請將本任廉銀作爲京餉報解片同治三年十月十四日

再臣於十月初三日接准戶部咨開同治三年九月十五日奉

上諭戶部奏本年京餉請嚴飭各省

趕解以供開放一摺閩海關欠解稅銀十萬兩福建欠解茶稅銀二萬兩著接奉此旨後各將未解銀兩務於十二月內儘數解齊倘仍飾辭宕延致誤要需卽由該部查照奏定章程指名嚴參等因欽此臣當

卽飛咨將軍撫臣一體遵照去後伏維閩省本年兩被賊擾籌餉徵兵萬分支絀昨接徐宗幹函稱以軍

務緊要面商英桂擬暫由閩海關借撥關稅銀兩以應急需而浙省派往援師每月餉項臣尙飭由浙省

支撥福建僅供本省軍需已形竭蹶現奉飭催京餉恐難如數解濟京師待餉孔殷豈敢膜視臣上年三

月蒙 恩簡授閩浙總督以來閩省按月解送本任七成養廉計存庫平銀一萬兩應卽作爲京餉先行報解臣已將此項銀兩發交藩司轉發甯紹台道由票號兌京交納伏乞 飭部查照理合附片具

奏伏祈 聖鑒謹 奏

議政王軍機大臣奉 旨另有旨欽此

附陳運司未能赴任懇請開缺片 同治二年十月十四日

再浙江臬司劉典上年聞訃丁憂因皖浙軍務正值喫緊經臣奏請改爲署任仍留軍營帶兵剿賊嗣皖

南軍務稍定復奏明准其回籍治喪本年二月逆賊闖入江境勢甚鴟張臣又飭其在籍募勇三千人赴

江助剿旋奉 恩命幫辦江西皖南軍務轉戰數月幸江省全境肅清該臬司呈請開缺終制並以母

氏年逾七十懇請終養等情前來臣查該臬司至性過人再四瀝陳本應據情代爲奏請惟現在賊由江

西粵東竄擾閩境連陷數城臣已飭該臬司由江西建昌赴汀州一帶相機剿辦賊事遲速尙未可定自

應俟閩省軍務肅清再行請 旨辦理其所署浙江按察使應請先行開缺另 賜簡放又浙江鹽

運使李榕 簡放兩年因在安徽軍營未能履任運司篆務本年三月奏請暫以杭嘉湖道蘇式敬就

近兼署現改行票運釐定章程必須責有專司方足以資整飭浙省現無熟悉鹽務大員李榕未能到任

應請 旨另簡賢員補授斯缺俾臣得稍收指臂之助理合附片具 奏伏乞 聖鑒訓示施行

謹奏

議政王軍機大臣奉 旨另有旨欽此

同治三年十月二十三日內閣奉

上諭左宗棠奏運司未能赴任懇請開缺等語浙江鹽運使李榕

現在安徽軍營帶兵勦賊未能履任著准其開缺仍以鹽運使候補浙江鹽運使員缺著楊昌濬補授所遺浙江督糧道員缺著周開錫補授欽此

議政王軍機大臣

字寄福州將軍英桂閩浙總督兼署浙江巡撫一等伯左宗棠福建巡撫徐宗幹同

治三年十月二十二日奉

上諭左宗棠奏臬司查無下落遴員接署臬篆並請將協濟楊岳斌行資

抵解甘餉存庫養廉銀兩作為京餉匯兌解京及劉典李榕均請開缺另簡各摺片覽奏均悉張運蘭馳
援武平縣城孤軍挫陷身受重傷至今尚無下落所有福建按察使印信現存汀郡刻下該處軍情緊急
自應遴選知兵大員前往接署著照左宗棠所請福建按察使即著王德榜署理並飭令速帶所部由江
西瑞金入汀會合各軍實力攻勦毋稍遲誤其張運蘭實在下落並著左宗棠徐宗幹查明具奏劉典現
由左宗棠檄赴汀州勦賊軍務喫緊之時未能遽准終養其浙江臬司本任即毋庸先行開缺現署臬篆
之林聰彝如果閱歷尚淺於此缺不甚相宜即著左宗棠另派賢員接署或於鄰近省分另有所知人才
亦可酌保數員候旨簡用李榕現在皖北帶兵一時未能履任業准其開缺浙江臬司已簡放楊昌濬所

遺浙江糧道一缺並令周開錫補授矣馬新貽已屢經寄諭催令赴任著左宗棠再行咨催勿令延緩左宗棠所陳浙江籌餉維艱甘餉無可措撥請籌銀四萬兩解交楊岳斌應用抵作甘餉等語自係實在情形第楊岳斌募勇赴甘非厚集巨款難以成行入甘以後協餉尤關緊要仍著左宗棠於無可籌畫之中極力設法將欠解之四萬兩陸續解赴湖南以符前撥八萬原額其甘省協餉並著源源籌解以維大局毋許藉端推諉京餉關係緊要仍著英桂徐宗幹遵照戶部原議於閩海關及茶稅欠解項內迅籌解納至養廉係左宗棠應得辦公之項該督憲將養廉銀一萬兩抵餉解京之處碍難允其所請如業已匯兌來京卽著英桂於關稅項下如數撥還可也左宗棠另片奏查明繆梓死事情形請賞還卹典等語已降旨照准矣將此由五百里各諭令知之欽此

陳明全浙肅清廣東協餉停止片

同治二年十月十四日

再臣欽奉同治元年正月初四日

上諭廣東粵海關撥解浙江餉十萬兩諭勞崇光等或由江西轉

解左宗棠軍營或由海道駛運上海由曾國藩轉解左宗棠軍營總期得以迅籌接濟俾利師行等因欽此旋經曾國藩奏請開辦廣東釐金凡釐務應得之餉先解浙江軍營其次則解安徽軍營其廣東協浙月餉十萬兩卽在釐金項下抵除仰蒙

恩諭允准

特簡都察院右副都御史晏端書馳赴廣東

督辦分批撥解皖浙軍營在案

臣

查廣東協浙之餉自元年正月奉

旨之日起截至本年八月底止

連閩共計三十三箇月應協浙餉三百三十萬兩除道員義泰於同治元年領解廣東協餉五萬五千兩又官捐銀五千兩除短平色外實共收銀五萬一千五百四十七兩六錢一分係前撫臣王有齡飭赴廣東催提應歸從前欠餉結算外臣接任後僅收廣東撥給蔣益澧行費銀六萬兩又採辦洋槍洋藥銀一千兩又前後十二批共解釐餉二十四萬兩臣因曾國藩軍營需餉甚亟又於釐餉內分撥二萬兩解赴金陵計浙省共收粵餉二十八萬一千兩其釐金項下實僅收二十二萬兩曾國藩前奏至八月底止共收廣東釐餉一百二十萬兩是臣軍所得不過十成之二現在浙省軍務肅清所有前項協餉自應停止理合附片陳明伏乞 聖鑒謹 奏

寬免議處謝

恩摺

同治二年十月十七日

奏爲恭謝

天恩仰祈

聖鑒事竊

臣於十月初一日欽奉九月二十三日

上諭左宗棠奏浙

軍出境追剿大獲勝仗現籌辦情形一摺洪幼逆踴躍逃走已極狼狽終必就擒左宗棠惟當督飭諸軍合力夾擊毋任漏網以竟全功所請交部議處著加恩寬免欽此跪聆之下感悚莫名伏念臣未習韜鈴謬膺軍旅蠲蒸三載轄疆幸就救平蟻聚一隅逆衆尙多狂逸雖八面早張 天網勿漏游魂而偏師竟失前禽終輸捷足負愆彌凜抱愧良深迺蒙 皇上天恩寬免議處感 高厚之姑容益涓埃

之難報惟有督飭諸軍迅圖勦辦盡掃餘氛以冀稍舒

宸衷所有微臣感悚下忱理合繕摺恭謝

天恩伏乞 皇太后 皇上聖鑒謹 奏

議政王軍機大臣奉 旨知道了欽此

請獎克復杭州等城出力將士摺 同治三年十月二十日

奏為遵將克復杭州餘杭 甯桐鄉富陽各城出力員弁兵勇請 旨獎敘以勵戎行事竊 臣前准兵

部火票遞到同治三年三月十二日內閣奉 上諭左宗棠奏攻克杭州餘杭兩城一摺所有在事出

力將士著左宗棠查明擇尤保奏欽此又奉三月二十日 上諭左宗棠奏攻克杭州餘杭兩城詳細

情形一摺其餘出力陣亡各員弁著左宗棠查明分別奏請獎卹該部知道欽此又奉正月十七日

上諭左宗棠奏官軍收復海甯州城一摺其餘出力員弁著左宗棠查明俟克復杭州彙案保奏欽此又

奉二年九月初六日 上諭左宗棠奏官軍克復富陽縣城並攻克新橋各壘大獲全捷一摺所有在

事出力水陸弁勇著准其彙案保奏候旨施恩欽此竊 臣軍自上年二月肅清浙東後即飭蔣益澧會督

水陸各軍逼攻富陽扼勦新橋援賊八月間將富陽縣城攻克蔣益澧即率所部直搗杭州 臣督各軍進

攻餘杭因海甯一城為杭州東北屏蔽桐鄉與海甯毘連迺分軍先取海甯桐鄉並會合蘇軍攻克嘉興

府城以孤杭垣之勢復將杭州餘杭城外賊壘次第掃蕩本年二月二十四日兩城即同時攻克該將士

等大小百數十戰使久踞堅城先後恢復實屬異常奮勉倍著勤勞 臣欽奉 諭旨當即恭錄行知各

營茲據開摺彙案請獎前來臣覆核無異除記保以藍翎千總把總外委拔補者咨部註冊外其尤爲出力各員合無仰懇 天恩俯准給予獎敘至迭次打仗陣亡及傷故病故將弁除蔣益澧一軍尙未查覆外其已經查明者併請 飭部照例議卹理合分別開單恭呈 御覽伏乞 皇上聖鑒施行

謹 奏

請獎外國助勦出力員弁片

同治三年十月二十日

再此次攻克杭州權授中國總兵法國參將德克碑督軍助勦極肯出力除德克碑已隨摺 奏請獎

敘外其所部常捷軍外國員弁茲據開單請獎前來可否仰懇 天恩俯准將三品藍翎遊擊法蘭克

藍翎都司勒佛材哪維真三員均請 賞戴花翎都司白思格礮才爾拜士牌魯矮守備夾勒乃五員

均請加四品頂戴並 賞戴藍翎守備謝克耆微爾美德買勒格千總介思德明盧幣囊五員均請加

五品頂戴並 賞戴藍翎以示鼓勵之處出自 聖裁理合附片具奏伏乞 聖鑒訓示施行謹

奏

附陳所保員弁免其加考毋庸核減片

再此次攻克餘杭各城所保員弁稍多實因浙東肅清後該將士等從征年餘大小百數十戰克復各城皆彙歸此次辦理臣逐加覆核並無冒濫其隨營文員間有請保免補免選本班者亦皆係從征最久始

終出力如蒙

天恩俯准給獎並請

飭部毋庸查照尋常勞績核減又查現在吏部議定章程奏

保各員皆須分別填註考語除此次已填註外其克復遂安嚴州金華及上年援皖援江各案皆未註考現各營有已經遣散者各員中亦有續經保升及病故者可否將已上各案免其加考俱照原請給獎之處出自 皇上逾格鴻慈理合附片具奏伏乞 聖鑒訓示施行謹 奏

議減杭嘉湖三屬漕糧大概情形摺

同治三年十月二十六日

奏為覆查杭嘉湖三屬征收漕糧積弊並現籌核減大概情形恭摺具奏仰祈

聖鑒事竊 臣 欽奉同

治二年六月初三日

上諭浙省疊遭兵燹小民流離失所殊堪軫念自應將該省漕糧量予減免以

示公溥之仁著左宗棠通飭杭嘉湖三屬將實在應征漕糧稅則詳細確查各按重輕分成量減奏明辦理欽此當因杭嘉湖三屬均未克復戶口流亡征册燬失應俟地方肅清各就各地情形分別裁減於上年十二月覆奏在案本年八月湖州克復浙江一律肅清即與布政司蔣益澧糧儲道楊昌濬商議於省城設立清賦總局悉心規畫期於周妥查杭嘉湖三府漕額之重與江蘇蘇松太等蘇松太既議減三分之一則杭嘉湖亦宜仿照辦理就杭嘉湖三屬征糧科則言之又以嘉湖為重杭州次之就嘉湖兩府言之又以歸安烏程嘉善嘉興秀水為最重平湖海鹽桐鄉石門德清次之長興武康各屬又次之杭屬臨安於潛昌化新城等縣山多田少較之嘉湖糧賦固輕出產亦遠遜也嘗攷杭嘉湖三屬賦重之由始於

宋季賈似道之官田元代因而增之明初張士誠據姑蘇兼有嘉湖各郡明祖平張士誠遂用其租籍收糧已而又括官田之糧均之民田層遞加增民困獨甚我朝定鼎以來康熙中免三分之一者一年

全免者一年雍正六年又減嘉湖二府額賦十分之一計銀八萬一千餘兩中間偶遇水旱偏災無不隨時蠲緩厚澤深仁有加無已故民力得以稍紓至乾隆嘉慶年間家給人足曾歷辦全漕道光癸未

辛卯以後兩次大水民間元氣大傷賦重之處未能全漕起運遂歲報災歉蠲緩頓仍然朝廷雖屢沛殊恩而小氓未盡沾實惠蓋一縣之中花戶繁多災歉蠲免悉聽經書冊報世家大族豐收者亦能蠲

緩編氓小戶被鞫者尙或全征且大戶僅完繳正額小戶更任意誅求遲至厥滿停收卽須改征折色每石價至五六千文不等以小戶之浮收抵大戶之不足官吏徵收不善小民咨怨有詞故開漕之案往往

因之而起然州縣浮收亦非能盡飽私橐也從前河運之時旗丁需索幫費如咸豐初年每兌漕一石除給報部漕截銀三錢四分六絲外尙須由州縣貼給費錢千文幫費一日不清幫船一日不開州縣惟恐

有誤運期不得不浮收以填豁壑而小民苦於苛斂弱者日受追呼桀者或從中持之因而竄入大戶以致小戶日少大戶日多旗丁之索費日重州縣之虧項日積民以完漕爲苛政官以辦漕爲畏途積弊相

因官民交困咸豐二年改行海運每石連商船水脚及南北用款統計約需銀八錢有零曾奏准以給幫漕截抵支水脚其不敷之項按各州縣幫費重輕酌提解省津貼自七錢至四錢不等較河運之時已爲

左文襄公奏疏

初編卷十八

六

節省茲奉

恩旨飭議核減漕糧將舉數百年積困而紓之崇朝固三郡羣黎所呼籲祈禱而不得者

臣等躬逢

盛世若不能博訪利弊之所在而悉心參酌衷諸至當以規永久不獨無以副朝廷

曠古未有之

隆施亦何以慰草野久困思蘇之至意謹就現在漕務應行籌辦大概情形列爲四條

敬爲我

皇上陳之一曰減正額浙省杭嘉湖三屬額征漕白改漕南匠行月等米共一百一十餘萬

石征糧之則大小不同卽浮額之糧亦多寡不一現須分別量減自應先去浮額之甚以除輕重不均之弊擬各按上中下賦則分別定數如每畝征米一斗一升以上至一斗八九升者爲上則自六升以上至不及一斗一升者爲中則不及六升者爲下則按科則之重輕分別核減總期於額數征目酌減三分之一庶科則定而減數因之而均也一曰減浮收向來收漕加耗每石自一二斗至七八斗不等各視花戶貴賤強弱以定收數多寡今額漕旣經減定則浮收之款豈可任其因仍惟州縣辦漕有修倉搭蓬紙張油燭之費有倉夫斗級漕記差役飯食之費有內河運米交兌夫船耗米之費有交米書役守候之費一切用款甚鉅且收漕交兌相隔一二月風晾搬轉虧折必多不能不於正漕之外酌留運費以資津貼應俟查明各州縣用款由外核實辦理其向來加尖加價勒折諸弊自核定之後概行裁革紳民一律均收不得再有大小戶之分庶穀祿平而公私因之而利也一曰籌運費浙省向辦海運每石需費約銀八錢除向給幫丁漕截銀三錢四分六絲抵支外尙不敷銀四錢五分零現正額浮收概行分別核減自未便

再由州縣議提津貼擬請將海運經費每石定以八錢爲額除支漕截外不敷之款另行籌足查浙漕如照統減三分之一每年起運之米不過六十萬石上下漕截一款不另核減計可餘銀十餘萬兩又節省給幫本折行月經費實米變價可得銀十二三萬兩又屯田租息及節省幫弁廉俸可得銀數萬兩統計將及三十萬兩足抵海運經費至所動正款八錢按年將動用款目據實奏結應毋庸造冊報銷以歸簡便並不得逾八錢之數以示其限制庶浮費裁而上下因之而利也一曰裁陋規向來州縣收漕一切陋規極爲繁雜此次核定章程應令各州縣據實查明開摺呈送分別裁減庶弊竇清而漕政因之而肅也嗣後非實在旱潦不得再報災歉卽實在民欠亦不得再報墊完而近來數十年相沿陋習亦可除矣至應減米數須查明科則方能核定現在地方新復冊籍無存已飭各屬勒限趕造除白糧粳糯爲

天

庚正供擬仍照額辦運擬減之數應統於漕糧項下註扣此外南糧行月匠糧等仍各歸各款按成扣減至杭嘉湖三屬漕糧稅則輕重不同自應查照各縣科則量減再併計總數共減若干伏查各處被擾情形如杭屬之臨安新城於潛昌化湖屬之長興武康孝豐安吉皆路通徽甯受害尤烈室廬盡成灰燼田地久已荒蕪卽招集遺黎亦寥寥可數從前道光年間及咸豐初年辦理漕運每屆皆不過七八十萬石及五六十萬石不等現擬照杭嘉湖全額統減三分之一如能辦理全漕與歷屆尙不相上下惟刻下三屬情形卽照減三分之一明歲新漕亦斷難如數征納而欲爲經久之計又不能不通計

國賦盈虛

以爲定則可否仰懇

皇太后

皇上天恩俯准將杭嘉湖漕糧統減三分之一明歲新漕再酌量

辦理之處出自

聖裁至海運經費每石向祇支銷漕截銀三錢四分六絲此次請以八錢作爲定額

與部案不符惟查商船水脚及南北用費每石實需銀八錢其餘不敷之項皆係各縣津貼此時不將津貼一項裁革則雖有核減之名仍未能得核減之實故不得不據實瀝陳籲懇 聖恩准予漕截並行

月屯租各項下照數動支庶漕弊可以盡革又通省地漕銀兩及浙東各屬南米或關係餉需或抵支兵食除正額毋庸查減其浮收之款亦應分別裁革現甯波紹興溫州三府業已定章處州亦經減定其餘各屬應卽一律核減以昭公溥除俟查各縣酌減額數另行具奏外理合將議減杭嘉湖三屬漕糧大概情形恭摺具奏伏乞 皇太后 皇上聖鑒訓示施行再 臣於十月二十四日交卸撫篆此摺係由

臣先行定稿是以護撫 臣未經列銜合併聲明謹 奏

議政王軍機大臣奉 旨戶部議奏欽此

請將北新關暫緩開設由釐捐撥抵關稅摺 同治二年十月二十六日

奏爲浙省地方新復請將北新關暫緩開設按月由釐捐酌撥以抵關稅恭摺仰祈 聖鑒事竊照杭

州北新關向設武林門外其水旱城門及附城水陸要口均設稅卡每年額征正餘稅銀十七萬二千六百餘兩銅銀水脚銀一萬五千三百餘兩本年二月省垣克復前織造鶴昶奏明俟三月後再設關試辦

嗣於七月十一日啟關迄今已逾三月征數寥寥而釐稅亦形減色推究其故因向來關書巡役視爲利藪藉端刁索任意抽收商民久已視爲畏途茲當公私罄竭之餘遽行設關書役故態復萌以致商賈裹足不前咨怨更甚迭據各商呈控以釐捐與關稅雖同爲商所應納然輸於釐局者無留難詐索之煩輸於關口者有守候指勒之害臚列十款備陳苦況臣知其情狀非誣咨商織造恆延擬以釐金劃抵現收關稅會奏暫停關口征收以順輿情恆延以事非定制未免爲關吏所持不敢逕決臣維杭州省垣向稱繁富自經兵燹彫敝不堪至今市肆蕭條未能復業卽設法招徠猶難期速復舊規若令竭澤而漁各懷疑畏不但百貨翔貴商賈無利可圖卽此子遺之民生事艱難必致益形窘感此固事理之不容坐視者也然使關稅能如前暢旺下有所損而上果有所益臣亦何敢擅議更張乃自八九兩月正當關期暢旺之時而該關口極力搜羅所得稅項每月不過三千數百兩而止卽照此數率算一年所獲亦不過四五萬兩而虧欠正餘各款常在十萬以外是暫時復設關口下有所損而上並無所益亦何樂而爲此乎臣與在省司道從長集議謹擬於浙江各屬釐捐項下按月劃撥錢一萬串解交織造爲採辦一切工料之需另撥銀一千兩津貼織造司庫庫使等辦公及該衙門書吏匠役紙張飯食各項用費其向解部科飯食卽於每月撥解錢一萬串內由織造酌量解給計每年釐局共撥解錢十二萬串市價約合銀九萬兩又津貼銀一萬二千兩以抵關稅較該關現征銀數已加倍徒於該關公私均有裨益嗣後如餉需稍裕

釐捐有餘尙可量爲加撥以補正額統俟軍需一律告竣釐捐停止再復舊制辦理庶關釐不致並舉商民得以稍紓亦用其一緩其二之義也如蒙 俞允卽請 飭下杭州織造速將關口各稅一概暫

停毋聽關書懲患別生枝節庶關稅得歸有著而杭州商民永戴 皇仁於無極矣謹會同護撫臣蔣

益豐恭摺具奏伏乞 皇太后 皇上聖鑒訓示施行謹 奏

同治三年十二月初二日內閣奉 上諭左宗棠奏請將北新關暫緩開設按月由釐捐酌撥以抵關

稅一摺據稱浙省疊遭兵燹彫敝不堪市肆蕭條小民未能復業卽設法招徠瘡痍猶難遽復若再竭澤而漁不但百貨翔貴商賈餬口無資卽此子遺之民生計益形窮蹙北新關試辦已逾三月征數寥寥實因關胥巡役等向來視爲利藪一經設關故態復萌藉端刁索以致商民視爲畏途裹足不前請將關稅暫停以順輿情等語所奏切中地方利弊浙省蹂躪已久正宜休養生息以培元氣若任令關胥巡役人等私作威福肆意誅求於國課毫無裨益而閭閻苦累甚深殊非體恤商賈之道著恆延將北新關暫緩開設關口各稅一概暫停抽收毋得任聽關書等懲患別生枝節並著照左宗棠所擬於浙江各屬釐捐項下按月劃撥錢一萬串解交織造爲採辦一切工料之需另撥銀一千兩津貼織造司庫庫使等辦公及該衙門書吏匠役紙張飯食各項用費餘著照所議辦理俟軍務一律告竣釐捐停止再行循照舊章辦理該部知道欽此

敬陳薦舉人材摺 同治三年十月二十六日

奏爲敬舉人材請 旨錄用以昭激勸事竊臣前准部咨同治元年九月初四日奉 上諭御史劉

慶奏薦舉人材應令分別聲明以備器使一摺前因尙書羅惇衍奏薦舉人材宜認真慎保當經降旨令大學士及各部院大臣於平日真知灼見者臚列事實秉公保奏茲據該御史奏稱全材實難貴在量器使用當其才可奏功用違其才亦足愆事等語所奏不爲無見嗣後中外各大臣督撫於薦舉所知卽將該員才所優爲或從前見諸施行已著實效者於摺內詳細臚列將來次第錄用卽就其所長授以職任考其事功倘所舉之員不能勝任定將原保之大臣督撫等治以所舉不實之咎中外各大臣等務當各矢公忠悉心遴選講求實際毋探虛聲用副朝廷求賢若渴量能授官至意欽此跪聆之下仰見我 皇上愛惜人才綜覈名實至意臣自入浙以來留心延訪求諸踐履之間證以事爲之實得四人

焉如杭州府學生員丁丙見義必爲居心懇惻而有條理在杭州賑撫局辦理各務巨細咸宜人皆稱其善而服其敏若授以牧令之職必能拊循衆庶希蹤循良鄞縣五品銜內閣中書陳政鑰才長而能斷在甯波府局襄理局務能持大體壹意奉公雖遠人亦不能撓石門縣丁憂同知銜江蘇候補知縣陳其元才長心細力持大局辦理甯波局務勤幹有爲此兩紳者若授以繁劇之任必能有所展布遂安縣國子監學正銜貢生洪自含以利人濟物爲念敦善不怠甘貧守正秉性樸誠人共信之勸捐善舉皆有實濟

年已六十不求仕進應請 賞給京銜以風末俗 臣將去浙聞見既確未敢沒其所長謹以此應

詔伏乞 皇上聖鑒訓示施行謹 奏

同治三年十二月初二日內閣奉 上諭左宗棠奏敬舉人材請旨錄用一摺浙江杭州府學生員丁丙在杭州賑撫局辦理各務巨細咸宜著以知縣發往江蘇補用內閣中書陳政鑰在甯波襄理局務能持大體江蘇候補知縣陳其元辦理甯波局務勤幹有爲以上二員均著以直隸州知州發往江蘇補用國子監學正銜洪自含甘貧守正勸捐善舉皆有實濟著賞加光祿寺署正銜以示鼓勵該部知道欽此